

424.

BIBLIOUTÉCO DE L'ESCOLO DE LERIN

AGUETO

ROUMAN

PÈR

MAURICI RAIMBAULT

CABISCÒU DE L'ESCOLO DE LERIN

Près : 3 fr. 50 c.



ESTAMPARIÉ F. ROBAUDY

Carriéro de Prouvènço

— CANO —


1893

AGUETO

CIRDOC



OC0016453



BIBLIOUTÈCO DE L'ESCOLO DE LERIN

AGUETO


ROUMAN

PÈR

MAURÌCI RAIMBAULT

CABISCÒU DE L'ESCOLO DE LERIN

Près : 3 fr. 50 c.



ESTAMPARIÉ F. ROBAUDY

Carrièro de Prouvènço

— CANO —


1896

FONS MIQUÈU CAMELAT

AGUETO a rempourta lou proumié près de proso
i Jo Flourau de la Mantenènço de Prouvènço, en 1892.



RESERVO DE TÓUTI DRE



CAB 1340 +2

TAJEMAD MUSSET 1892

PREFÀCI

Mi bòni relacioun d'amistanço emé Maurise Raimbault marcon de « Zóu ! »

Anave founda aquelo fueio literàri, quand un cambarado me revelè aquel artisto, qu'ane-rian vèire en Aubagno, e que fuguè quatecant di nostre. Despièi, « Zóu ! » es mort ; certànis amigueta se soun refrejado ; souleto, li bòni relacioun d'amistanço emé Maurise Raimbault an dura. Ço que provo, de mai-en-mai, que fau bèn counèisse avans d'ama e que li premié averon pas toujour li joio.

L'ami, à-n-aquelo epoco, travaiavo à-n-uno gènto fantasié, ISTÒRI MAI-QUE VERTADIERO DÓU SOUTO-PREFÈT DE CAPITO, que faguè li freto-

de nòsti legèire (e que pareiguè plus tard en plaqueto), fantasié que fuguè seguido de quant d'autri nouvello autant fino que clafido d'esperit : l' ESTANDART DE TISTET RAUBETOUN, LA REDACIOUN DE ZÓU ! AU PARADIS, L'EUME, LA LETRO NOUN AFRANQUIDO, etc., conte e raconte ounte Raimbault sabié 'spanta soun mounde en se moustrant tantost grèu, de cop gaulés, toujour artisto. Plus tard, faguè la crounico di libre nòu, mai em'aquéu biais especiau que dis ço que fau sènso enebi lou RIDENDO, biais que pau de journalisto, meme à Paris, an sachu enrega.



Aquéu bout de charradisso PRO DOMO MEA sarié esta necite, s'ero necite de prouva que Raimbault es pas arriba d'aièr en Felibrige, mai es toujour tant bon de se remembra li bèllis ouro viscudo, e l'epoco de «ZÓU !» aparèis encaro en quauquis-un coume lou tèms de la jouvènço devié aparèisse à Mürger, sus la tardo, après la gaio e simpatico bouèmo superbo d'ilusioun e pleno d'esperanço.

Dóu rèsto, Raimbault es vuei cabiscòu de l'Escolo felibrenco de Lerin. A publica, i'a gaire, la

segoundo edicioun de UN OME QU'A DE PRINCÌPI,
e un nouvèu travai, coume se n'es pas vist
encaro en nosto literaturo prouvençalo : OUR-
DOUNANÇO DE POULIÇO DE SANT-MARTIN-DE-CRAU,
obro plus soulamen literàri, mai saberudo en
filoulougio, tresor dessousterra pèr sis afougàdi
recerco, dis espéssi pousso que fan bârri i viès
encartamen. En un mot, Raimbault sarié un
majourau de deman se lou Counsistòri, fidèu
un pau mai à l'Estatut que s'es douna libra-
men, voulié pièi, au sufrage di siéu, recoum-
pensa aquéli que luchon, noun pèr sa blago,
noun pèr soun encoubramen, noun pèr sa
neissènço, mai pèr sa soulo valènço dins soun
talènt persounau.

Aquéu jour l'autour d'AGUETO sara majou-
rau.

* *

Car, despart quâuquis-un, li mestre pre-
mié, grand pouèto e grand prousatour, mai
que dèvon pulèu sa cigalo majouralo à sa
pouësio qu'à sa proso, lou Counsistòri comto
ges de representant especiau de la formo dóu
Cascarelet, di PAPALINO, de Castèu-brihant e
de Voultàri. E sarié tèms que lou Felibrige,
uno bono fes, destrussiguèsse óuficialamen

aquéu prejujat—que nòsti davansié semenèron en l'aubourant à l'autour d'un ate de fe naciounau—que lou prouvençau n'es atrencable qu'en rego metrado.

De fat, trouvas-me uno pajo de prosò encò di Bellot, di Chailan, di Toussant Gros, di German e de tant d'autre. A faugu la novo edicioun en douz voulume dis obro de Vitour Gelu pèr que NOUVÈ GRANÉ nous fuguèsse revela. Quant à Benedit e Desanat, an poussa lou prejujat enjusqu'i raro de l'aberracioun : lou premié, dins sa letro de CHICHOIS au direi-tour dóu counservatòri, a leissa passa l'óuca-sioun pèr maio en miés amant faire uno letro en vers francés. Soulamen, lou besoun de proso se fasié talamen senti e l'autour trouvavo aqui lou cas tant naturau, que li vers noun soun endica ; seguisson à la longo de la proso. Vous ensouvèn la fantasié d'Anfos Karr dins GENEVIÈVE ?

Desanat, aguènt lou pan e lou coutèu pèr servi la proso emé soun BOUIABAISSE semanau que navegavo en touto la Prouvènço, sacrifi-què la lengo naturalo dóu journau pèr bandi uno gazeto rimado, dóu titre au noum de l'estampaire.

D'ùni m'óupousaran belèu que dins tout mouvemen fau teni comte de l'epoco e dóu

mitan,e que l'evoulucioun se fasènt pau-à-chapau, aquélis ome an alesti nosto reneissènço literàri.

Segur que Roumo s'es pas facho en un soulet cop, e, dins aquéu cas, cade jour devié marca'no draiolo vers l'evoulucioun. Se lis aposto e li felibre, pèr glourifica e impausa si cresènço, avien fa'nsin, li crestian adourrien encaro de chin e de tarasco e li felibre farien encaro de BOUIABAISSE. L'Escolo Mar-siheso a mantengu lou mouvemen di rimaire, enlusí, defés, de bèllis e fòrti belugo pouëtico, mai noun a alesti la reneissènço literàri dins lou sèns vaste dóu mot.

Lou Felibrige devié coumpli aquéu prefa. Es Roumaniho que dounè lou vanc emé si bèus estudi pouliti e artisti dis OUBRETO EN PROSO :

« Es pas de vers que vau mai alisca ; es pièi pas necite d'enfiela toujour de vers. Uno supousicioun : Babèu e Louvisoun se rescontron, un matin :

— E mounte vas ansin, Louvisoun ?

— Ma bello, vau en plaço.

— Ah ! bèn ! tè, ma mìo ! Coume fau que mete caud sus ma bugado, vaqui douz liard : m'adurras, pèr moun bouta-couire, un pòrri, de bledo, un brout de mento, uno fueio d'api...

Acò 's pas de vers, e pamens, acò vai. Parlen dounc un pau sènso rimo...»

Pièi Aubanèu — lou grand, l'impecable pouèto — venguè : « Après Oumèro vèn Tucidido ; e cresès qu'es pas encaro poulit d'estre Tucidido ? E pièi uno lengo, uno literaturo, pèr èstre coumplèto, noun pòu avé soulamen lou lengage di vers. Sarié coume se, pèr viéure, l'ome n'avié que perdigau rousti : vendrié lèu l'enòdi e lou desgoust ; fau de mai lou pan. »

Raimbault, coumprenènt la prefounso pourtado d'aquéli paraulo, e respoundènt is aspiracioun d'aquéli felibre eminent, s'es atala à n-aquelo obro necito de la proso ; bèn mai, à soun aflat, li jouvènt que presido sé soun rambla de tau biais à soun rampèu, que, n'es de crèire, bèn lèu, l'Escolo Lerinenco de Cano sara celèbro pèr si publicacioun en proso.



E noumbrous soun lis ome de la novo generacioun que dis O, qu'à travès dis idèio d'independènci e de federalisme que trachisson despièi quauque tèms, veson peréu que nòsti liberta saran pas sauvado rèn qu'emé de can-soun e meme de bèu vers.

*En revoulucioun ardènto, terrible, ourriblo,
la MARSIHESO a fa vibra e aquichè lis aloubati.
Mai coume nosto revoulucioun es pacifico,
nòsti jouvènt, nòsti brun mascle, s'enchau-
ton di cansoun e parlon au pople dins la len-
go dóu pople.*

*E counèisse, dins aquelo lengo, mai d'uno
obro que faran sensacioun à soun espelido,
souto l'alen pouderous di Bernard, di Giraud,
di Funèu, di Bertrand, di Garbier e que sabe
mai, iéu ?*

*Acò nous pausara di feminism dis un e di
decadènci dis autre.*

*S'aujavian, apoundrian : nous pausara di
causo campèstro car, cresès pas que dins uno
vido superbamen vidanto coume la vido prou-
vençalo i'a 'ncaro uno autre eisistènci qu'a-
quelo di champ ?*

*Perqué vougué faire encrèire que la Prou-
vènço viéu touto dins li meisoun, dins li ven-
demi, dins lis óulivado ? Es que la Prouvènço,
aquéu tant bèu païs, pòu teni rèn que dins
l'istòri de nòsti pacan ?*

*A coustat d'aqueüi valènt de la terro, i'a de-
mai — en Prouvènço — lou mounde SELECT,
qualificatiéu anglés, mai courènt, qu'empacho
pas aquéu mounde d'estre prouvençau e de lou
prouva quand fau aplaudi nòsti mestre en*

Acadèmi vo en felibrejado. E sènso recerca, coume d'autre, se la Prouvènço aristoucratico eisisto autant en felibrige brindant qu'en felibrige academi, sian d'avis que nosto nacioun se coumpauso autant bèn de bourgés que de païsan.

Quau vai au champ, quau s'amarino :
Fau de tòuti pèr faire un mounde... *

N'es talamen ansin que nòsti mestre, quand si fraso e si rimo lou demandon, nous rapèlon voulountié l'Age-Mejan, ounte i'avie ges de pèd-terrous, mai rèn que de segnour ; li nòbli troubadou sènso óublida li prince enjusqu'i barounet ; li rèi emai li jouglar que sabien meme pas se la souco finis en tino.

Lou mouvemen literari prouvençau dèu adounc autant bèn pinta, emé li tablèu rustique, aquéli di saloun. E vese pas perqué noste LATIN, à coustat de midamisello Mirèio, Anoun-ciado ; misè Faneto, poudrié pas counta nòsti chato mouderno que van au licèu, que PIANOTON e que van cassa. Es pas iéu qu'ai fa la soucieta prouvençalo ; eisisto pertout en Prouvènço e fau dire çò que viéu.



* CALENDAU, C. VIII.

Es ço que Raimbault a vist e nous lou vèn dire. Soun AGUETO vai espanta, quant de gènt que saran lèu d'accord em'eu ?

Car fau pièi n'en parla d'aquelo fiho de Raimbault !

E regardas se sa mignoto es de neste bèu moun-de, tout en restant assouludamen prouvençalo.

La vesèn, d'abord, que pren sa leiçoun de pianò ; pièi, mounto à chivau ; pièi remo, emai tiro dóu fusiéu, emai nedo, emai pinto. Queto educacioun, me dirès ! Segur, mai l'educacioun es pas enebido en païs prouvençau. Agueto — emai siegue la fiho d'un capitani de dragoun — n'es pas mens prouvençalo e l'anas vèire.

M'ócuparai pas forço de M. de Bernat, ni de M. Tournaire, ni de la maire dis Avignounet, qu'es enca de l'encian regime, pèr remarca que M. Carle met uno courrespoun-dènci à jour.

Lis ourtoudòssi, lis enfiouca de la Prouvènço bastidano, se van metre li man sus la tèsto : « N'en vaqui un de rouman parisen ! Metre à jour uno courrespoundènci, mounta à chivau, tira dóu fusiéu.... De la vido ! »

Chut ! qu'es pas tout ; bramarès après. Dins l'obro de Raimbault l'on es à la coulo e, de fes, la bono amigo se i'apèlo la cuneissènço. Ieu m'esplique aquéli terme pèr la presènci de

soudard. Or, que voulès ? se Madamo Tournaire es enca de l'encian regime, li troupié d'AGUETO, éli, soun mouderne, — Lucian Des caves ié trouvarié même soun comte, — ço qu'empacho pas que farien tant bèn soun devé qu'Estève de Cadenet.

Mai se li persounage de l'escolo de Raimbault soun plus li persounage di counvencioun, di tradicioun en ounour dins la literaturo mie-journalo, veici lou cadre, veici lou païsage que, certo, crese pas ni bourguignoun ni faubourian, ço que vai, pènse, nous metre d'accord emé li dur de l'us counsakra. Car, l'ai di, Agueto es prouvençalo e bèn prouvençalo.

Graci à-n-elo sian en Ciagno,⁽¹⁾ en un mas arrounda de pinedo. Pèr elo, couneissèn Pegoumas, La Napoulo, Cano, que sabe iéu ? E regardas : quand jogo pas dóu pianò, que mounto pas à chivau, que tiro pas dóu fusiéu, quand pinto pas e quand noun nedo, sabès ço que fai Agueto ? Trèvo li ferigoulo di bord de Ciagno ounte fai la casso di courdounié...⁽²⁾

Aro que sian entendu aqui-sus, ai plus qu'à répondre à ço que vous ause murmura : « Mai, e la mousralita de la mignoto ? Nous sèmbla que si parènt l'entrepachon pas forço dins sa liberta, e pèr uno jouino fiho... sabès ço qu'arrivè à la fiho de Matieu e qu'an mes en cansoun ? Car tout acò fai pièi parla lou mounde. »

Au nostre, o — emai faguen pas un crime à Mirèio em'à Vincèn quand toumbon l'un sus l'autre, — dins li regioun di vióuleto e di caciò, nàni e se coumpren.

Despièi long-tèms Cano, Niço, Iero, soun çò que se poudrié dire de coulounio angleso, e se saup que li jouvènti miss cridon shocking qu'en païs de Graciouso Victoria. Quand soun foro de sis estat, si mour s'esperlongon e sa liberta n'a plus de raro. Es dounc pas estrange qu'à-cha-pau, li miss, agon impausa si mour dins nòstis encountrado souleiouso e que nòsti jouvènto s'enanon, soulo emé si calignaire, faire de blad de luno, long de la mar, ounestamen, coume Agueto.

Crese qu'ai di tout çò que vouliéu dire à pre-paus d'aquéu libre ; plus qu'un mot à l'autour.

* *

Segur, auriés pouscu trouva quaucun mai autourisa que iéu pèr presenta toun rouman au publi, mai as vist qu'aquéli que déurrien, pèr soun poudé, pèr si mejan, veni à l'ajudo di jouve es aquéli, just-à-just, que s'improuvison amoussadou, richounejon e prouvon rèn, pas meme lou prougrès qu'avien l'èr de caupre ; mai as vist despièi long-tèms li capeleto envahi la grand glèiso de Santo-Estello pèr ié


*canta matino, entre chin e loup, à l'autar de
quàuqui faus-diéu que dounarien desesperanço
se noun fasien rire; e as vist, ço qu'es plus
grèu, e ço que lèvo lou rire en baiant desespe-
ranço pèr la Causo que respectan e que fai nòsti
lucho de cade jour, as vist, dise, de grand-
prière, senoun óuficia davans aquélis autar de
ruolz, mai, au mens, s'ageinouia au son de la
campaneto. E te siés adreissa au vièi ami que,
s'a pas la coumpetènci necito, saup, sènso
parti-pres, en touto independènci, coume tou-
jour, escudela ço que pènso; e sariés moun
nemi intime, te diriéu :*

« *Camino, Raimbault, toun libre es bon, e
pèr quàuqui darnagas que vas espanta noun
t'arrèstes dins toun obro. Li libre, lou sabes,
an sa destinado e nòsti nebout, e nòsti cago-nis
saran bèn-urous, un jour, de treva, en coum-
pagno de toun Agueto, li ferigoulo di bord
de Ciagno e de faire la casso di courdounié,
en óublidant la menaço qu'auran pouscu ié
faire, que quàuqui boudenfle de fausso glòri
aurien pouscu trachi ! »*

Louis ASTRUC,

FELIBRE-MAJOURAU.

Aubagno, dôu Bras-d'or, 1893.



AGUETO

I

Belèu vue jour avans d'acaba soun voulountariat, *Messiés* li coundiciounau d'ou 3^{en} de ligno — que n'en ère, — se capitavon à la cantino, à manja l'aiòli tradiciounau quand lou sargent de semano m'aduguè uno letro à l'embalun rose-tèndre que sentié la vióuleto qu'èro un baime.

— Oh ! oh ! cridèron li coumpans.

Regardère l'adrèisso, mai aquelo escrituro tout ensèn longo e fino me disènt rèn, dessagelère la messivo emé tout lou siuen qu'améritavo e, tout d'un tèms, n'en toumbè un brout de ferigoulo.

— Ah ! ah ! faguèron aqueste cop li cambarrado que me tenien d'à-ment.

Mai iéu, sènso m'enchauta d'éli lou mens
dou mounde, legissiéu eiçò :

« Moun vièi piou-piou :

« Adematin, ai vist dins lou journau que
« t'anavon embandi lou 15 d'aquest mes. Acò
« m'a fa gau que-noun-sai, d'abord perqué
« sabe que lou regimen t'agrado pas de rësto,
« e pièi perqu'ai besoun que tournes à Cano ;
« grand besoun. Ai un afaire forço serious sus
« li bras e coume ni *papa* ni *mama* lou dèvon
« saupre avans quauque tèms, voudriéu que
« siguèsses eici pèr m'ajuda de ti counsèu.

« Noste paure Mouret — aquel ase qu'avian
« e que tant nous a fa toumba de mourre-
« bourdoun, autre tèms — s'es rout une cambo
« l'autre matin e l'a faugu faire abatre. Se
« sabiés coume l'ai ploura !

« Vène me vèire entre arriba, qué.

« Nosto chino, Diano, a agu tres poulit
« cadèu. Te n'en garde un.

« Fau que vague prendre ma leiçoun de
« pianò, adounc te n'en dise pas mai.

« T'embrasse de tout cor.

AGUETO.

« P. S. — Me respondes pas, qu'à l'oustau
« sabon pas que t'ai escri. Lou brout de feri-

« goulo vèn dòu bord de Ciagno, d'aquéu
« rode ounte anavian ensèn cassa de courdou-
« nié. »

Avans d'intra à plen de velo dins moun
raconte fau, ami ligère, que vous fague cou-
nèisse mi persounage.

Agueto èro la fiho d'un encian capitàni de
dragoun, moussu Tournaire, qu'avié 'spousa
'no damisello de la vièio famiho dis Avignou-
net. Aquéu brave óuficié, un cop la retrèto
vengudo, avié croumpa à l'escampadouiro de
Ciagno, un mas cencha de pinedo e, au mitan
de la ribiero, uno iscloeto que madamiselo
Agueto n'avié l'empèri soubeiran em 'incoun-
testa.

Leissant à sa mouié — emé resoun, d'aiours
— la direicioun de la fermo, di tuberouso,
dòu jaussemin, di vigno etc., moussu Tour-
naire s'ero carga de l'estruciouon de sa cha-
touno bèn-amado. E fau dire que perdeguè
pas sa peno. Quand partiguère pèr ana faire
moun dre à-z-Ais, la mancipo, qu'avié alor
quatorge an, mountavo coume un bregadié un
grand chivalas emé quau sautavo valat e
sebisso, menavo uno barco emé la velo o l'avi-
roun, coume un Suquetan⁽³⁾, fasié mousco
quatre cop di cinq emé fusiéu e revolver e

nedavo coume plusiours pèis. Mai vous afourtissié que siès e vue fasien vinto-quatre, que Sant Louvis èro lou paire de Napouleoun e t'avié uno escrituro que tres rego n'en clafis-sien uno pajo.

Mai lou capitàni avié sus lou *dreissage* di fiho, coume disié, d'idèio à despart qu'avié presso en Americo ounte lou gouvèr l'avié manda en messioune pèr croumpa de chivau.

Li Tournaire èron pas liga de parentèlo emé li miéu, mai li dos famiho se couneissien de longo toco, estènt que nòsti bèn èron vesin. Basto ! Agueto e iéu s'erian abari ensèn e se regardavian coume fraire e sorre.

Estènt douna çò que sabiéu de moun amiguelo, la letro que veniéu de reçaupre me faguè proun pantaia. Aquel afaire tant serious que ni *papa* ni *mama* dèvon saupre avans quauque tèms, de que pòu bèn èstre ?

La crento me prenguè que la mesquino se traguèsse dins quauque emboui car me pareissié capablo, innoucento coume èro, de s'embarca dins quauque escaufèstre, fauto de ié vèire pus liuen que lou bout de soun nasoun rose.

E pièi, perqué tròni ! me vèn ti querre après quatre an que se sian plus vist, alor que, dins aquéu long tèms, m'a jamai manda un mot,

senoun pèr la man de mi gènt quand li vesié
au moumen que m'escrivien ?

Qu lou saup ?

La chato es un mistèri vivènt. L'estudias un
an, dous an, dès an e, se 'n cop vous cresès de
la counèisse, em'uno souleto paraulo, vous fai
vèire que vous sias embula e que vous poudès
bouta tournamai à l'obro.



II

Aquéli que, douge mes de tèms, se soun entendu trata d'abesti e de coudoun pèr de carpourau corse que li valien pas ; aquéli que, tout un an, an respira l'atmousfèri de la caserno, valènt-à-dire un prefum penacha de *causseto russo*, de susour, de linge brut, de cuer, de cirage etc., aquéli coumprendran coume vai que lou 15 de novembre 18.., cantave à plen de garganto sus lou grand camin de Cano à Frejus.

Es tant bon d'estre libre après agué taste de l'esclavitudo la mai duro que nòsti lèi laisson ista ! Ah ! lou rèi èro pas moun cousin ! Lou kèpi de cantèu, li braio estroupado, la tunico

duberto, disiéu un bonjour d'ami en tóuti lis aubre, chourlave un cop à tóuti li roubino, fasiéu pauseto à tóuti li buto-rodo, aspirant à plen póumoun lou bon aire pur e prefuma dóu campas.

Enfin arribère au pont de fiéu d'aram ounte mi gènt m'esperavon. Aqui, dins li poutoun de la famiho, óublidère e lis enfetamen que veniéu de passa e moun age meme, pèr veni tournamai enfant emé ma sourreto que, escapado de la pensioun pèr la circounstànci, assajavo au countràri d'estre seriouso. Jujas un pau, la sorre d'un carpourau ! Mai au bout de cinq minuito landavian ensèn, coume de foulas, darrié cade tavan que nous fusavo davans lis iue.

E quéti rire ! Quéti bon rire de cor !

Mau-despié touto moun envejo d'estre ren-signa au pus lèu sus l'afaire d'Agueto, passère tout lou jour à l'ouстau à me refaire is abihage de *bourgés*, au coulet que m'estoufavo, au courset que m'ero trop estré, i boutino que me geinavon ; mai sènso parla dóu secrèt, m'assaventère auprès de moun paire, de la famiho Tournaire.

— Lou capitàni, me faguè, es toujour bèu cavalié ; a pas mau blanqueja, mai en quau arribo pas ? Sa femo, coume antan, viho à la

culido di flour, au segage, à la cauco, i vendùmi.

Elo nimai a pas forço cambia. Pèr Agueto, l'ase me quihe! se la recouneiriés. Aro, es unc femo — fisicamen, entenden-se, qu'emé lon biais que soun paire l'a alevado, a bèn douge an pèr lou sèn. Pamens a pièi counsentì à-n-estudia un pau coume lis autre: toco dòu pianò, pinto proun bèn; mai a pres à soun paire uno parladuro que fai dins si bouco lou pus drole d'efèt. E pièi, es d'uno indépendènci...! Basto ! Tu que vos escriéure, auras aquito un tipe à-n-estudia.

Em'acò l'endeman me taière uno cano dins lou sagnié, atubère *Titino*, — moun vièi ca-chimbau d'estudiant, — e m'adraière vers la bastido di Tournaire.

Li bràvi gènt m'esperavon e vengueron à moun rescontre tre que Diano m'aguè japa contro. E alor d'embrassado quàsi famihialo, e de coumplimen, tè n'en vos, n'en vaqui; e de questioun ! E dòu tèms que, asseta souto lis amourié troussa dòu relarg, lou capitàni me benastrugavo de ma voio à coumpli lou devé militàri, sa mouié anè souna Agueto.

S'ausiguè un chamatan dins l'oustau; uno mescladiiso de terraio routo e de saut dins lis escalié.

Iéu, m'estudiant iéu même, fissave la porto pèr vèire queto sarié la primo empressioun que l'estrango enfant farié sus iéu.

E vaqui subran qu'eicesto se traïs à moun còu, m'ensarrant dins si bras e m'empeгant de poutoun sus li gauto.

— Bonjour, moun vièi piou-piou, bonjour ! Enfin te vaqui dounc ? Se fasié tèms que revenguèsses. Sai que me mancaves despièi la mort d'aquéu paure Mouret.

— Gramaci ! S'acoumènces déjà de me dire de marridi resoun me vau rengaja.

E countunierian ansin uno counversacioun ounte m'entremesclavo de causo pretoucant e de boufounado.

Enfin se decidè à s'assetta davans iéu sus un to de sause e, tout en charrant dóu mestié, di brimado, di manobro emé lou paire, aguère tout lesi pèr estudia la fiho.

Ah ! de tout segur l'auriéu pas recouneigudo. Iéu qu'aviéu leissa uno enfant retrouve ave uno chato grando e bello. Sa raubo de papalino dessinavo uno taio soupl e fino, un sen ferme e mouflet. Sa caro, courounado d'uno capelino d'ounte s'escapavon arrage li trachèu de sa como negro, s'aluminavo de fes que i'avié, i rebat de sis iue dous e souns, garagai vertadié ounte sarié 'sta un chale de

s'aprefoundi. Si bouco cremesino, de longo sourrisènto, semblavon un nis de poutoun e soun nas, lóugeiramen croucu, is alo fernisènto, èro plen de vouluptóusi proumessò.

— Soupas emé nautre, que ? Me diguè lou capitàni.

Iéu m'escusèrè : mi gènt m'esperarien ; aguèsse sachu lis auriéu averti. Mai Agueto me fasènt un signau d'inteligènci ;

— Vau manda au tiéu pèr preveni.

E despareiguè dins li bastimen de service.

Aviéu plus de resoun pèr refusa e restère, escoutant moussu Tournaire, vesitant emé Misè Tournaire li plantié, lou galinié, lou pouciéu e respoundènt i galejado d'Agueto que, à-n-aussi si cacalas, aurias jamai cresegudo avé sus li bras un afaire forço serious.

Basto ! La soupado avié pres fin ; lou café begu, tubavian uno cigarò emé tout lou sant-plan de gènt que digerisson bèn :

— Papa, diguè la drolo, anan, emé Charle, faire un tour de batèu. Counèis pas ma bèto novo, li vau presenta.


La maire, prudènto, faguè remarca que la mié-nouvèmbre èro gaire un tèms pèr ana courre sus mar, de niue, au risco d'aganta quauque plevèsi. Agueto, testardo, respoundeguè qu'acò 'ro verai dins lou Nord mai que,

bord qu'abitavian la *Ribo d'or*, èro pas pèr rèn. Me demandè pièi s'aviéu pòu de me nega vo d'arrapa un raumas, m'assegurant d'aiours que, dins este darrié cas, me vendrié faire de tisano.

Coume bèn pensas, me rendeguère à de resoun talo. Elo abrè un fanau e passè davans pèr me moustra lou camin, giblant à peno lis erbo de la draio, lóugeireto qu'èro coume un glàri.

La barco destacado, ma coumpagno prenguè la barro e, iéu remant plan-plan, s'enane-rian au fiéu de l'aigo fin qu'à la mar.





III

Lis erso, boulegado pèr ges de vènt, venien tout-bèu-just lipa li paret de la ratamalo ; lou cèu qu'aluminavon la luno e lis estello, retrasié un inmènse tibanèu argentau. Eilavau, à visto perdudo, s'estalouiravo, blanco e trousado coume la lamo d'un sabre mouro, la plajo de l'Ancro e de la Bouca. Pèr endré, se vesié trelusi li signau acoulouri dóu caminferra tau que d'ieu en cerco, quau saup de que ?

E pièi, dins lou founs, Cano emé soun clouquié e sa tourre mountant negre dins lou cèu blave, se laissavo bressa pèr lis aigo de soun

góu que, esbrihauant de lume, dounavo d'èr
à-n-aquéu de Naple, *il dolce paëse.*

— E bèn, veguen. Aquéu famous secrèt ?

E leissère ana li rèm. Abandounant tambèn
la barro, Agueto venguè s'assetta contro iéu.

— Escouto, diguè, vas d'en-proumié me
baia ta paraulo de parla en res de ço que te
vau fisa.

E, calino, me faguè 'n coulié de si dous
bras.

— Moun Diéu; te l'aproumete de tout çor ;
mai parlo vite qu'ai proun manja-begu.

Alor, coume s'avian pancaro esta proun
liuen de tutto ausido proufano, se giblè e me
boufè à l'auriho :

— Siéu amourouso.

— Ah ! E de quau ?

— De moussu de Bernat, un jouvènt que
counèisses pas perqué i'a pas longtèms qu'es
dins lou païs. Mai entre lou vèire l'amaras
tambèn. Es tant bon, tant bèu !

— E alor, que vos que fague aqui-dintre,
iéu ?

— Escouto, moussu de Bernat m'amo pe-
réu.....

— Te l'a di ?

— Nàni, mai l'ai coumprés.

En disènt aquésti paraulo s'ero redreissado,

fiéro, e 'stampant sus lou cèu lou pur coun-tour de soun cors de piéuceleto coume pèr dire : « Regardo. Es que siéu pas proun bello pèr èstre amado ? »

— Vai toujour.

— Papa es brave ; es *à la coulo*, éu ; mai mama, estènt dis Avignounet, es encaro de l'encian regime e faudrié pas que me veguèsse barrula souleto emé moun bon ami. Boudiéu ! Que chamado ! Adounc, se vos me faire plasé, se 'n cop moussu de Bernat vendra, nous qui-tarás pas e nous serviras de porto-respèt.

— léu ! faguère em'un saut d'escarpo que la nau n'en trantraiè.

— Te n'en suplique. De-que te fai ? I'a ges de mau aquito. Dins tóuti li pèço, li gènt an pas de counfidènt ? Saras lou miéu, e vaqui.

Assajère encaro de lucha mai elo, me re-gardant bèn dins lis iue :

— Siés jamai esta amourous, tu ?

E me clausènt li bouco em'un pontoun :

— An ! Es entendu, qué ? E aro rintren, que se fai tard.

Tournerian ansindo, elo galoo, lou pitre bachelant, cantant à grando voues uno bressa-relllo de Bensa⁽⁴⁾, enterin que iéu m'enfounsa-ve dins mi pensamen.

Bò, me disiéu, es trop puro pèr voulé faire

mau e çò que lou provo es que cerco elo memo
quaucun pèr metre en tiers dins sis amoureto.
E pièi sa demando me boutara justamen à
meme de i'estre utile au cas qu'aquéu moussu
de Bernat vouguèsse ana trop liuen.

Pamens, au moumen d'arriba, uno idèio me
venguè :

— Mai que, Agueto, coume as fa la cou-
neissènço d'este jouvènt ?

— Ah ! Ah ! Vaqui. I'avié proun tèms que
lou rescountrave en courrènt lou païs emé
Rouland...


— Quau es aquéu Rouland ?

— Bedigas ! Es moun chivau. Un jour,
dounc que nous passè contro, eila, pròchi lou
Biau, iéu faguère reguigna Rouland emé
quàuqui cop d'abrivau e me leissère toumba
plan-plan à-n-un endré que la bauco me gardè
de mau. Jouguère pièi la femo avanido e Éu,
après m'avé censa reviéudado, me pourgiguè
soun bras pèr rintra à l'oustau. Lou pus drole
es que Rouland, lou paure, nous seguiguè pas
à pas, tirassant pèr lou sòu sa brido penjadis-
so, sènsò se douta que moussu de Bernat lou
prenié pèr un marrit animau. Coume bèn te
pènse, mi gènt an gramacia couralamen moun
sauvaire que, desempièi, es amés à veni au
nostre quand i 'agrado.

— Tè ! Tè ! Acò 's pas mau enventa pèr uno
jouveineto de ta meno.

Uno fes à-jòbi, en boufant moun lume, me
pensère : « Es egau ; de que dirien lis ami,
Poulò, Papa-bon-counseù e *tutti quanti*, se
sabien que vau faire lume ?





IV

A parti d'aquéu jour reprenguerian *nosto*
vido d'ou tems qu'erian pichot. L'ivèr s'anoun-
ciavo bèn : li fueio daurado restavon encaro is
aubre ounte fasien lou pecouiet, semblant s'ar-
rapa de touti si forço à-n-aquéli broco qu'èron
la vido pèr éli. Déja li pradello se clafissien
d'aquésti flour, anemouno, vióuleto vo margar-
ideto que fan à *nosto* marrido sesoun uno
courouno agradivo e gaio que-noun-sai.

E vague de courre bourrido, quouro vers
Pegoumas, quouro vers la Napoulo, quouro
vers Cano. Souventifés, quand l'auro èro

bono, l'*amiral*o Agueto me fasié lis ounour de soun bord.

Or, un jour, erian ansin toui dous en pleno mar à béure lou soulèu e lou salabrun ; ieu fasiéu de fum coume un four de caus, tout en escoutant moun amigueto que barjacavo coume uno agasso.

— Digo, Charloun ; sabes mounta à chivau ?

— O, e 'ncaro mies n'en descèndre.

— As mounta souvènt ?

— Vue cop. Siéis cop n'en siéu davala sus li pèd e dous cop sus ço que sabes.

— Bedigas, vai ! Vos que t'aprèngue ?

— Ah ! nàni preisèmple ! Me siéu bèn jura que se desanant quaucun se roumpié quauca-rèn rapport meme à-n-un ase, sarié pas ieu.

— Anen, veguen, me refusaras pas acò.

— E o, te lou refusarai ; fau pièi èstre resounable. Siéu pas basti pèr faire un cavalié, es un malur. De-que ié faren ? Voudriés pas èstre l'encauso de ma mort ?

— Bò, veiren.

E la belugueto cascaiè la tèsto d'un èr que devié s'entèndre : « As bèl à faire e bèl à dire, passaras ounte voudrai. »

— A perpaus, moun role de capeiroun es pas bèn deficile jusqu'à vuei. Vaqui mai d'un mes que siéu eici e m'as pancaro mous-

tra toun fringaire. Parèis que coumpren pas forço soun bonur aquéu moussurot. Au mens fai-me soun retrá.

— Nàni, nàni, moun bèu. Vole que lou vègues sènso prevencioun de ges de merço e que me digues çò que pensaras d'eu.

— Oh ! pèr acò, sabes qu'ai pas la lengo au couissin. Se m'agrado, te lou dirai ; e se m'agrado pas, peréu.

— Siéu seguro que t'agradara.

— N'en prène pas l'engajamen.

En charrant ainsin, la vesieu que seguissié dis iue dins li nivo, la figuro dóu bèn-ama. Acouidado sus lou plat-bord, la tèsto repausant sus sa maneto, soun regard que ruttavo l'infini coume aquéu de la Vierge de Murillo, la tresfiguravo se pòu dire. S'aperçuvié pas que soun péu s'estènt desnousa, lou soulèu ié jougavo amourousamen e l'emmantelavo elo memo de belu.

Alor iéu, la vesent tant bello, acoumencère de trouba aquéu M^u de Bernat un grand miserable qu'ameritavo pas sa chabènço e, pèr lou proumié cop de ma vido, un pichot levame de jalouié faguè sa boulegadisso dins moun cor.

Enfin un jour lou calignaire se decidè à parèisse. Un matin, sus li younge ouro, ère

en trin de metre au courrènt uno courres-poundènci en retard de sièis mes. Subran ausisse un trapé de chivau sus li calado dóu relarg ; davale lèu-lèu e de-que te vese, bèn bon Diéu ! Agueto elo memo, en amazouno, tenènt en man un segound chivau.

— Mai ounte, diàussi, vas ansin arnescado, ma pauro Agueto ? Intres dins un cirque ?

Meteguè son detoun sus si bouco e, misteriousamen :

— Es à l'oustau.

Ajustè pièi à-z-auto voues :

— Zóu ! Escalo-me aquéu bestiari que te vènes dina 'mé nàutri.

— As bèn pres uno peno inutilo. T'ai di que vouliéu pas mounta 'qui-sus e ié mountarai pas.

— Mai es serious ? As pòu ?

— Pòu o noun, es ansin.

— Aquelo tubo ! Uno tant bravo bësti !

— Bravo ! Bravo !

— E o, bravo. Sèmblo un chivau de bos. Dirien que te l'an fa sus coumando. Fagues pas l'enfant. Avèn tout-bèu-just lou tèms d'arriba pèr nous entaula. Se ié vas d'à-pèd arribaras trop tard, e ai besoun de tu, me faguè en me fissant de si bèu vistoun clar e franc.

— I'anarai aquest tantost e n'en saras quito pèr dire que m'as pas rescountra.

— Cresiéu qu'èro uno galejado ; mai bord qu'es pas pèr rire, vai bèn. Ai agu tort de counta sus tu. Adiéu.

Veguère dos lagremo pouncheja au cantoun de sis iue, tremoula uno passado au bout di ciho e regoula sus si dos gauteto roso. Adiéu prudènci !

— Ié vau !

M'avansère de *moun* chivau, un grand fouthau que, quiha sus si quatre cambo enarcado, me regardavo de tout soun aut, emé de gros iue round ; lou regardère peréu. Ansin se deguèroun regarda Napouleoun e lou tsar Aleissandre lou proumié cop que se rescountreron.

Enfin, après m'estre recoumanda à Sant Antòni de Pado, que fai retrouba li viéure esmarra, pèr lou cas que leissariéu quauque mèmbe pèr camin, agantère lou bridoun e la creniero e me meteguère en selo.

— Brave ! Acò 's mounta coume un ome.

Lou niué qu'avié 'n moumenet embruni lou carage de la chatouno èro adeja liuen e partiguerian tant bèn que mau.

Long dóu camin Agueto siguè pèr iéu enca mai gènto qu'à l'acoustumado. Coumpreniéu

que la vitòri que venié de rempourta sus ma prudenci ié fasié grand gau e que n'èro fièro. Risouleto, tout en troutant boto à boto, me galejavo amistadousamen :

— Vé, Moussu lou dalicat, que la cambresino ié fai mau. Te counseie de te lagna encaro. Voudriéu bèn saupre se n'i 'a forço qu'an de damisello per proufessour de manege. Demandaras à papa se n'en pagavo à si dragoun. Siés galant, vai ! Dire qu'as cala qu'en me vesènt ploura.

— Perdouno-me.

— Jamai de la vido.

— O ? Espèro un pau.


Rassegura sus ma bësti, qu'efetivamen avié pas l'èr de voulé prendre lou mors i dènt, m'asardère à passa moun bras à l'entour de la capounoto ; mai ecesto, pougnènt di dous, partiguè coumo un lamp à travers un champ de luserno en se revirant pèr fes pèr me crida : « Ligueto ! »

Iéu, pres d'uno bello ardour e sènso me rèndre bèn comte de ço que fasiéu, me tra-guère à sa seguido e nous vaqui landant tóuti dous au triple galop. De bonur qu'acò 's l'aluro ounte èi lou mai aisa de pas tomba qu'autramen auriéu courregu risco de la pèu. Es ansin que M. Tournaire, que n'en tubavo uno

en nous esperant, nous veguè arriba dins un neblas de pousso.

Couneissènt ma fermo entencioun de pas m'asarda sus un chivau, n'en poudié pas crèire sis iue. Tambèn quand fuguè segur de pas s'engana me piquè un *ban de cavallarié* di bèu que i' ague.





V

Lou capitàni faguè li presentacioun :
— Moussu lou viscomte de Bernat, Mous-
su Charle Maset.

Manquère toumba de moun aut. Coume !
Es aquéu qu'Agueto trovo tant bèu e tant
bon ? Bon, es pouossible ; mai bèu , aquelo
preisèmple ! passo l'osco.

I'a de gènt que — emai sigon francamen
laid — vous agrado de li regarda ; pèr M^u
de Bernat èro tout lou countràri : grand,
prim , em'uno caro reguliero , sarié belèu
esta'n poulit ome sènso d'ieu vaigue, sèmpre
à mita barra, sènso sa barbo e soun péu,
rufe, de tres det de long e planta dre, qu'au-

rias di la bourro d'uno vièio cachoflo. A-poundés à-n-acò un abihage de cassairot que lou rendié enca mai risible.

Uno fes à taulo m'entrinère à lou faire charra pèr lou juja au mourau. Ai-las ! Impoussible de ié parla cinq minuito sènso que ramenèsse la counversacioun à la cassoque, coume disié, èro sa souleto passioun. Nous racountè ansin qu'au coulège s'escapavo de l'estudi per ana cala de leco dins la court, que si gènt avien renouncia à lou faire trabaia, i'avien rendu sa liberta e que desempièi, cassavo en tout tèms car, en lou bèn pagant, avié óutengu un permés de naturalisto que n'i 'en baiavo lou dre.

Basto ! Ero un ome en dessouto de l'ourdinàri, un d'aquéli mié sauvage que, à la forço de treva lou ferun, fenisson pèr ié prendre quaucarèn. Mai qu'Agueto se n'en siguèsse rendudo amourouso acò m'espantè pas. La mesquino aguènt à pau près sèmpre viscu entre nòsti dos famiho èro estado un pau tardiero, pièi un bèu jour, sènso que res se n'en siguèsse avisa — e elo mens que tout autre — la boujarrounno s'ero derevihadò femo. Lou Mistrau ié fouitant dins li veno un sang mai calourènt, lou cor bacelè e, souto li rai de neste soulèu se dur-

biguè tout d'un tèms, sènso saupre perqué,
coume li roso que, boutoun encaro lou vès-
pre d'avans, estalouiron i proumié belu dóu
matin si courolo pourpalo e prefumado.

Trabaiado per aquéu besoun d'ama e d'estre
amado, la mancipo èro touto lèsto à vèire soun
ideau, ideau pas bèn dessina d'aiours, dins
lou proumié jouvènt à pau près que rescoun-
trarié. Lou viscomte de Bernat passè e la
mauno d'un sentimen cande e proumieren ié
tombè dóu cèu, emai aguèse rèn fa pèr acò,
Diéu saup !

Is innoucènt li man pleno.

Ço que se passavo autour de iéu èro curious,
bijarre meme. Agueto tresanavo, cantavo,
risié de tout et de rèn e me regardavo pèr fes
de galis pèr vèire sus moun mourre ço que
pensave de soun bon ami. Mai coumpreniéu
que la fàci d'esfins que m'ère facho la der-
routavo.

Pèr quant à Eu, l'ase cabanu, lou pasto-
mourtié ! en plaço d'escouta ço que ié disien
tant clar sènso parla, nous debanavo la ma-
lautié d'un de si chin qu'avié pensa de lou
pèrdre d'uno espèci de rasqueto. Urousamen
emé de siéupre...

Qu'un tron te cure emé ton siéupre !

Mai belèu jogavo la coumèdi davans li

parènt. Prepausère adounc d'ana vèire dins l'*isclo Agueto* ço que se passavo e li cambiamen que sa prouprietàri i' avié fa faire.

Aquelo isclo, grando coume un moucadou, èro un pichot paradis. Fourmado per d'aluvion èro fertilo à noun plus e lou printèms l'avié samenado de floureto que ié fasien un tapis moulan em' óudourous, de quant supériour i pus bèu de l'Ouriènt ! Lis aubre, que si pampo venien tout escas d'espeli, avien encaro aquéu toun verd clar tirant sus lou saure, que vous fai tant gau au mes de mai. E pièi, au mitan, tout engarlanda d'èurre e de vigno-fèro, se destouscavo un pavaionet ounte sarié 'sta brave de viéure à dous.

E dire qu'es aquéu long pelican que se dèu chala eici emé lou gent ciéune qu'es à moun caire ! Acò, jamai !

E pamens lou bonur èi ounte cadun lou crèi èstre. Agueto trovo M. de Bernat bèu, bon, uno meraviho de naturo ; belèu qu'un autre, même que vaudrié miés, farié pas tant soun afaire. E pièi, de que dre me mesclariéu d'acò ? Siéu un counfident e pas mai. Se pòu, après tout, qu'aquéu Nemrod fague un marit coume n'i 'a tant, que si mouié soun ni urouso ni malurouso. Mai lèi de Diéu ! Agueto s'amerito miés qu'acò.

Coume n'ère aqui de mi reflessioun m'aviserè que mi dou\$ coumpan èron en parlamen, asseta à quauco distànci sus un bancau panard. Pourgiguère l'auriho.

— Acò's pèr li lèbre mai pèr aganta li lapin....

Anen, es bèn ço que cresieu. Eici i'a pas li parènt pèr lou gëina. L'animau ! Lou vaquito, en plen mes de mai, asseta dins un païsage admirable em' uno bello fiho que ié vòu bèn, e ié parlo casso !

M'avansère, furious, em' uno envejo folo de manda — d'un cop de pèd en quauque endré — aquéu nèsci cassa li troucho au founs de Ciagno. Mai Agueto aurié pouscu trouba qu'acò sourtié de l'abitudo di counfidènt de tiatre e me retenguère.

— Bèn aro, ié diguère, se nous fasiés vesita lou Sant di Sant.

Sourtènt de soun jougne une pichoto clau goutico, Agueto nous durbiguè lou pavaioun. Ero uno salo carrado, emblanquesido emé de caussino. Sus li paret la fouletouno avié samena emé voio de croucadis e de caricaturo. Aviéu meme l'ounour de ié figura emé lou gàubi e l'atrencaduro de Dumanet. Dins un cantoun, uno viseto menavo sus la tèulisso que fourmavo badarèu. Em' acò tóuti li moble

ourdinàri dis ataié : divan , chivalet , taulo
cargado de boufigo de coulour , de terraieto ,
de pincèu , de flasquetoun . Pièi un pianò , de
curiousita ...

Lou soulèu trecoulavo adeja darrié la Baumo
de l'Ourse . Lou viscomte e iéu anerian faire
nosto reverènci i Tournaire e partiguerian
cadun de neste las .

En me sarrant la man Agueto aguè siuen
de me dire :

— A deman.



VI

Auriéu passa bèn voulountié à quaucun d'autre ço que m'esperavo l'endeman. Lis amourous — e subre-que-tout lis amourouso, — acò 's cacho-pesou. Avès bèle à-n-assaja de ié faire vèire li deco d'aquéu o d'aquelo que lis a enfada, perdès voste tèms e vous butas à-n-aquelo responso quàsi sublimo : « L'ame. »

Urous encaro quouro vous acuson pas de jalousié e fenisson pas pèr vous voulé mau.

Sabiéu proun que me fachariéu pas em' Agueto pèr ié dire moun avis ; mai ère segur que sarié peno degaiado. Me decidère pamens à ié servi ma pensado talo e qualo, à viha sus elo d'aqui qu'un bon matrimòni lis uniguèsse em' à leissa faire lou bon Diéu.

En arribant vers soun mas troubère tout en dès-e-vue. Misè Tournaire coulavo bugado e cadun saup que quouro li femo coulon bugado, lis ome an que de s'esbigna au pus lèu. Lou capitàni n'avié aprouficha pèr ana à Cano touca sa pensioune Agueto s'èro estremado dins soun isclo oute m'esperavo.

Entre m'ausi la souna dóu ribeirés me vengè querre emé la bèto.

— Restan deforo o s'anan dins lou pavaion?

— Intren, respoundeguè. Siéu en trin de pinta.

Erian pas dins l'ataié qu'adeja me demandavo :

— E bèn, coume lou troves?

— Iéu? Lou trove pas. Es tu que l'as des tousca.

— Anen, galejen pas.

E soun prim petoun piquè lou sòu despacientamen.

— Se pòu tuba eici? reprenguère sènso quita moun sant-plan.

— Eh! O.

— Alor, leisso-me bourra Titino e te dirai l'affaire.

Elo reprenguè sa plaço davans soun chivaletti e iéu m'assetèrè pròchi d'elo, sus lou divan..

— Ié siéu.

— Pas trop lèu.

— E bèn, m'amigo, bord que vos la verita, la veici: à moun goust toun fringaire es laid e bèsti.

De l'espantamen larguè sonn pincèu pèr lou sòu ; quitè sa paleto e, se revirant vers iéu, me regardè dins lis iue pèr vèire se ié disiéu pas acò pèr la faire pegina.

— Laid e bèsti ?

En se repetant aquéli mot à miejo voues se venguè asseta contro iéu sus lou divan pèr miés escouta mi resoun.

La vesènt à mand de ploura passère planet moun bras autour de sa taio, esperant d'adouci pèr aquéu biais tintourlejaire, lou coudoun que veniéu de ié larga sus l'estouma.

— Escouto, mignoto, es pas lou proumié cop que vèse d'amourous, lou siéu esta iéu meme souventifes, adounc sabe que tout çò que te vau dire es inutile. Mai, l'as bèn regarda toun viscomte ? As remarca soun péu rouge que lou fai retraire à-n-un destaragnadou ? As remarca sis iue treble e parpelejant ?

D'ourdinàri aquéli que soun dins la pousicioun d'Agueto trovon mejan de vira en bèuta tòuti li deco de l'óujèt escarri. I'a meme aquissus uno pourido tiero de vers dóu nouma Moulièro, un Franchimand qu'avié de talènt. (Fau dire qu'avié resta à Pezenas).

Cresiéu bèn qu'Agueto faguèsse coume lis à autri: mai coume m'alestissiéu à ié replica, me diguè soulamen:

— Que vos ? Es pas sa fauto s'es laid ?

Trop artisto pèr barra lis iue sus ço que ié fasiéu vèire em' uno certano brutalita vougudo, soun bon cor assajè de desencusa lou calignaire.

— Segur, rebriquère, es pas sa fauto s'èi laid mai es sa fauto s'èi bèsti. Saup parla que de chin e de fusieu, de chilet e de becasso.....

— Cadun parlo voulountous de ço que i' agrado lou mai. Papa charro sóudard ; mama meissoun o vendùmi ; tu meme barjes emé grand gau de pouesio e d'art.

— As resoun. Suidamen quand la cunversacioun touumbo sus l'art, toun paire e ta maire se ié podon mescla e iéu perèu me pode entrina à parla sóudard o vendùmi. Mai toun M. de Bernat, lèvo-lou de la casso, i' a plus degun. Aurié mies fa de pas tant cala de leco i passe- e d'un pau mai trabaia. Aro, sabes, siés aver-tido ; estúdio-lou bèn e se, mau-grat tout, te crèses d'estre urouso em'éu, ma bello, espousolo lou.

— Siés uno marrido lengo.

— Es verai que me targue pas d'avé forço carita crestiano pèr de tarnagas d'aquel merço.

— Enfin, a de qualita, n'en coundendas. Es brave pèr sa vièio maire. A sèmpre mena uno vido reguliero, a jamai agu des mestresso. Es pas coume tu, gusas.

— Iéu !

Restère nè. Aquéu téule que m'avié davalà bèn d'à-ploumb sus la tèsto, m'avié ensuà. Quau, tròni ! poudié bèn èstre lou nèsci qu'èro vengu counta 'cò eici ?

— O, tu, reprenguè. D'aiours, lis estudiant, sias tóuti li meme. Sias tóuti de fenat.

E coume anave proutesta :

— Digo-me un pau d'ounte vèn que dises *Titino* à-n-aquéu pudènt cachimbau ? Me soustendras qu'es pas en remembranço de quauco Justino, de quauco Agustino ?


Coume vesès, se la lougico es uno bello causo, es proun souvènt uno causo mai qu'entrechousso. Pamens Agueto diguè acò d'uno talo maniero que pousquère pas m'empacha de rire.

Se saup que neste crime mage is iue di chato, es d'avé des mestresso. An en ahiranço aquéli femo que li fan neglegi dis ome e que ié rau-bon quaucarèn à çò que dirien.

Tambèn, que chale quouro an descubert la *vostro* e que vous podon traire aqui-sus de galejado pico-pebre !

Que que n'en sigue, la counversacioun virado
ansin, aquelo entre-visto que redoutave tant
s'acabè jouiousamen. Agueto, pèr se destèndre
li nèr, me tirè d'aboundous pessu emé la lengo
e 'mé li det e au moumen d'ana soupa, elo
jougavo au pianò uno *Marcho Sóuyajo* de sa
fabricacioun enterin que iéu l'acoumpagnave
em' uno guitarro qu'aviéu troubado en un
armàri e que ié mancavo que siès cordo.





VII

D'aqueú moumen Agueto me parlè plus de M. de Bernat, mai trabaié—lou vesiéu proun sènso n'avé l'èr—à me racoumouda em' éu. Iéu, de moun las, afetave d'estre emé lou viscomte tant bèn que poussible. Tóuti li cop que se capitavian ensèn à la bastido di Tournaire jougave seriousamen moun role de porto-respèt; mai fau avoua que i' avié pas forço merite car, sèmpre lou meme, noste cassaire devié mouri dins l'impenitènci finalo. Inconscient de la paureto que lou belavo, avié jamai pèr elo ni un mot amistadous qu'aurié 'scampa sus aquéu cor abrama un blasin refrescaire e vivificant, ni meme aquéli pichots ounouramen que tout ome bèn aleva a pèr uno damisello.

I' avié de mes qu'acò duravo e vesiéu pas que rèn deguèsse lèu cambia la situacioun. Tambèn m'avisière que la drolo soufrissié vertadieramen emai n'en leissèsse rèn parèisse. Sa famiho la vesènt cade jour e, de mai, destourbado pèr sis óocupacioun e se doutant pas d'ou sentimen catiéu que cremavo soun sang, arremarcavo pas çò que soun mourroun langnaire disié que trop.

Pau-à-cha-pau vesiéu si gauto de velout tremuda soun rose agradiéu en uno coulour terrouso vo blavinello ; si vistoun, mai encre e mai founs que jamai, lusissien d'uno clarour malautivo e, mai que souvènt, la devinère que lis estremavo dins soun moucadou.

Avié pres en afecioun soun isclo ounte si gent anavon jamai e mounte, souleto, devié passa lis ouro a pantaieja. Dise devié, perqué davans iéu, trabaïavo afiscado à soun tablèu, en cacalejant em' uno gaieta que picavo à faus e me fasié mau.

Uno fes pièi, que mis afaire m'avien empacha quauqui jour d'ana au siéu, istère espaventa en la revesent ; n'en moustrère rèn ; mai la prenguère à la brasseto e s'anerian jaire au bord de la ribiero.

Durand picavo ferme amoundaut e, à travès dis aubras, nous trasié de rai saure et calou-

rènt; à nòsti pèd, sus un lié de sablo blanco e fino, uno aigo claro, tousco, que clapejavo, que fusavo, que virouiaavo, que semblavo d'or en fusioun i rode que lou soulèu la venié beisa e que, lisco coume un d'aquéli bèu mirau venician, nous leissavo vèire li troucho fouligaudio en casso de bestiouleto o en cerco d'amour.

E, tout en courrènt, la ribiero cascareleto demandavo i gau-galin: « Quau es aquelo tant poulido qu'entre-mitan de vautri repauso soun cors gracious? » E li gau-galin cascaiant si tèsto rouginello sus si pecou loungaru, respondien: « Aquelo tant poulido es nosto mestresso, nosto Agueto uno escarrido. Sis iue tant bèu semblon treboula. Las! Nosto segnouresso soufris e sabèn pas de que. »

Alor parlè l'agoulènço, la flour dis passioun puro e casto: « Perqué Agueto ansin tristejo, bèn lou sabe iéu. Gau-galin, mis ami, la bello es en peno d'amour. »

Sus lis alo de l'aureto nous arribèron li milo voues clarinello di flour dòu campas, di pin de la séuvo, dis aigo de la ribiero, dis erset de la mar, que tóuti alenavon à ma coumpagnio: « D'aut! Mignoto, courage! L'amour vèn de Diéu, l'amour meno à Diéu e quau amo, se reboulis, n'es pièi recoumpensa. »

Em'acò moun amigo pausavo sa tèsto sus moun espalo e troubavo crudèlo aquelo naturo ounte tout èro risoulet e cantadis entandóumens qu'elo, innoucènto, patissié ansin.

A-n-un moumen, coume la regardave pietadousamen, s'en avisè e me jité si bras au còu.

— Ah ! Charloun, Charloun, que siéu malurouso !

Iéu, pretouca, ié meteguère sus lou front un poutoun pur coume li que la Vierge Mario fasié à soun minoi ; un d'aquéli bais de crestian que gardan au founs de nostre pitre pèr n'en faire à l'oucasioun, l'oumorno flourido à li de nòsti semblable que, dins soun vòu sempiterne, a turta l'alo negrasso de l'ange dóu mau.

Urours aquéli que baion pas èsti poutouno soulamen emé li labro car Diéu éu même peso si douno dins l'archimbello majo e li comto double.


N'en fauguè pas mai : au touca de mi boucolis iue de la chatouno desboundèron ; un flot de lagremo raièron sus soun carage tristas e semblaivo qu'aquelo que li gau-galin recouneissen tout escas pèr sa segnouresso, semblaivo qu'aquelo flour subre-bello, Diéu vouguèsse faire un miracle en sa favour en ié traïsènt en plen jour l'eigagno matiniero.

Oh ! li lagremo ! soun — se pode dire ansin — li soupapo de sureta de noste èsse. Nous es- capon tre qu'uno joio o'no doulour trop grando soun à mand de desrenja l'équilibre de noste naturo, valènt-à-dire, de nous peri. Oh ! li lagremo, que purifiqueron Pèire lou renegaire e Madaleno la pecairis ! Oh ! li lagremo, qu'au Jardin dis Oulivo amansiguèron lou desfèci dòu Crist !

... Soun paure sen uno fes desgounfla, Agueto sarrè enca mai si bras entour de moun còu e, 'mé si labro caudo de fèbre, enca tremouleto d'un darrié senglut, me rendeguè loungamen moun poutoun coume pèr me dire : Gramaci.

Mai aquest même vèspre me décidère, dans l'intérêt même de moun amiguelo, à trahi lou secret que i'avié aproumes. Après n'avé charra emé mi gènt prenguère la resolucioun de dire l'endeman même i Tournaire qu'èron calu foro mesuro e que sarié tèms de s'avisa.





VIII

Nòsti bràvi vesin restèron estabousi à moun raconte. Avien pas li mémi resoun qu'Agueto pèr pas remarca lou ridicule dóu viscomte e soun age ié permetié plus de coumprendre pèr quete trassegún aquéu boufo-la-balo avié enclaus sa chato.

E renavo Misé Tournaire, tratant la drolo de pau-de-sèn, dóu tèms que lou capitàni, li moustacho esfoulissado, escupissié de marrìdi resoun à l'adrèisso de M^u de Bernat.

— Es pas tout acò, diguère à-n-un moumen que fasien pauseto, ço qu'es fa es fa. Ço que nous dèu ócupa aro es ço que nous soubro à faire dins l'aveni.

E de bout en bout, debanère moun plan : se voulien, tirariéu li verme dóu nas au noublíhoun pèr saupre se sarié dispousa à prendre

la paureto pèr femo e sa responso nous mous-trarié la draio à segui. Ah ! li pàuri viei ! Fasien pieta. Dire qu'à soun age avien douna dins aquelo reclauso ! Aurien pas degu lou coucha à cop de fourco, aquéu tirassaire de guèto, lou proumié cop qu'èro vengu ? Mai qu, diaussi, se sarié douta d'acò ?

E me gramaciavon de viha 'nsin sus soun enfant bèn-amado alor qu'éli, de quau èro lou devé mage, avien leissa, soutu sis iue, la mesquino resquiha sus aquelo cloto.

Valié bèn la peno de tant crida sus li tèule la sagesso e l'esperiènci di parènt !

Li leissant à si pensié mé dirigère vers l'iscleto coumtant pourta à ma cambarado l'ajudo de ma coumpagnié e de ma gaieta.

Travessave en pantaiant uno lèio d'agrou-fiounié quand me destressounèron de cacalas estoufa e de charradisso à la chut-chut que, me n'avisière, partien d'entre li pampo d'un dis aubre.

Se vesènt descuberto, Agueto e dos de sis amigo se boutèron à quila em' à me charpa... sènso desroumpre sa gousteto.

— Te vos enana, que ? Voulèn ges d'ome eici.

— Mi bello, acò vous passara proun emai mai.

— Té vè, Mieto, l'as ausi ? Dirien pas que li femo se podon pas passa d'éli. Que croio !

— Que lengo !

En disènt acò m'avansère vers éli mai li fouletouno m'agarriguèroun em' uno raisso de frucho.

— Vai-t'en, e lèu-lèu, qu'autramen t'en tires pas viéu.

— Oh ! un encian carpourau a pas pòu de tant pau causo.

— Pau causo, tres chato ! S'esclamè Zani em' endignacioun.

— Boudié ! Agueto cridè subran, nous vai vèire li boutèu.

Dou tèms que tóuti tres assajavon de se tapa jusqu'i pèd emé si coutihoun, iéu repoundeguère en m'avançant enca 'n pau :

— Ah ! As bèn fa de lou dire que ié pensave pas.

— Ié pensaves pas ? Vai counta 'cò à d'autro, vai. Siéu pas de Cagno (5), sabes.

— Cresès que ié tèngue tant qu'acò à vèire vòsti tibia ?

— Dirien que n'en valon pas la peno.

— Ma fisto ! Jusqu'à pus ample infourma...

Coume m'ère revira, rapport au vènt, pèr atuba ma pipò, li tres chatouno n'aproufichèron pèr sauta au sòu. Au proumié cop d'ieu Agueto me faguè gau. Lou mouvemen i 'avié tourna mes li rouito i gauto e soun mourrou n

avié 'n èr siau e galoi que i' aviéu plus vist
despièi long tèms.

— Sabes, me diguè, nous as fach uno escorno.

— Ieu ?

— O. As agu l'èr de dire qu'avian de cambo
en manche d'escoubo, de boutèu de gau. Acò
se dèu paga. La court d'amour se vai acampa
pèr te juja e te puni. Pos alesti ta defènso,
moun paure Charloun, qu'autramen siés fitru.
Zóu ! Mieto, Zani, la sesiho es duberto.

Mi juge femèu s'assetèron au pèd dòu
cerieisié et Mieto, la bloundo dis iue verdau,
faguè lou requisitòri, un requisitòri tout ensèn
court e clar comme aquéu d'un counsèu de
guerro.

— Midamisello. Crese pas necite de vous
repeta l'óufènso que vèn de nous faire l'acusa
e qu'avès encaro à la memòri. A agu lou front
de sousteni tout-escas que tenié pas à vèire
nòsti tibia — valènt-à-dire nòsti boutèu —
aguènt l'èr de li pas trouba digne di regard
d'un ome de goust. A meme afourti que l'idèio
de lis espincha tras di fueio i'ero pas ven-
gudo, ço qu'es evidentamen uno messorgo
capitalo. Acuse adounc, Moussu Charle Maset,
eici presènt, d'avé menti e de nous avé insul-
tado dins la persouno de nòsti boutèu e reque-
risse contro éu la peno ourdinàri d'aquéli crime.

— Acusa, me demandè la presidènto, qu'avès à dire pèr vosto defènso ?

— *Primò* : ai pas menti. Sounjave pas ver-tadieramen, à regarda vòsti cambeto, Midamisello, e acò's justamen la soulo causo que me reproche. M'arribara pas plus. — *Secundò* : recounèisse lou mot tibia, mai avès pas, belèu, la pretencioun de n'en ges avé de tibia ? — *Tertiò* : Siéu l'est à counfessa qu'ai agu tort de pas teni à vèire li boutèu subre-di ; mai pèr acò fau que me prouvés, pèr bono provo irrecusablo, qu'èron digne de mis iue. Demande adounc à Madamisello la Presidènto em'à la Court la prouducioun di pèço à counvicioun.

Moun élouquènci serviguè de rèn. Lou tribunau, après avé discuta'n moumenet, rendeguè l'arrèst que veici :

« Atendu qu'es à M. Maset à prouva çò qu'a avança, valènt-à-dire qu'èro pas segur que li boutèu de Midamisello Zani Loumbard, Mieto Laubaredo e Agueto Tournaire siguesson fa segound tóuti li règlo de l'estetico e qu'es pas à la Court à faire la provo dóu countràri ;

« Atendu qu'acò 's ni mai ni mens que de difamacioun ;

« La Court refuso à l'acusa la prouducioun

di pèço à counvicioun qu'a demandado e lou coundano à-n-escala sus l'agroufiounié qu'a-paro lou tribunau dóu soulèu, pèr jita i damisello que lou coumpauso, de frucho d'aqui que digon sebo. »

Ansin siguè fa. Li tres mancipo aloungado sus la tepo, countunièron de me galeja tout en becant li grun vermeiau que ié fasiéu davala sus en plueio goustouso. Agueto subre tout, emé soun esperit enrabia, me n'en largavo de tóuti li coulour. Acò venié pièi en òdi. Aguènt jamai agu uno passioun pèr la ginastico m'enfetavo de sauta de broco en broco coume un esquiròu e m'anave enfin asseta sus uno fourco au risco de me maca l'os-bertrand quand me venguè uno idèio.

Li bello, rapport à la caud, avien entre-durbi si vèsto e iéu, de ma plaço, vesiéu entre si poussetto redouno e boulegarello, tres valengo i rebat blanquinèu. La bloundo Mieto, aquelo qu'avié fa lou menistèri publi, se capitavo tout-bèu-just souto iéu. Cerquère bèn à l'oumbro un agroufioun que lou soulèu aguèsse pas caufa, e, zóu dins la valounado.

— Boudiéu ! Mai qu'es acò ?

L'avoucato generalo s'aubourè d'un bound. L'agroufioun jala regoulant dins soun jougne,


fasié trampela sa carneto cremado de la calour de Jun.

Siguè pièi lou tour d'Agueto e de Zani. Espavourdido, sachènt plus ço qu'èro ni d'ounte venié, se dounèroun pau que siguèsse de toro qu'auriéu fa toumba en gangassant li branco e s'enanèron en courrènt darrié 'no sebisso se leva acò tant fre.

Pecaire ! Se doutavon pas que iéu, dóu aut de moun ajoucadou, vesiéu pèr dessus la sebisso. Un cop li vèsto levado e li courset descourdela, vous lèisse à pensa, ami legèire, li belli causo que m'apareiguèron. Jougave lou pastre Pàris, mai en plaço de douna de poumo, n'en regardave e vous assegure bèn que lis auriéu moussigado voulountié un brisoun.

Mai quand li piéuceleto aguèron destousca l'óujèt de soun esfrai, la causo se gastè pèr iéu. Aqueste cop siguè plus questioun de me juja mai bèn de m'aqueira.⁽⁶⁾





IX

Ai sèmple agu pèr principe d'eisecuta au pus lèu ço qu'ai à faire. Tambèn auriéu vougu ana counfessa M. de Bernat lou jour meme; mai coume rescountra aquéu diable d'ome qu'èro toujour pertout foro au siéu ? Ço qu'aviéu de mies à faire èro d'espera que venguèsse d'esperéu au mas di Tournaire.

Me remembrant dóu cambiamen proudu dins Agueto pèr la presènci de Zani e de Mieto, aviéu counseia au capitàni de counvida li dos jouvènto à passa 'no semanado em' elo. De moun caire, coumtant vèire parèisse lou viscomte d'un moumen à l'autre, fasiéu de longo partido de la bando folo, coume nous disien emé resoun.

Moun prejit semblavo devé reüssi. Agueto èro tourna vengudo risouleto e si gai cacalas fasient restounti tournamai lis écò de soun isclo. Ah ! soun isclo ! Es aqui que se n'en faguè un de chereverin dins aquelo benurouso semano ! Se la bèto nous jité pas au founs de l'aigo, se lou pianò venguè pas mut fauto de cordo, es pas nosto fauto, de tout segur.

Or, un tantost que batian l'antifo, Zani que courrié davans, dispareiguè dins un trau d'un bertas en cridant :

— Oh ! la pourido touno !

En efèt li petelin e li roumias fourmavon un tendoulet vèrd e prefuma ounte aguerian lèu fa de s'estalouira.

— Iéu, diguè Mieto, boulegue plus d'eici d'aqui que lou soulèu se sigue estrema. Qunto caud, bèu bon Diéu !

— Es verai, i a de que se couire tout viéu, ajustè Zani. Tè, regardas Agueto ; es roujo coume un chambre que sorton de la pignato.

Coume m'aubourave pèr coupa i chatouno de bleto d'amourié en guiso de ventau, veguère eila, dins la plano, lou viscomte que s'avansavo de nàutri. Mieto e Zani l'avien pas pouscu vèire de si plaço ; mai n'èro pas de même d'Agueto e m'espliquère perqu'ecesto èro roujo coume un chambre que sorton de la pignato.

— Vé, aquelo tousco es un tèmple de l'Amour, reprenguè Zani que, roumanesco à noun plus, pantaiavo que d'idilo à l'antico. Ié manco qu'uno estatuio de Vènus.

— Basto ! Ié repliquère courtesamen, siés proun bello pèr la remplaça. Se vos, te vau ana querre aperaquito uno pampo de vigno...

Ah ! preisèmple, vole bèn ; mai à coundicioun que tu me faras pendènt. Te baiaren un arc, te taparen lis iue em'un moucadou e saras Cupidoun.

— E nàni, lou vaqui Cupidoun en persouno, s'escridè Zani que se troussavo dóu rire en nous moustrant M^a de Bernat que venié d'aperçuvre à soun tour.

Lou paure garçoun avié un tant drole de biais que tòuti esclafiguerian lou rire. Lou soulèu, qu'èro adeja bas, estampavo en negre sus l'esparsèt l'oumbrino primo e cambarudo dóu cassairot que s'aloungavo, s'aloungavo à plus feni. Si gràndi guèito bruto de fango, sa vèsto courto de velout pissous, si braio antan negro, vuei verdejant au davans di cueisso, au quiéu em'i geinoui ounte fasien dos gibo, soun casco de siéure que lou drap blanc n'èro vengu de tòuti li coulour, e, sobre-que-tout soun péu, aquéu famous péu rouge qu'avié pas agu lou tèms de faire coupa rapport en de passage

d'aucèu, tout acò fasié un ensèmble que vous n'en dise pas mai.

Co que m'espantè es qu'Agueto risié tout coume nautre. Es que d'asard elo tambèn lou troubarié ridicule ? S'aquoto èro pamens, sarien sauva. Mai qu saup se vòupas soulamen empacha si cambarado de destria lou verai ?

E sèmpre Mieto de galeja :

— Mi bello, disié, s'es acò l'Amour, me fau mounge.

— Ah ! vai, te fas mourgo. N'en parles toujour e siés toujour aqui, rebequè Agueto. Te faras mourgo au couvènt de Sant-Deidié ounte i'a quatre sabato souto cade lié.

— Ah ! lou couvènt, souspirè Mieto, es justamen çò que me fai cala. Auriéu proun la voucacioun, vé, siguèsse pas lou couvènt.

Sus aquelo fausso naïveta, iéu, qu'aviéu moun plan, sounère lou cassaire sènsò avé l'èr d'arremarca la figuro inquieto d'Agueto. Eu se faguè pas prega ; levè li cartoucho de soun fusiéu e, après avé saluda li damisello, prenguè plaço emé nàutri. Alor, zóu ! de nous racounta sa cassa de la journado, li cambado folo qu'avié facho, uno vièio lèbre que i'avié escapa empourtant dos cargo de 6...

Per malur m'ère asseta contro aquelo bono lengo de Zani qu'avié l'especialita de vous dire

à miejo voues, e'mé soun plus grand serious, de droularié sus li gènt emé quau erias, mai de droularié à vous faire pete d'ou rire. Jujas un pau la peno qu'avié à me counteni quouro me detaiavo emé de mot à l'emporto-pèço, tóuti li graci, tóuti li bèuta d'ou viscomte.

Fatiga d'acò e aguènt pòu d'un escaufèstre, clavère sesiho. Mu de Bernat nous faguè coumpagno e, un cop li tres chato ramenado à la bastido, tout en caminant dins lou calabrun, aguère lesi de m'assaventa de ço que vouliéu.

— Ben ! coumencère, vous dison rèn, viscomte, aquéli tres perdigau que venèn que quita ? Vous agradarié pas de n'en cassa quaucun ?

— Bò ! vous dirai que ieu lou femelan me fara jamai faire de coufo. Ma maire voudrié proun me marida, mai pèr acò me faudrié roumpre mis abitudo, cambia ma vido, renuncia à mi goust, basto ! veni esclau. Veirai plus tard. Pèr aro siéu bèn coume siéu e lèisse courre. D'uni que i'a me trataran de goustosoulet, mai m'en trufe.



X

Aquelo responso qu'aurié degu m'estre un segren bord que deviè faire soufri moun amigo, me siguè au countràri agradivo qu'es pas de dire. Dóu tèms que lou viscomte parlavo sentieu un regounfle de joio faire boumbeja moun cor. Avié faugu acò pèr me faire vèire clar en iéu même e me faire coumprendre que l'amista frairenalo que nous avié liga jusco alor em' Agueto s'ero tremudado — au mens de moun coustat — en un sentimen belèu autant pur e segur mai dous. I'avié pas à dire de noun : ère amourous de la mignoto.

Adounc, la niue venènto, dourmiguère pas gaire. Jusco a l'aubo faguère que virouia dins moun lié, remenant lou secrèt que veniéu de destria en iéu e tirant de plan. Tout eviha, vesíeu Agueto me fantaumeja davans emé

soun péu negre e si grands iue sol e linde, e ié semoundiéu tout ensèn moun cor e ma vido.

Mai, las! Aquéli bèu pantai èron, semblavo, destina à faire chi. Que la paureto, rebutado, estremèsse soun amour malurous dins lou tre-founs de soun senet e se barrèsse lou cor, acò poudrié èstre ; mai que, tout d'un cop, se boutèsse à me rèndre l'afecioun qu'avié pèr elo, èro çò que cresíeu pas. A mens que n'en faguèsse lou semblant pèr se venja dóu desden d'aquéu cassaire d'esprèssi.

Mai, coume arribo toujour à-n-aquéli que soun la proio d'aquéu sentimen divin que fai lou founs de nosto religioun, au mai vesieu d'entravadis davans iéu, au mai me sentiéu enfioca em'afisca.

Tambèn quouro, au matin, me levère emé lis iue maca d'aquelo niue blanco, moun biais d'agi èro arresta : me falié d'abord apprendre à-n-Agueto li dispousicioun de M. de Bernat, pièi ié leva l'amour qu'avié pèr éu e lou rem-plaça pèr un autre à moun proufié.

Se deviéu reüssi èro à l'endevenidou de me lou dire.

Sèmblo pas coume me siguè deficile d'en-trina la causo.

Tant que Mieto e Zani siguèron aqui, ié pensère pas car vouliéu pas qu'aquéli dos

dessenado siguesson au courènt de *noste* secrèt. E d'aiours, lou mejan de parla serioussamen davans éli que galejavon de longo, se remandant lou cassairot coume uno paumo e i' espoussant lis arno à cop de lengo qu'èro uno benédictioun de Diéu ? Lou mies èro de laissa ma caro Agueto jouï de sa soucieta tant galoio jusco au terme fissa.

Enfin, la semano acabado e li dos mancipo partido, prenguère moun courage à dos man. Lou capitâni, quand ié diguère que lou viscomte se voulié pas marida, m'embrassè en plourant de bonur. Crese que se M. de Bernat èro esta aqui l'aurié embrassa peréu.

— Agueto es dins soun isclo, me diguè ; vai la trouba e fai-ié avala la causo de toun mies. Diéu fague qu'acò vire pas mau !

Mai enterin que caminave, moun pies fasié tres-tres. M'èro grèu de pensa qu'anave faire trena aquelo qu'auriéu douna ma vido pèr i' espragna l'enuei lou pus mistoulin. L'envejo me prenié de remetre à l'endeman, mai soun-gèr que i' avié pas mai de resoun de lou faire deman pulèu que vuei e que lou meiour èro de jita 'quéu fais au sòu lou pus lèu que poudriéu.

M'avansant dounc de la ribo, cridère Agueto à l'acoustumado, pèr que me venguèsse querre

emé la bèto. Agueto ni respoundeguè ni venguè. Cresènt que belèu la calour la fasié peneca e que m'avié pas ausi, la sounère tournamai de tóuti mi forço. Tournamai l'ecò soulet me respoustè.

Se pòu pas dire ço que se passè alor en iéu. Uno angouisso mourtalo me trafiguè l'amo. Se Agueto èro pas dins l'isco coume vai que ié vesieu la bèto estacado à sa plaço ourdinàri ? Sènso perdre tèms courreguère cerca à quauqui cènt mèstro la ratamalo dóu gardo e, remant pèd sus banc, sautère lèu à moun tour dins l'iscleto.

Lis espantamen que venieu d'avé èron rèn au regard d'aquéli que m'esperavon dins l'ataié. Quau vous a pas di que sus lou divan troubère tout in dès-e-vue li abihage de la chatouno, raubo, courset seden, debas, camiso broudado e braieto endentelado.

Siguè pèr iéu un d'aquéli cas que perdès la tremountano. Veguère tout d'un tèms ma bello Agueto liéurado à nouvèu à si pensamen tristas despièi la partènço de Zani e Mieto, la veguère, maucourado e plourarello, que, devinant lou mesprés de soun calignaire *in partibus*, se decidavo à quita la vido, aquelo vido qu'avié idèio de ié rèndre tant douço e tant urouso ; la veguère se traire à l'aigo e, coume fòu, me precepitère deforo...

Mai à peno sus lou lindau un crid m'escapè.
Agueto èro davans iéu e soun atrencaduro
m'esplicavo lou mistèri. M'esperant pas tant
lèu s'ero bèn jitado à l'aigo, o, mai pèr prendre
un ban e 'mé la calour que fasié, acò se coum-
prenié de rèsto.

Mouqueto d'être suspresso pèr un ome dins
aqueil estat, sabié plus que faire ni que dire, e
iéu, encaro tout treboula, istave mut, barrant
la porto de moun cors e me chalant à-n-amira
aqueilo aivesso que m'apareissié coume dóu
tèms dóu vièi Oumèro.

Divesso, o, l'ero. Soun maiòu-làni fin, raia
de rouge e de blanc, pareissié se coumplaire à
dessina sis espalo redounello, si sen qu'avien
pas pòu de regarda lou cèu, sa taio primo e
souplò coume un vise e sis anco qu'aurias di
avé pres soun gàubi à la liro d'Apouloun.
Soun còu, ounte floutejavou li négri trachèu
de sa cabeladuro, soustenié sa bello tèsto em'-
autant de graci que de fierta ; si petoun blanc
e mignot coume li d'un enfantoun, dispareis-
sien à mita dins li flour de la tepo. Es sus tout
aquéu cors adourable l'aigo de la ribiero
courrié en renguiero de diamant, long dóu
buste, di bras e di cambo, metènt de perlo
trelusènto e flamejanto au bout dis auriho, di
det em'i mameloun di pousso. De mai, lou

soulèu la turtant pèr endré, la fasié retraire à-n-un d'aquéli bèu brounze flourentin que li relèu n'en soun freta d'or.

Divesso, o, l'ero car semblavo Vènus, la maire de l'Amour, lou jour que neissè sus lou dougan de l'Iounio, d'un poutoun dòu soulèu à la mar azurenco.

... E'iéu, nè, palafica, la regardave.

— Bèn, veguen, se me leissaves passa.

Un cop abihado, me sounè. L'espliquère qu'en vesènt sis abihage ansin en desordre aviéu agu pòu d'un malur, senso saupre quau, me dounant bèn gardo de ié dire l'idèio qu'a-viéu agudo que se siguèsse suicidado.

L'esplicacioun l'accountentè, mai me recoumandè de plus m'esfraia pèr de parpello d'agasso e de plus l'espousa à-n-un plevèsi en la fasènt *pausa* uno ouro trempo coume un anedoun.

— Erès tant bello !

E mau-grat sa defènso ié faguère un parèu de poutoun que me paguè em'un moustas large coume un pan de municioun.



X I

Es facile de s'imagina çò que se passè en
iéu quouro aguère ansin devina aquelo qu'a-
mave emé gaire mai que sa bèuta pèr vesti-
duro. Oublidère de-planto lou viscomte e la
coumunicacioun que deviéu faire à-n-Agueto ;
passerian esto journado — e pas mau d'autro —
à barqueja, courre-bourrido e sobre-que-tout
barjaca.

Aviéu coumpres qu'en despié de la blessa-
duro facho à sa pudour, l'amiracioun qu'aviéu
moustrado pèr si charme fasié grand gau à la
bello e que veniéu adeja de prendre à M. de
Bernat un de si pus bèus atout.

Quand me remembrère enfin moun prejit

d'espousa à ma cambarado lis idèio anti-matrimounialo d'eiceste, l'abandounère. Agueto me parlavo plus dóu fringaire, me leissavo me n'en trufa e n'en risié. Ieu, seguissènt tout acò em' un interèst qu'es facile de coumprendre. me semblavo que brulave de la toco e leissère courre. D'aiours, un evenimen qu'esperave pas venguè à moun ajudo.

Despièi aquéu jour famous que la beluguelo m'avié fourça pèr si lagremo d'encavauba un bestiàri mountavian souvènt, elo vestido d'uno *amazonuno* courto leissant passa lou bout de sa pichoto boto vernissado e couifado d'un grand capèu de féutre à la Louvis XIII que ié dounavo un pau l'èr de la Grando Madamisello ; ieu — que la crento m'avié passa — emé de belli braio que m'anavon pinta e d'abrivau nikela que lampejavon au soulèu.

Agueto ametié pas d'aluro mens rapido que lou trot.

« Se mounte à chivau, disié, es pèr ana vite. Ame tant camina d'à-pèd qu'au pas d'uno mounturo. » Coumprendrès dounc que li bèsti dóu capitàni presavon pas coume aurien degu l'ounour que ié fasian en ié fisènt nòsti persouno.

Un dimenche matin avian decida d'ana à Nosto Damo de Vau-Cluso (⁷) que se ié fasié

lou roumavage. Fasié pa'n péu d'aire ; sus lou grand camin blanc d'uno pousso que li càrri, li chin, li chivau e li gent nous mandavon i narro em'uno aboundànci à desespera, lou soulèu èro coume au siéu.

Subran Agueto faguè : « Té ! Un soudard. » Quau siguè pas noste espantamen, quand lou troupié siguè pus pròchi, de recounèisse en éu M. de Bernat ! Vaqui dounc ço que nous avié desbarrassa d'éu despièi quauque tems ! Lou darrié nistoun d'En Dragounet de Bernat que, à la primo crousado, se bateguè emé Tancredi rapport à la principauta de Tiberiado, se moustravo à nautri souto l'abi dis infiermié militari !

En nous aperçuvènt, s'avansè de nautri e nous faguè un salut qu'un poumpié n'aurié agu vergougno. Nous racountè que sa qualita de fiéu de véuso l'eisentant soulamen dòu service atiéu, èro en trin de faire si vinto-vue jour à Niço e qu'avié aprouficha uno permessiou de vinto-quatre ouro pèr veni tuia quauqui quiéu blanc.

Diéu saup coume l'escoutavian ! La peno qu'avian pèr pas esclafi lou rire nous n'en levavo lou goust e la poussibileta.

Certo, li *blu*, se 'n cop arribon au regimen, an tòuti mai o mens l'èr de singe arnesca. Li *vinto-vue-jour*, acò se saup, an encaro pus

marrit biais que li *blu*; e bèn, lou viscomte marcavo enca pus mau que lis àutri reservisto.

Li capitàni fan ges de frèrs pèr aquelo meno de sóudard e ié passon tóuti li bourdiho de si magasin. Tambèn neste mesquin avié uno capoto ounte sarien esta dous coume éu, flou-tejanto, fasènt de ple e propro coume un bastoun de galinié, emé de mancho que tapavon li man; si braio, pèr contro, ié restavon tres det pus aut que la caviho, leissant vèire li debas que li jougnien en de *godihot*, oh! quéti godihot! A cade pas fasien flouc! flouc! de tant qu'èron trop grand. Enfin, soutu un kèpi estrechoun, à la plaço de sa como roujo rasado d'ourdounanço, un cran de cinouce-falo. Ajustas-ié li boutoun d'estam pas astica e un centuroun qu'avié pas vist la ciro despièi dès an...

Enfin nous larguè. Agueto alor, n'aguènt lou poudé, se boutè à rire, mai à rire à plus s'arresta. Adusènt moun chivau bèn contro lou siéu, ié diguère :

- E bèn, coume l'atroves toun galant?
- Hi! Hi! Me n'en parles pas, vé. Falié que siguèsse folo. Pauro de iéu?
- Pamens, se lou vos?... N'ai parla à ti gènt, te lou dounaran.
- Tas-te, charraire.

— Enfin, saras Madamo la viscoumtesso...

Enerviado pèr mi galejado me pessuguè jusco au sang ; mai iéu tresanave e la doulour me semblè mai douço que melico. « Ah ! t'a passa toun caprice, me disiéu, ah ! toun cor es libre aro ; espèro, anan avisa. »

Entre arriba à Vau-Cluso anerian establa vers un de mis ami qu'avié 'no bastido aqui toucant e davalerien à la glèiso ounete cantavon messo. Ero poulit aquelo capeleto tapissado d'ès-voto, de crosso, de pichot bastimen, de fusiéu peta, de cor argentau e coumoulo de gent que salmoudiauvon uno coumplancho de l'encian tèms.

Un cop l'óufice acaba tout acò s'enanè souto lis óume e li platano en cantant, en cacalejant en siblant, en risènt, em' un d'aquéli chamatan de pople gai e trefouli. Li vièi matre anavon à grand dèstre querre li viéure i carreto que s'arrengueiravon au bord dóu degoulòu, à perdo de visto, amount vers li Quatre-Camin ; li vièio cercavon la plaço de la taulado à l'oumbrinello, sourtien di cabas li paqueton de saucisso, lis aiet, li pebroun, que sabe iéu ? Jouvènt e jouvènto s'esbignavon dins li faisso per ana culi de frucho — disien pas qu'èro subre-tout¹ la frucho d'amour que ié fasié liguetto.

Nautre, qu'avian tambèn lou ruscle, anerian lèu dejuna encò de moun ami e'iceste nous rendeguè nosto liberta i proumié tu-tu-panpan di tambourinaire que nous sounavon au bal.

La salo verdo, aigado coume se dèu, èro adeja pleno de parèu virant, tournant, sautant; lèu-lèu Agueto estroupè sa raubo e partiguerian enliassa, coume dous fòu.

Lou grand èr qu'avian begu despièi lou dematin, lou mouvemen dóu chivau, la dinado que venian de faire emé lou vin de Gaudio ⁽⁸⁾ que venian de chourla, avien que trop bèn dispousa ma balarello. Après dous tour de valso, coutè sa tèsto contro iéu, leissant si vistoun vanega amount dins la ramo dis aubras ounte lou soulèu penjavo de louvidor entre-mitan di fueio. Sentiéu soun sen batre emé forço contro lou miéu e souventifes, dins un viravòut rapide que fasian pèr evita un couple de maladré, quàuquis un de si péu, escapa di treno, venien floureja ma caro, e alor me venié uno envejo folo de desnousa' quelo como sedouso e de mordre à meme. Mi dènt avien l'enterigo coume s'aviéu mastega un citroun.


— Siés fatigado ! Vos t'arresta ?

— Oh ! nàni, nàni. Encaro ! Encaro !

Quand li tambourin caleron, Agueto m'istè
dins li bras, barbelanto e pleno d'espaime. Me
fauguè à pau près la pourta pèr l'assetasus
un bancau.

Encaro quauqui sesiho ansin e daverariéu la
joio.





XII

M'ère engana en me cresènt de rauba tant
facilamen lou cor de ma cambarado e lou
vesiéu proun. Noun qu'aguèsse adeja rem-
plaça soun viscomte pèr un autre que iéu,
mai pèr uno resoun en quau m'esperave pas.
Abituado à me counsidera coume un coum-
pan, coume un fraire — se pòu dire, — l'idèio
ié venié pas que pousquèsse èstre soun marit.

Pèr elo, ère Charle, valènt-à-dire un èsse
d'uno meno à despart, qu'èro ni ome, ni femo,
ni meme auvergnat ; mai un bon sòci que
l'amusavo e ié tenié coumpagno dins aquelo
terro ounte lis amusamenèron pas à regounfle.
Un jour qu'en fasènt mino de galeja, ié de-

mandave sa man, mandè au cèu uno bello fusado de rire.

— Tu ? faguè, e se vesié qu'acò ié semblavo bizarre à noun plus. Aurié belèu trouba mai naturau que me faguèsse mounge.

Dins de coundicioun pariero ère pas mai avança qu'à ma sourtido d'ou regimen e lou proumié vengu me poudié sega l'erbo souto lou pèd. Tambèn avié uno bravo pòu de rescountra un jour au siéu quauque prenènt que me levarié de cassolo. Car, enfin, tóuti li jouvènt èron pas laid, nèsci e risible coume M. de Bernat.

En efèt, un jour lou capitàni m'en présentè un — que couneissiéu d'aiours proun de visto e d'ausi dire. — M. Brassà, coume ié disien, èro vengu, i avié à pau près un an, representa la *Soucieta financiero di Terraire d'ou Mie-jour francés*. Desempièi aquéu tèms croumpavo de prouprieta, n'en revendié, jitavo d'oustau au sòu pèr n'en basti d'autre, fasié de grand camin dins li colo ; pagavo tin-tin, quauqui fes, e prenié à crèdi la majo part d'ou tèms.

Basto ! Ero un d'aquéli manejaire d'afaire que soun toumba sus noste bèu païs coume un vòu de courpatas crebant d'ou ruscle e que nous l'aurien gasta de planto s'aguessian pas

agu l'ur que piquèsson dóu quiéu tòutis à-de-rèng.

M. Brassà èro un ome d'un trentenau d'an, grand, un pau fort, emé d'ieu blu e lou péu bloundin. Ero, se poudié dire, un bèu mascle ; mai i'avié dins soun regard quicon de faus que sentié soun Tartufo d'uno lègo e si brego minço, palinello, moustravon que devié pas falé grand causo pèr lou bouta en iro.

Quand, sa vesito acabado, s'adraiè vers Capito⁽⁹⁾ ounte restavo, iéu prenguère uno grando resoulicioun e coume M. Tournaire me disié en counfidènci que l'autre èro vengu pèr Agueto, ié respoundeguère eiçò :

— Se fai tèms que parle qu'un pau mai sarié trop tard. Qu'avès besoun d'aquéu Brassà que degun counèis e qu'a dins lou païs proun marrit renoun ? Anas cerca bèn liuen çò qu'avès bèn pròchi.

Atupi, lou capitàni m'escoutavo en fasènt de fum, sènso avé l'èr de me coumprendre.

— Coume ! reprenguère, avès panca devina qu'ame Agueto de tòuti li forço de moun amo e que ma desiranço majouralo es de n'en faire ma mouié ? Ai trop jouga emé lou fiò e me siéu rima. Bord que li circounstànci me forçon d'ana vite, vous demande la man de vosto chato. Me couneissès, sabès çò qu'ai e çò qu'aurai...

Lou brave ome prenguè moun bras e, amis-tadousamen :

— Gros tarnagas, vai ! Es tu, au countràri, que vesiés pas que demandavian pas mies que de t'avé pèr bèu-fieu. Que noun parlaves ? Coumprènes bèn que poudian pas te jita Agueto dins li bras. Ah ! I' a proun tèms que la causo es entendudo emé ta famiho, vai. Man-cavo que vosto cousandido e aro que l'avèn...

— Escusas se vous cope. Avès la miéuno mai pas aquelo de nosto amado.

E espliquère à mon futur sogre coume Agueto avié pèr ieu qu'un sentimen frairenau e troubavo risiblo l'idèio que i' avié sou-messo un cop que venguèsse ma femo. Lou capitàni aubourè lis espalo en disènt :

— Enfant, vai ! Se la pichoto vèi qu'es seriousmen que te presèntes, se vèi que t'aceitan e que tout acò n'es pas de galejado virara lèu au vènt que fau.

— O, lou sabe. Pamens, coume vole pas que l'amour qu'aura pèr ieu vèngue d'autro causo que de ieu meme ni que me prèngue pèr vous oubéi alor que soun cor bacellarié pèr un autre, — ço que poudrié faire neste malur en touti dous, — ié demandèrai sa man à-n-elo memo e soulamen quouro aurai reüssi à me faire ama d'elo ansin que l'entènde.

— Vaqui bèn uno idèio de pouèto ?

— Eh ! Es que se pòu pas èstre pouèto au moumen que pensas à counsacra vosto vido entiero à-n-uno bello qu'amás ? Vous cresés que se maridarian s'erian de l'avejaire d'aquéu miserable que diguè que lou matrimòni es la proso de l'amour ?

— Ah ! me vas faire de teourié ? Vè, anen soupa qu'es l'ouro ; me debanaras aquoto à la dessèrto.

— Ah ! nàni, preisèmple ! que i'aura Agueto e vole pas que se doute de çò que vène de vous fisa.

Tout lou tèms dóu repas M. Tournaire se moustrè fouligaud — çò que i' arribavo pas souvènt — bèn tant que li donó coumpren-gueron que i' aviè entre naute quauque se-crèt. Assajèron de bado de nous lou tira e Agueto, en me menaçant de soun detoun, me diguè au moumen que partiéu :

— Es poulit, à toun age, de desavia papa, un dragoun !


Paure Brassà ! Ero court emai coustié !

Me tardavo que lou i'aprenguèsson car ié vouliéu mau d'avé tant soulamen pensa à-n-aquelo que desirave. Me chalave rèn que de me representa sa tèsto quand lou mandarien rascla de bouto.

L'asard faguè justamen que me capitère encò di Tournaire lou jour que venguè faire sa demando óuficialo. Quand sourtiguè dóu gabinet dóu capitàni, soun mourre treboula moustravo proun la ràbi fèro qu'avié d'aquelo rebutado.

Me veguè just davans éu que n'en tubave uno ; nóstis iue se crouseroun e soun regard furoun destrìè, parèis, dins lou miéu, la joio dóu trioufle. Coumprenguè qu'ère iéu l'encauso de ço que i'arribavo e, d'aquéu jour, siguerian de nemi mourtau.





XIII

Que sigués furious de ço qu'un autre vous
vèn leva soutu lou nas la damisello qu'amas ;
que cerqués à vous venja d'éu — emai noun
siègue crestian — se coumpren de rèsto ; mai
que dins vosto couléro, anés jusco à-n-ataca
la chato elo même dins ço qu'a de mai pre-
cious, de mai sacra, valènt-à-dire soun ou-
nour, acò 's lou propre d'un capoun.

Es pamens ço que faguè M. Brassà. Ah !
m'ère pas engana en legissènt à primo visto
sus sa caro lou marridige e la fausseta !

Quàuqui jour après la scèno que vène de
racounta me revenguèron de diferènt caire de
paraulo peginouso e mal-ounèsto prounoun-
ciado pèr éu sus lou comte d'Agueto e sus lou
miéu. Coumentavo à sa façoun nòsti courso à
chivau e nòsti barquejado, assajant de faire

encreire qu'èro éu qu'avié rebuta la chato en aprenènt certàni causo que disié pas mai que leissavo supausa.

Ma proumièro idèio siguè de coure vers aquéu fenat e de ié demanda resoun. L'aguèsse tengu sus lou moumen, aurié passa un marrit quart d'ouro, es iéu que vous l'afourtisse.

Pièi reflechiguère : erian trop couneigu dins l'enviroun pèr qu'aquéli calounnio prenguès-son e ço que lou moustravo bèn, èro l'endignacioun qu'eicitavon en tóuti li gènt de l'avesinanço. E pièi Agueto ignouravo tout acò e faire ço qu'avié pensa èro ié faire nifla tout aquéu racun, ié causa uno peno grèvo que m'ero bèn facile de i' espragna en disènt rèn. Mies valié dounc leissa passa eiçò sènsos n'enchaunta, crento de ié douna uro impourtanço qu'avié pas.

Es dins aquéli dispousicioun qu'un matin fasiéu pauseto em' Agueto dóu caire de Sant Cassian⁽¹⁰⁾. Avian estaca li chivau à-n-un roure e, alounga à la sousto d'un bertas, escoutavian lou Vènt-Terrau que fasié crussi li branco, voulastreja li fueio e pèr fes, toumba à grand brud uno raisso d'aglan o quauco pigno que s'espétavo au sòu. Alin, dins lou Góu de la Napoulo, la mar moutou-nejavo, batènt lou baus de la Figareto de sis

erso descabestrado que si respousc, alumina dòu soulèu, prenien tòuti li coulour de l'arc-de-sedo.

— Coume vai, migueto, que siés tant sourno ?
Pèr responso Agueto souspirè.

— Anen, mai quauque gros segren, repren-guère. Conto m' acò. Sabes, siéu toujour toun counfidènt. Se d'asard poudiéu quicon contro aquel enfetamen...

— Vos que te lou digue ? E bèn, me manco quaucarèn despièi que pènse plus à M. de Bernat. Aquel amour me fasié pati, Diéu saup ! mai la soufrènço èro douço e aro me desfauto.

Anave m'óufri generousamen pèr teni la plaço vacanto e déjà aviéu entamena un discours pas trop clar, quand M. Brassà pareiguè em' un de sis ami, dins la draio que passavo à nòsti pèd. Entre nous vèire ansin ajouca prenguè lou bras de l'autre e afetè de nous moustra à-n'-éu en ié racountant de causo que li fasien forçò rire tòuti dous. Lis iue d'Agueto traguèron d'uiau e veguère bèn que couneissié de planto, coume iéu, ço que lou Brassà escupissié contro nàutri. Pèr uno resoun o pèr uno autre avié, coume iéu, fa semblant de rèn saupre.

Sènso me boufa un mot s'aubourè emé li

rouito i gauto e s'avansè de soun insultaire :

— Moussu, diguè d'uno voues que siblavo entre si dènt sarrado, un ome que fai soun pouossible pèr espandi lou desounour d'uno femo coupablo, es un lache e un miserable. Pèr aquéu que cerco d'embruti, coume fasès, uno chato innoucento, nosto lengo a ges de noum.

E se vesié au batedis de soun cor que tout soun èsse se revoultavo contro li calounnio d'aquel escòrpi d'ome.

Ieu, i' avié 'no bello passado que li vermicchèlli me bouien. Brassà roumpeguè la restanco en fasènt mino de richouneja au nas de la chatouno. D'un bound siguère sus éu.

— Desiras, Moussu ? me demandè emé sant-plan.

— Desire vous faire rintra dins lou vèntré li brutice qu'avès larga contro Madamisello.

S'imaginè — es de crèire — se n'en tira à bon comte em' un liò-coumun mes forço à la modo de neste tèms pèr li fueietoun :

— Ah ! Fort bèn. Es vous que sias carga de l'apara ? Pèr avé aquéu dre requist sias, m'es avis, soun fraire, o soun proumes o soun...

Anavo dire soun amant, mai leissère pas à talo crapo lou tèms de sourti. Tirère ma carto e, après l'en avé pica en plen mourre, la ié jitère.

Venguè subran blanc coume un mort, sis
iue prenguèron un marrit regard e cujave que
me sautèsse sus. Mai, sènso dire uno paraulo,
acampè la carto e s'enanè emé soun coumpan.

Agueto plouravo. Pecaire ! Avié pòu que
m'arribèsse malur pèr elo e s'acusavo de m'avé
jita dins aquel emboui pèr sa ridiculo sourtido.
Coume s'aurié pas mies fa de leissa aquelo sèrp
s'empouiouna de soun propre verin !

Mai iéu, tranquile coume Batisto, la coun-
soulère de moun mies, ié rapelant qu'ère d'uno
poulido forço à l'escrimo e que — bord qu'avian
lou dre pèr nautre — lou bon Diéu nous aju-
darié. Remounterian à chivau et passerian
encò de dous de mis ami pèr li prega de bèn
voulé s'entèndre emé li de moun aversàri.

Sus li quatre ouro me venguèron apredre li
coundicioun arrestado. Lou coumbat aurié liò
l'endeman de-matin , au sabre d'ajudant.
M. Brassà aguènt fa soun service dins la cava-
larié cresié pas que cuneiguèsse proun aquelo
armo e coumtavo bèn avé ansin uno superiou-
rita sus iéu. Mai, pèr bonur, l'avié trabaiado
pèr goust uno bello pountannado.



XIV

Vouliéu pas que mi gènt sachèsson rèn de
ço que s'alestissié, crento de lis esfraia e de lis
enquieta. Partiguère adounc, l'ouro vengudo,
li man dins li pòchi, em'un libre souto lou
bras, coume s'anave — à moun acoustumado
— legi tranquilamen à l'oumbro de quauque
faus, *sub tegmine fagi*.

Mai un cop foro la visto di miéu escounde-
guère lou libre dins un roumias e anère à
grand pas à la routo ounte mi segound m'es-
peravon em'un càrri que nous menè en pau
de tèms au liò counvengu, darrié lou pieloun
de Sant-Pèire.

Estènt dounado li causo qu'amenavon aquest

duèl, èro facile de devina qu'eiceste sarié se-
rious. Pamens — emai siguèsse lou proumié
cop que m'arribèsse un afaire de talo meno —
ère pas esmóugu lou mens dóu mounde.
M'ère même pas avisa de prendre aquéli pre-
cauciuoun que soun amessiblo dins de cas
parié : testamen, letro d'adiéu à la famiho, is
ami, à la nòvio vo à la mestresso. Nàni ; tout
ço que me sentié èro uno iro creissènto con-
tro l'insultaire de ma bèn-amado, em'un senti-
men estraordinàri de la béuta dóu païsage,
d'aquéu mounde sus quau mis iue s'anavon
belèu dins uno ouro, barra à toustèms. Lou
soulèu me pareissié mai rous e mai bèu, li
flour, mai prefumado ; l'auro, mai douço ; e
leissave ma tèsto nuso se refresca dins l'aire
au mouvemen de la curso.

Aviéu vertadieramen la fisanço de ço qu'a-
viué dich à-n-Agueto, que — bord qu'avian
lou dre pèr nautre — lou bon Diéu nous aju-
darié.

Coume arribavian d'un draïou, moun aver-
sàri s'avansavo d'un autre. Se saludерian e li
temouin se boutèron à faire soun óufice en-
terin que M. Brassà, impaciènt de venja la
boufo qu'avié encaissado, marchavo à grand
pas en mastegant un brout de mentastre.

Enfin nous metegueron en presènci. M.

Brassà — qu'èro gauchié, — prenguè soun sabre de la man senèco, ço que faguère tambèn, m'estènt fourma de longo toco à tira di dos man. Ero adeja un desavantage pèr moun antagounisto pau abitua à lucha contro un autre gauchié. Acò noun empachè que au commandamen : « Anés, Messiés ! » coumtant, coume l'ai déjà di, sus moun ignourènci de l'armo qu'avié causido, cerquè d'en-proumié à me touca sènsotrop s'enchaurre de se defèndre. Avansavo e roumpié à-de-rèng, m'enviróutavo d'un ciéucle d'acié trelusènt que, souto li rai dóu soulèu, jitavo de lamp de tout caire.

Enfin prenguère l'óufensivo crento qne, après m'avé ansin fatiga à para sis ataco, me blessèsse ounte e coume voudrié. Simulère un *cop de flanc dre* e coume l'esvartavo em' uno *parado de cors*, ié dounère dóu tai de moun sabre en plen sus lou mourre. Amassoula, toumbè sus la tepo, la gauto asclado fin qu'à l'auriho, rasant lou sang emé si dènt escrachado.

Tout d'un tèms un quilet de femo s'ausiguè e entandóumens que si temouin enlevavon lou blessa, Agueto sourtido d'uno tousco coume uno trèvo, venguè, blavo, plourant de joio e d'emoucioun, toumba avanido dins mi bras.

Me demandère pas d'ounte venié que siguèsse

aqui. La cuneissieu tant bèn que l'esperave pèr ansin dire.

Emé mis ami l'empourterian en un rode vesin e gramaci quauqui degout de l'aigo de l'Argentiero la revenguerian sènsa peno.

— Coume as saupu l'endré ounte se devian batre ? ié demandère.

— En t'esperant adematin à ta porto, sènsa que te n'avisesse e en te seguissènt de liuen. Aviéu ges d'autre mejan que se t'aviéu parla de moun idèio m'auriés empachado de l'eisecuta. Sariéu morto d'inquietudo, vé. Aviéu tant pòu, moun brave Charle, moun vièi cambarado, que t'arribèsse malur pèr ieu !

Sus acò mi temouin, vesent coume li causo viravon, nous quittèron. L'un d'eli, en me sarrant la man, me diguè à miejo-voues « Gusas ! as tóuti li *veno*. » E dis iue me moustravo Agueto.

— Es egau, reprenguè eicester, l'as pas manca, aquéu marrias.

— Troves ? Lou fèt èi que si calounniò i 'an pas pourta bonur.

— Héu ! Aurié pouscu i 'arriba piège, faguè mai la fiheto en s'enaussant, t'aguèsse tuia o blessa, ieu ié fasiéu sauta la caisso sènsa remessioun.

En parlant ansin sourtiguè de sa pòchi un

mignot revolver damasquina, emé la crosso d'evòri 'scrincela que sièis prunello mourre-javon dins li trau d'ou barrihet.

La sabieu capabلو de faire coume disié : pa-mens ié repliquerè en risènt.

— Ah vai! L'auriés manca. Siés enca touto tremouleto.

— O ? Regardo aquelo lùpi, eila, sus aquéu roure.


La lùpi en questioun, de la distànci qu'erian, èro grosso coume uno mandarino. Drecho, lou cors vira un pauquet à senèco, Agueto au-bourè l'armo à-n-autour de soun iue, lou bras plega..... Un brud coume lou peta d'un fouit, uno tubèio lóugiero coume aquelo d'uno ciga-reto e la rusco enfrauminado d'ou roure par-tiguè en pousso, leissant vèire un tacèu blan-quinèu à la plaço de la lùpi.

Urous de senti davans iéu enca proun tèms pèr joui de la vido, pensère à ana apprendre iéu meme à nòsti famiho aquéu rescontre que d'autri poudrien n'i'en parla proumié se noun fasiéu vite. Prenguère Agueto à la brasseto e tournerian au nostre, lou pitre desboundant de bonur. Rouland, lou chivau de la bello, nous seguiguè coume lou jour memourable ounte sa mestresso faguè la couneissènço d'ou vis-comte de Bernat.

Inutile de vous dire, car ligèire, ço que se passè dins nòstis oustau quand se ié sachè ço que venié d'arriba. Lou capitàni m'embrassè, pretouca de ço qu'aguèsse ansin jouga ma vido pèr apara sa chato.

— Mai tron-de-milo ! faguè. Coumprene plus rèn à vosto armado, aro. Vaqui pas un *buto-code* que manejo la lato de maniero à blessa un ousard ? S'acò countùnio se veira lis *ris-pan-sau* douna de leiçoun de balistico is artihaire.





XV

Moun duèl faguè d'autant mai de brud que
aguè uno seguido inesperado.

La blessaduro qu'aviéu facho à M. Brassà
lou devènt empacha belèu douz mes de tems
de faire soun obro, la *societa financiero di
terraire dòu Miejour francés* mandè un ispeito-
tour pèr teni soun service d'aqui que siguèsse
en estat de lou reprendre. Es ço que perdeguè
lou mesquin.

En efèt, l'ispeitor aguènt apres lou biais
que s'èro coumpourta vis-à-vis d'Agueto, èro
adeja pas trop pourta pèr éu. Mai quau vous a
pas di qu'en subre d'acò, quand durbiugè la

caisso fisado à Brassà, ié troubè tout-bèu-just uno bello aragno que ié calavo si tis? N'avisiè lèu-lèu lou proucurour de la Republico e tre que sa santa lou permeteguè, neste chivalié-endùstri siguè mena pèr li dous pus bèu gendarmo de la bregado, à la presoun de Grasso. Quàuqui mes après uno coundanacioun à dès an de trabai fourça nous desbarrassè d'eu. Au moumen de mouri poudra se counsoula en pensant qu'a pas tout voula.

A parti d'aquel afaire acoumencère de sounja seriousamen à parla à-n-Agueto de moun amour pèr elo e de la desiranço que me tenié de l'espousa. Coumpreniéu que poudian pas countùnia ansin sènso fin à courre-bourrido ensèn e que çò que Brassà avié de-bado assaja un autre poudié lou reüssi car lou mounde es autant facile à-n-ametre lou mau que rebelle à crèire lou bèn. Qu saup se nòsti relacioun, puro coume se pòu pas mai, pourtarien pas tort à moun amigo dins l'esperit de forço gènt?

De mai, lou viscomte avié repareigu. L'avié bèu tems qu'avié acaba si vinto-vue jour e, coume antan, s'arrestavo souventifes au mas di Tournaire quand l'asard de la casso l'adusie d'aqueste caire. Me remembrant dóu prouverbi : *l'on revèn toujour à soun proumier amour*, avié uno crento qu'es pas de dire

qu'Agueto se boutèsse, à ié voulé tournamai bèn. Idèio folo e risiblo, se voulès, mai que me fasié pamens rebouli e qu'an agudo, n'en siéu segur, tóuti aquéli que se soun capita dins ma pousicioun. Mau-grat tóuti li resoun qu'aviéu de crèire que la mignoto me rebutarié pas, aviéu pòu. De que? Es ço que sabe pas.

La vido, à l'ouro d'ieu, es divisado en tres partido pèr lou bacheleirat que nou fai ome, pèr la majorita que nous fai ciéutadan e pèr lou matrimòni que nous fai capo de famiho. A caduno d'aquélis epoco se reviran uno passado pèr jita en arrié un cop d'ieu sus aquelo tiero de jour que venèn d'abena e que ges de puissanço au mounde nous pòu faire reveni. Au moumen de prendre l'escourso pèr lou darrié saute de me liga à toustèms em' aquelo qu'amave e qu'anave teni dins mi man soun bonur o soun malur, esitave.

Leissave dounc courre, aguènt pas lou courage de parla, remetènt sèmpre à l'endeman; tant e tant bèn que d'un pau mai un acidènt me levavo aquelo peno.

Pas liuen dóu liò mounte se passò aquesto istòri, i' a lou vilajoun de la Napoulo. Coulonjo di Massalioto que la batejeron *Neapolis*, piè terro di Vilo-novo e di Mount-grand, si-guè arrouinado pèr Ramound de Tureno en

1390, pèr li Mouro en 1530, pèr lou duque de Savoio en 1589 e n'es plus, desempièi, qu'un recàti de pescadou e de labouraire bevènt lou soulèu au pèd de l'Esterèu coume un limbert.

M'estènt bouta en tèsto de n'escrieure la mounougrafio, preguère Agueto de veni m'ajuda à ié prendre li croucadis que m'èron de besoun.

Ço que fai qu'un matin troutavian vers l'endré que vous parle e Agueto, fouligaudo, me galejavo coume toujour.

— Poudriés pas me dire quau es aquelo Jano A*** en quau as fa de vers?

Me souveniéu ni d'uno Jano A***, ni de vers que i' aguèsse fa. Agueto me tirè d'un embarras pèr me jita dins un autre, en me semoudènt un papié mascara.

— Té, faguè; ai trouva 'cò dins lou libre que m'as presta 'ièr.

— Bord que t'ero pas adreissa auriés pas degu lou legi.

— Bedigas ! Se m'èro esta adreissa m'es vejaire que m'aurié pas tant interessa.

Ero uno d'aquéli pèço coume téouti n'an fa en sourtènt d'un bal de carnavas. Falié pas que siguèsse un coudoun double de leissa barrula de causo ansin dins mi libre pèr qu'uno chato lis ié troubèsse ?

— « Ta como es rousso, o Jano...! » M'aviés pas di qu'ères coume Tician.

— Ame li rousso es verai; mai ame encaro mai li bloundo e subre-que-tout li bruno.

— Ah ! vai, acò 's pèr me faire lou bèu-bèu.

— Pamens, es pas tu que me reprocharas aquéu goust. Me sèmblo que toun viscomte èro tambèn d'un blound venician....

— Parlen pas d'acò.

— Ah ! o. Voudriés que me leissèsse charpa sènso rèn dire.

— Es toun devé.

— Alor me taise.

A forço de charra erian arriba. Jiterian li brido de nòsti chivau à la servicialo de l'au-bergarié Gaut e s'anerian lèu-lèu metre au trabai. Agueto èro d'asard dins un de si jour de cagno. Aurias di qu'avié li soulié clafi de fournigo. A tout moumen largavo soun craioun pèr escala 'no paret boulegadisso o ana vesita uno soubro de viseto, istòri de s'entre-teni li cambo en bon estat. Enfin ié tenguè plus.

— Tè, patroun Maurèu, eila, qu'alestis lou boui-abaisso. Espèro, ié vau dire de metre en pau mai de pèis e l'anaren manja em' éli.

— Vos ana dina 'mé li pescadou !

— Perqué nàni ? Es brave patroun Maurèu. A bèn un pau fa la *trèto*, à çò que dison ; mai i 'a tant long tems !

Dóu moumen que l'avié en tèsto èro inutile
que diguèsse de noun e la leissère ana.

E à miejour, manjavian dins li sieto de
sièure, li bèlli lesco daurado, emé li gènt de
patroun Maurèu, asseta en ciéucle sus la sablo
ounte la velo, estalouirado sus de fais de rèm,
dóu cousta dóu soulèu, nous coupavo un grand
tros d'oumbro.

Falié vèire tòut aquéli long diablas, brun
coume de courcoussoun, alounga pèr sòu e
bevènt dis iue la mancipo qu'escoutavo li cam-
pagno dóu vièi negrié.

Acò, si, qu'aurié fach un poulit tablèu pèr
Moutte !



XVI

Es pas tant facile qu'acò d'estre ames pèr li pescadou à prendre part à soun regòli, même en pagant, mai Maurèu èro un vièi ami dóu capitàni Tournaire e, de mai, èro esta lou magistre d'Agueto pèr la navigacioun. Ero fièr, emé resoun, de sa *mòssi*. Encian matalot de l'Estat, avié fa li guerro dóu Meissico, de Chino e de Crimèu e n'avié rapourta pèr lis Anglés — li *péu de filasso*, coume ié disié — qu'avié vist de pròchi, uno d'aquélis ahiranço que fan li coursàri en cas de besoun.

— Sias tròup jouine pèr avé vist acò, nous disié dins soun Suquetan grana, tout en fasènt de fum, quand lei Anglés prenguèron aquelo modo de veni passa l'ivèr eici e de si li basti

de *villa*, creiriar pas, troun de Diéu ! que s'èron mes à tuteja tout lou mounde coumo se, lei Prouvençau, erian plus esta qu'uno raço de bastard qu'avien dre de cauca à soun sadou. Un jour n'en blouquèri un, l'amirau Lewenham, un amirau de ribiero, un grand vièi escranca que semblavo toujour au moumen de faire sa crebacioun e qu'agantè pamens sei vue crous e passo. Coumo fasiéu la radasso sus la *Marino*, lou sentèri que mi picavo sus l'espalo en disènt : « *Côh ! Maurel, tu allais pas en mer aujourd'hui ? — Et toi, Lewenham, tu allais pas... ousque je t'ai dit ?* » li rebriquère emé lei uei fouoro la tèsto. Ah ! demandè pas soun rèsto. Prenguè d'aquelo erbo e aguè bouon nas.⁽¹¹⁾

Se vesié qu'erian au mes de setèmbre. Lou tèms, qu'au matin proumetié uno jornado magnifico, èro en trin de se gasta ; de gros ni-voulas en coutoun-ramo mountavon d'eila darrié la Garoupo tapant lou soulèu, jitant d'oumbro gigantasso, quouro sus lis isclo de Lerin, quouro sus la Crous-di-Gàrdi, quouro sus LaVau. Pas l'aureto la pus mistoulino ; uno calour grèvo em' estoufanto que vous empa-chavo de respira e vous fasié veni mau de tèsto.

— Oh ! oh ! faguè lou patroun que despièi uno passado espinchavo tout acò, jouvènt, sa-

rié tèms de tourna 'l 'oustau, vé. Es en trin de s'alesti quaucarèn que vous n'en dìsi pas mai. Lou Cap-Rous a lou capèu, Nouestro Damo a lou mantèu...

Se lou faguerian pas dire dous cop car sabian qu'aquel entre-signe es quàsi jamai messour-guié. Touquerian amistadousamen la man moureto d'aquéli bràvi gènt e reprenguerian au galop lou camin dóu mas.

Mai, vai te fa fiche ! Maurèu èro esta un pau tardié pèr nous averti. L'avié pas dès minuito qu'erian pèr orto que la pluieo acoumencè, uno plueio espetaclouso, un endoulible vertadié, emé de degout large coume d'escut de cinq franc que fasien au sòu un brud de grèlo. E rèn pèr s'assousta : pas un pont, pas uno cabano, pas uno baumo. Ço qu'avian de mies à faire èro de courre e landrian efetivamen jusco que li tron petant e lis uiau trafigant lou cèu, nous fauguèsse ana au pas crento de se faire afoudra.

Enfin, trempe fin qu'i mesoulo, arriberian i Terme ounte poudian demanda la retirado d'aqui que l'aurige aguèsse cala. Mai coume anave tabassa à-n-uno porto, un lamp espeta-clous nous esbléugiguè d'uno lus quàsi fantas-tico, tout ensèn jauno, roujo, bluro, verdalo, qu'escleirè coume dins un pantai, lis oustau rouviha di tempié e la routo coudoulouso que

s'aloungavo alin, entre lis aubo, dins uno miejo escoresino. Tout d'un tèms uno trounadisso d'infèr esbrandè tout, fasènt gença li vitro e creniha li sarraio. Moun chivau, esbarluga, se dounè pòu e faguè un escart que me jité au sòu coume uno saco de brèn. Uno orro douleur m'arrapè au bras senèstre...

Agueto èro adeja pròchi de iéu emé li gènt de l'oustau, temouin de l'auvàri, que me pourtèron au siéu. Ma cambarado perdeguè pas la testo. Preguè quaucun, entre la chavano acabado, d'ana emé li chivau, averti nòsti famiho e de dire que nous venguèssou querre emé la veituro. Anè pièi cambia sis abihage regoulant d'aigo contro li que la masiero i 'avié óufert e revenguè se 'n cop m'aguèron tambèn mes de linge se.

— As mau qu'au bras ? me demandè.

— Rèn qu'au bras. Crese qu'èi rout.

— Anan vèire acò.

— Tu ?

— Eto. Te creses que sigue pèr rèn que l'Assouciacioun di Dono Francesco⁽¹²⁾ m'a dcerni l'encartamen d'infiermièro ?

Regardè emé precauciouн l'endré de la frachuro e aguè un souspir de countentamèn en vesènt que se capitavo entre l'espalo e lou couide e qu'aquélis articulacioun avien rèn.

— An ! n'en sara pas de mai faguè. Acò sara lèu adouba.

En un vira d'ieu aguè coupa de tros de cano,
estrifa de vièi linge en long riban e ficela moun
paure bras coume un saucisso d'Arle.

Lou vous creirés o lou vous creirés pas,
mai d'estre sougna pèr elo acò me levè la mita
dou mau. M'ero un chale de senti si maneto
fino e leno sus ma car amalugado.

Enfin la veituro pareiguè emé moun paire e
lou capitani dintre, alor que la tempèsto venié
de prendre fin. Tournerian à nòsti bastido
forço mens galoi que ço que n'erian parti lou
matin. Ero bèn lou cas de dire que tau ris en-
cuei que deman trenara.

M^u Blanc, lou vièi mège de la famihe, e un
ami, venguè lou meme vèspre. Lausè forço
lou pensamen qu'Agueto m'avié fa e, coume
s'en mancavo de mai d'un pessu que siguèsse
un nèsci, afourtiguè à mi gènt em' un sourrire
bounias, que la chatouno sarié dins tou cas
presènt, un meiour pratician qu'éu.

E avié resoun.



XVII

L'endeman, de matin, ère encaro au jas em'
un pauquet de fèbre, quand piqueron à ma
porto. Cridère d'intra e veguère parèisse Agueto
emé li rouito i gauto, (mountavo e descendie
jamai lis escalié autramen que dous per dous)
e couifado à la voulounta de Diéu.

— Bonjour, vièi. Fas encaro la marcho de
flanc d'aquéstis ouro, feiniantas. Coume sian ?

— Ni mies, ni pus mau, dóutour, et vous ?

— Oh ! iéu, vai sèmpre bèn.

— Siés urouoso. De qu'èi que me vau l'ou-
nour de ta vesito tant matin ?

— Tant matin ? A dès ouro ? Vène pèr te
vèire. Voudriés pas belèu qu'abandounèsse mi
malaut avans que signon gari.

— Alor es serious, fas de medecino ? Emai te fagon pas un proucès per l'eiserça ilegalamen.

— Oh ! Ai mi papié en règlo. E même siés lou proumié que me baie l'oucasiooun de mous-tra moun saupre-faire.

— T'assegure qu'auriéu bén voulountié ceda quel ounour en quauque autre.

Assetado sus lou pèd de moun lié, tout en relevant d'un gèste de caneforo si treno folo, me racountè la peno qu'avié agudo pèr veni.

— Mama voulié pas perqu'es pas counvenènt, parèis. Vous demande un pau lou mau que i 'a. Mai es de crèire que souto l'encian regime acò se fasié pas. Soun bravamen enfant li gènt de l'encian regime, moun paure Charle ! Tambèn vène republicano, revolu-ciounàri, anarchisto. Aguèsse viscu avans quatre-vint-nòu sariéu partido pèr l'Americo viéure emé li sóuvage e guerreja contro lis Anglès pèr la liberta.

Sènso leva à-n-Agueto lis ilusioun qu'avié sus lou rigourisme di mour d'aquéu famous encian regime, ié demandère coume avié fa pèr segui soun idèio.

— Ai di qu'èro moun devé, respoundeguè, de te veni sougna, bord qu'ère l'encauso de toun mau.

— Tu ?

— O. Se t'aviéu pas fourça à mounta' chivau aquéu jour que vouliés pas...

— As pas à-n-avé de remors, vai. S'es ta fauto, es de tant liuen... E ta maire ? S'es acountentado d'aquelo resoun ?

— Ai 'oublida de ié demanda e d'espera que me lou diguèsse. Me siéu esbignado à l'angleso.

Em'acò la jouveineto sàutè sus si pèd e se meteguè à passa en revisto tout ço que i' avié dins la chambro, en fasènt si reflessioun.

— De quau es aquéu retrá ?

— De moun ami Pouthier.

— A l'èr inteligènt, mai... à sa manièro. E aquéu ?

— Moussu Doumergue.

— Boudiéu ! Dèu jouga li traite au tiatre de Cabris.

— Es avoucat.

— E 'iceste ?

— Ah ! Eiceste es lou brave Sauvan que m'editè mi *Cant ligour*.

— A bèn la figuro d'un moussu qu'es amateur de *bouiouн*.⁽¹³⁾ Es gras coume un gabre.

— Marrit péu, vai ! Vau la peno que te dedique de libre.

— Ah ! Ah ! E aquelo bello dono couifado d'uno fougaço ? Es uno de ti nouembróusi bònus

amigo ? Es Justino, Agustino o Jano A***, la rousso ? Pas mau ! A un pau forço uno tèsto de vedèu, mai em' uno raiado d'oli, un pessu de juvert e forço vinaigre, i'a de gènt que l'amon.

— Anen, anen, diguère en risent, mau-despié que n'aguèsse, d'aquéu barja de fiheto en bello imour — aquelo femo es pas çò que te creses. Es la mouié de Sauvan.

— Mai alor, li noumado Agustino, Justino e Jano A***, i'a pas mejan de vèire si mourroun ?

— Ié tènes tant qu'acò ?

— O.

— E bèn, saras fourçado de faire coume si ié teniés pas. Noun lis ai.

— Me n'en baies ta paraulo ?

— O.

— Falié dounc que siguesson bougramen laidò pèr que agues crento de garda si foutougrafia. Devien avé de nas d'eici à Niço, de plot en plaço de cambo, de creniero en guiso de cabeladuro.

— Ah ! Segur, s'en mancavo forço que si-guesson tant pourido e tant gènto que tu.

— Verai ?

E pèr escoundre li rouito que lou plasé d'aquelo flatarié ié pintavo i gauto, acoumencè de furna dins mi tiradou. Charravo, cacalassavo, brassejavo, sourtié moun linge, lou pau-

savo un pau pertout, sus la taulo, sus li cadiero, au sòu meme. Lou renjavo pièi pèr tierro e l'estremavo tournamai.

— Oh ! que desordre ! fasié. Lis ome, vé, sias que de pasto-mourtié. Li debas soun dins li moucadou, li camiso de jour entre aquéli de niue. An ! vaquito qu'es adouba. E que t'arribe mai.

— Mai siés un tresor, Agueto. Me sougnes, me metes mis abihage en ordre.... Se 'n cop me maride faudra que cerque uno femeto coume tu.

— Moun ome, siés pas desgousta. Te creses que n'i 'a de dougeno d'Agueto ? Té ! Que i 'a 'qui-dedins ?

En bourroulant mi papié sènso ges de meinajamen avié destousca au founs de moun secretari un pichot cofre de ferre e me lou moustravo esperant que lou ié durbiguësse ; mai faguère semblant de pas coumprendre la counvidacioun, ço que fai que s'imaginè d'avé trouba lou pot-di-rosò.

— Me vos pas faire vèire ço que i 'a aqui dintre ?

— Pode pas. Es un secrèt d'estat : li papié d'uno counjuracioun de nihilisto contro lou Csar.

Aquelo passavo l'osco. Li poung sus lis anco, la bello se revirè :

— Ah ! ç'anen. Pèr quau me prènes ? Te trufes de iéu ?

— Sabes bèn que me lou permetriéu pas.

— Eto ! Te geinariés. Enfin, as pas la pretencioun de me faire avala 'quest coulobre !

— Es la verita puro.

Au mai vesieu que tenié à saupre ço que caupié la bouiteto, au mens fasié mino de voulé lou ié leissa vèire.

Eiçò me serviguè, car m'aperçuvère que i 'avié tant sié pau de jalousié dins soun testardige e la jalousié, dins l'espèci, me fasié pas peno. Sias jalous que vis à vis d'uno persouno qu'amás.

N'en demande bèn perdoun en tóuti li gènt de l'encian regime, mai me creseguère en dre, coume principau interessaa, d'ajuda aquéu sentimen nouvelet — qu'esperave despièi tant de tems — à veni au mounde.

— Agueto, te dounarai la clau d'aqueu coufret à-n-uno coundicioun.

— Queto ?

— Me faras un poutoun.

— Tè ! diguè lóugeiramen mouqueto, preisèmple ! N'en vaquito uno d'idèio ! Es pas que tengue tant qu'acò à saupre ti secrèt de Poulinchinello.....

— Au countràri.

— Mai pèr ço qu'èi souventifes dangeiros de refusa i malaut ço que desiron forço.

— Bono amo, vai !

Emé la sublimo impudour de l'innoucènci, la mignoto s'avansè de ieu e me pourgiguè soun front tout en agantant la clau que ié semoundiéu. Me n'avié permes un, mai en anant vite, aguère lou tèms de n'i' en faire dous e la fouletouno anè à grand dèstre durbi lou tresor. Ié troubè rèn mai que mi quitanço dóu tèms qu'ère estudiant. Jujas un pau la tèsto que faguè.

— O Jusiòu ! M'as enganado. Rènde-me moun poutoun e lèu.

Demandave pas mies. De moun bras san l'agantère e, la sarrant contro ieu, devouriguère de bais calourènt soun front, si parpello, si gauto e soun còu. Elo, lis iue barra, lou sen boulegadis, me leissavo faire qu'èro uno benericiou.

— Dirien que ié prènes plasé, 'miguelo.

— Ieu ! s'escridì em' uno endignacioun qu'aviéu forço resoun de crèire apoucrifo, ieu ! Ah, pamai ! Soulamen, vé, ame la justiço mai que tout. M'aviés troumpado sus la marchandiso, counvenié dounc que me n'en rendeguèsses lou près.

— O, mai pèr dous poutoun que t'aviéu baia te n'ai remboursa belèu vint.

— Gournaud, li dès e vuech àutri soun pèr li daumage-interèst.

Counseiarai pas i malaut de reçaupre dins li mémi coundicioun que ieu li damisello qu'amon car aurien pas capita l'estè pèr faire cala la fèbre; tant s'en manco.

M^u de Bernat me venguè sauva, bèn mau-grat ieu d'aiours. Avié apres moun escaufèstre e venié prendre de mi novo. Vesènt qu'avié enca proun forço pèr sousteni uno couversacioun, n'aproufichè pèr me racounta que la veio avié tuia dous perdigau d'un soulet cop de fusiéu.


Dóu tèms que parlavo, Agueto fueietavo un de mi libre de comte e quand lou viscomte aguè fila, me diguè :

— Auriéu jamai cresegu que lis estudiant, siguessias tant charitable. A cado pajo vese ; « bònis obro : dès franc, cinq franc, vint franc...»

— Acò te provo que fau jamai juja li gènt sus lou deforo, respoundeguère en me moussigant li labro pèr pas esclafi lou rire.

Lou mountant d'aquéli « bònis obro » èro bèn lou retralou mai semblant que me soubrèsse de Justino, d'Agustino e de Jano A***.





XVIII

Agueto tenguè paraulo. Tant que siguère pas coumpletamen gari me sougnè emé l'ajudo de M^u Blanc e vous assegure que souventifes m'estrassère dóu rire alor que dóutour e dóutouresso èron en counsulto.

D'en proumié mi gènt avien bèn trouba un pau bijarro aquelo maniero de la chatouno d'intra 'nsin dins ma chambro alor qu'ère encaro au lié; mai la drolo avié 'n biais tant naturau de faire li causo li mens naturalo que degun boufè mot. D'aiours, coume lou capitàni me l'avié di, coumtavon bèn nous marida ensèn e m'es de crèire que se vesien brula de la toco.

Enfin, un bèu jour, me desbarrasseron de moun aparèi. Que chale quand lou pousquère boulega tournamai aquéu bras malurous ! Lou regardave coume un ami bèn car qu'auriéu perdu de visto despièi trento an. Aurié faugu vèire lou siuen que me dounave de lou turt a en liò, crento que se roumpèsse mai. Sarié esta de vèire qu'auriéu pas fa autramen.

Lou tantost même d'aquéu jour anère gramaçia Agueto de la peno que s'èro dounado pèr iéu e la troubère dins soun isclo en trin de trabaia à-n-aquéu famous tablèu que, despièi tout aro un an, èro sus lou chivalet.

— Ai uno novo à t'aprendre, me diguè au-tant lèu. Mieto se marido.

— Pas em' un de mis ami, au mens ?

— Perqué ?

— Perqué s'acò devié èstre me veiriéu fourça de faire au mesquin uno douno nouvialo utilo : siès pan de bono cordo de cannebe touto novo em' un clavèu, di gros.....

— Oh ! que siés marrit, vai ! s'escridè en risènt. As encaro lis agroufioun sus lou cor ?

— Acò 's acò. Es vautre que li braferias e' s iéu que lis ai sus lou pitre.

— Tout ço que sabe, reprenguè, es que lou jouvènt en questioun es de Paris.

— Moun Diéu vous rènde gràci ! Enfin es

dounc arriba lou revenge dóu Miejour ! E tu,
Agueto, quouro n'en fas autant ?

— Oh ! iéu, jamai.

— Jamai ? E perqué ?

— Perqué troubarai jamai un ome que vogue
de iéu.

— E la resoun ?

— Ah ! la resoun es que quouro li preten-
dènt ausiran li coundicioun que ié farai me
tiraran sa reverènci e prendran d'aquelo erbo.

— Preisèmple ! Sariéu curious de li saupre
aquéli coundicioun espantaianto.

— Te li dirai quauque jour que saras esta
bèn brave.

— E se rescountraves un jouvènt qu'aceitèsse
tour ço que ié voudriés impausa ?

— Eh ! lou prendriéu. Soulamen lou res-
countrarai pas.

— Quau saup ? Lis asard soun tant grand.

— E lis espèr tant fòu.

Charrerian aنسin jusco que, lou jour aguènt
fali, siguèsse óublijado de remetre à l'endeman
la seguido de soun trabai.

Lou capitàni me retenguè à soupa. Pièi,
quand partiguère, Agueto vouguè veni me faire
coumpagno fin qu'au grand camin ; siblè Diano
emé soun cadèu — qu'èro devengu un bèu chi-
nas — e me prenguè à la brasseto.

Coume arribavian au rode que lou Biau se
jito dins Ciagno, uno espetaclouso óulour de
tuberouso nous arrapè i narro. A man dèstro,
tant liuen que lou lugar nous permetié de vèire,
s'apercuvié — enregado coume se dèu — li tijo
primo e souplò d'aquéli planto, courounado
de campaneto blanquinello que l'auro gangas-
savo plan-plan.

D'un acord coumun s'asseterian sus l'erbo e
isterian uno passado sènso dire uno paraulo,
amirant aquelo niue meravihouso, vertadièro
niue de la Grèço.

Lou cèu, clafi d'estello e coupa en douz pèr
lou camin de Sant Jaume, avié 'quelo reflamour
subre-naturalo que vous fai pantaia de mounde
invisible à nosto pauro umanita. Dins lou
founs, à nosto gaucho, s'entendié la ribiero
cacaleja sus li code de sa maire, eila, darrié 'n
bàrri d'aubo e de figuiero-fèro. E dins tout lou
campèstre se vesué, talo que de belugo, voulas-
treja à bèl èime li luseto que, galejarello, venien
me passa soun lumenoun souto lou nas, fasènt
mino de dire :

— D'aut! d'aut! Venés lou vèire aquéu que
troubavo lou viscomte de Bernat tant nèsci de
pas parla d'amour à-n-uno bello chato qu'avié
à soun caire. Se noun nous enganan fai tout
parié.

Mai lou faguère pas longtèms. Tout en revassenant, Agueto, coume i' arribavo souvent dins aquéli cas — avié pausa sa bello tèsto sus moun espalo e ieu avié pres dins mi man si pichot det escrincela en fus e, de fes que i' avié, li sentiéu tremoula 'quéli detoun. Aquelo óudour de tuberouso emé lóu prefum de car vierge qu'escampavo lou jougne badant de la mignoto, m'entestavon coume s'avié aganta un cop de soulèu. Me sentiéu courre dins li veno uno cremesoun que me levavo touto voio, touto forço, e restave aqui, aspirant à plen de narro ésti sentour enebrianto, pensant plus en rèn, souvetant qu'uno souleto causo : qu'aquel estat durèsse à toustèms.

Subran un boufa d'aire menu, menu coume l'alen d'un ninoi à la bressolo, venguè faire flouta uno di mècho despenchinado d'Agueto jusco sus ma gauto. Au touca sedous d'aquéli péu foulatin perdeguère la tèsto. Passère un de mi bras autour de soun còu, l'esquichère contro moun pitre e, fòu d'amour, ié dounère cop sus cop uno tiero de poutouno que la fasien feni.

— Oh ! Moun Agueto, coume t'ame ! Digo, m'ames peréu un pau, tu ?

Pèr responso me semoundeguè si bèlli bouco

e, 'sglaria, ié meteguère moun proumié bais d'afiança.

— Que siéu urous, 'miguelo ! Vèses bèn que l'as rescountra aquéu qu'aceito, même sènso li saupre, tóuti ti coundicioun.

Falié sèmpre s'atèndre en quauque espan-tamen em'aquelo cabreto fouligaudo. Em'un èr mita figo, mita rasin, me repliquè :

— Coume ! Vos m'espousa, tu ?

Toumbère de moun aut, pensas. Pièi m'asar-dère à ié demanda :

— Perqué nàni ?

— E te creses alor que voudriéu d'un ome qu'apelo soun cachimbau *Titino* e qu'a fa de vers à-n-uno Jano A*** ? Mai jamai de la vido. Acò poudrié me coumproumetre.

— Eh ! au countràri. Ço que poudrié te coumproumetre, à la fin di fin, sarié que te veguèsson de longo barrula coume fas emé iéu, iéu qu'apele moun cachimbau Titino e qu'ai fa de vers à-n-uno Jano A***. Que vos que digon li gènt se 'n cop siés ma femeto, ma pi-choto mouié escarrido ?


— Es verai. Vau mai que se mariden.

Acò disènt, ma nòvio touto risouleto de la pòu que venié de me faire pèr s'amusa 'un bri-gouloun de moun atupimen, m'abandounè sa maneto.


A la clarour di luseto, un vièi grihet qu'aviè
passa sa vido dins li cuco de blad de luno,
escriéuguè neste countrat sus li petalo d'aquécli
tuberouso qu'embaimavon; lis estello n'en
siguèron temouin e, amount, lou bon Diéu lou
marquè au cartabèu.



PÈR RIRE



PÈR RIRE



LI COULICO DE BIDANFLET

En setanto, Bidanflet — un pèd-terrous dóu Plan de Grasso — s'engajè dins li zouavo ; en setanto-un, quouro tournè au païs, rapourtè 'no pensiouneeto de 600 franc, un cop de sabre au travès dóu mourre e de coulico rumatismalo, que, quouro ié venien, lou fasien troussa coume un cadèu qu'a avala la saucisso. Ah ! segur, lou papo a souventifes agu de coulico que se n'es mens parla que d'aquéli de Bidanflet.

Un dimenche — èro vers l'acoumençanço de nouvèmbre — lou mesquin se capitè à la beveto emé quauqui vesin : fasié 'no d'aquéli

bèlli journado d'autouno coume se n'en vèi que dins nòstis encourtrado, et nòsti gènt bevien lou soulèu coume de limbert — es juste de dire que bevien pas qu'acò.

L'ex-zouzou èro en trin de counta, pèr lou milieme cop, à si coumpañ, la bataio de Gravveloto, quouro subran venguè blave, s'arrestè de parla et se boutè à s'esquicha lou vèntré emé li dos man.

— Janet, de que as ? ié fai lou gros Autié.

— Ai... ai... ai mi doulour, et s'as de fèn au campas faras bèn de pas espera pèr lou rintra, que vai ploure.

— Oi, vai ploure pèr ço qu'as mau de vèntré ?

— Nàni; mai ai mau de vèntré per ço que vai ploure.

— Se vèi que sies esta zouavo, vai. Te n'en soubro lou goust à farceja.

— Aguèsses li milanto bàbi qu'arpatejon dins ma tripaio veirian un pau s'auriés la testo à couiouneja.

— Tè, agacho moun còu s'es proun gros pèr leissa passa 'quest coulobre. Voudriés pas me faire crèire belèu que i a 'n rapport entre ti coulico e lou tèms ?

— Te dise que tóuti li cop que mi doulour m'aganton lou tèms se cambio quàuquis ouro après.

— Ah ! vai ; charraire !

— Charraire ! vos jouga 'n escut ?

Autié, qu'ero mai sarra dóu boussoun que de la lengo, èro pas trop dispousa à releva l'es-
coumesso ; mai en ausent lis autre que s'entri-
navon à lou galeja, jouguè si cènt sòu. L'en-
demant lis avié perdu emé dos cargo de fèn
qu'avié pas vougu rintra pèr testardige.

Desempièi aquéu jour li gènt dóu Plan acou-
menceron de se fisa di coulico de Bidanflet pèr
si trabai : quau avié de figo en trin de seca sus
lou greissié ; quau de blad sega encaro alounga
dins li galis ; quau de rasin panca bèn madur
i rin, anavo demanda à Janet se poudié li
leissa en placo enca quauqui jour sènso cregne
de malastre, e fasié d'après çò que ié respoun-
dié lou malaut.

Un jour piëi, faguèron mies : lou counsèu
municipau voutè, sur li founs de la couumuno,
uno suvencioun de vinto-un sòu pèr mes au
troumpetoun pèr que anèsse cade matin s'in-
fourma di coulico en questioun e pèr que cri-
dèsse çò que n'èro.

Adounc tóuti li jour s'ausié de publicacioun
dins lou biais d'ecesto : « Moussu lou maire
dóu Plan a l'ounour d'averti sis amenistra que
vèn d'arriba 'no banasto de sardino à 4 sòu
lou kilò : quau n'en vòu a que d'ana encò dòu

Chèchi. Lou publi es tambèn prevengu que vuei Janet Bidanflet a (o n'a ges) de coulico. » E cadun d'agi en counsequènci.

Gràcis à-n' aquéu sistemo arribè jamai lou pus pichot auvàri i gènt dóu Plan, e, en sièis an qu'acò durè, tout lou vilage èro vengu tant coussu que li Grassen, si vesin, siguèron jalous e faguèron tripet pèr faire veni Bidanflet à Grasso; mai l'ex-soudard refusè d'abandouna sa patriò, emai i' óufriguesson 10.000 franc pèr an au païs dóu *fassun*. (14)

Lis Encian disien que li diéu èron envejous dóu bonur dis ome et que aquéu qu'avié rèn à desira devié tout redouta d'estis amàbli divinita; parèis qu'es toujour parié, dóu mens au Plan de Grasso.

Lou respèt et l'amour de si counciéutadan, que parlavon de i' auboura 'n estatuio, lou plasé de faire l'ur d'uno vilo, empachavon pas que au mai Janet venié vièi, au mai soufrissié de si coulico; n'èro arriba à predire li cambiamen de tems 4 jour à l'avanso; mai fau dire qu'à n'aquelo epoco, quouro malautejavo, ié semblavo que lou fasien dansa après i' avé fach avala mié-quintau de terraïoun et de quiéu de flasco.

Enfin, un jour de fièro, passè 'n mège-barruleire, emé un casco e' no couirasso daurado, quiha sus un càrri à sièis chivau, emé douge


musicaire au d'aut que fasien un tau zin-boun-boun que li vitro n'en retrounavon. A l'entendre vendié'no menestro que garissié tout e lou rèsto — es de dire qu'en fèt de mège i'a pas que li barrulaire que canton aquel inne. — Dire qu'aquelo poutitè avié vertadieramen tóuti li qualita que ié baiavo soun inventaire, acó sarié belèu s'asarda ; mais ço que ié a de segur es que, au bout de vue jour que se n'en servié, moun Bidanflet siguè gari ; mai gari coume s'avié jamai rèn agu.

Tout lou Plan tardè pas à aprene acò : i agué'no revoulucioun. Lou mège aguè que lou tèms de davala à Cano, au triple galop de si sièis bèsti, emé si musicaire que fasien plus zin-boun-boun, e lou pople dóu Plan — *ignobile semper vulgus* — ataquè Janet, *lou traite*, au juge de pas pèr que agantèsse mai soun mau, pèr causo d'utileta publico.

Sabe pas coume aurié juja l'ome de lèi ; mai ço que sabe es que un bèu vèspre lou vièi zouavo, lou cor tristas, tanquè soun oustau e s'enanè peréu à Cano ounte, aguènt fa veni soun Sant-Miquèu, resté fin que lou bon Diéu lou sounèsse dins un mounde pas tant ingrat que lou Plan-de-Grasso.



Chancery and Parliament, and the Queen's
Court. A representative of the church visited
the court to represent the interests of the church
and at the same time to act as a mediator
between the church and the state. This
relationship between church and state was
continually strained or very violent. It was
the chief duty of the church to maintain
order and good order and to prevent
any disorderly conduct among the people.
The church had the power to banish any
one from the church if he did not follow
the religious rules of the church. The church
had the power to excommunicate any person
who did not follow the religious rules of
the church. The church had the power to
banish any one from the church if he did not
follow the religious rules of the church.
The church had the power to excommunicate any person
who did not follow the religious rules of
the church.



LOU FOQUE DOU TRAIAS

— Bèu tèms per ana ' la pesco, me dis un coumpañ, adematin, sus la Marino.

— Encaro mai bèu tèms pèr ié pas ana, ié rebrique.

Ah ! Es que se jamai me i' aganton mai !....
N'ai proun d'un cop.

Jamai la pesco m'avié rèn di. Fauguè un de mis ami — un Marsihés, saludas — pèr me faire tasta li plesi d'aquel eisercice.

Un matin, Rabatel — es lou noum d'aquel enfant de la Canebiero — me touumbo sus li bras.

— Moun bèu, me dis, vène passa quàuqui jour emé tu.

— Encanta.

— Vole pesca un pau dins vòsti calanco. A Marsiho tóuti li pèis me connèisson ; tambèn, entre me vèire, se lou dison e fan lou vuege à dos lègo à moun entour.

— Brave ! Te menarai pesca de foque.

Rabatel faguè un saut en arrié.

— Hè ! De foque à Cano ? De baleno passo encaro. Mai siés pus Marsihés que ieu, bèl ami.

— Siéu pas Marsihés e mi foque soun pas à Cano, mai au Traias, uno calanqueto que s'es-cound dins li roucas rouge de l'Esterèu. Coume tu ai long tèms douta de soun eisistènci mai lou coulègo Jourdan me lis aguènt fa vèire, siguère bèn fourça de me rèndre à l'evidènci. Coume èi que ié soun vengu ? Dé-que ié fan ? Acò, noun lou sabe ; mai pèr i 'estre, ié soun.

— Anen, vague pèr la pesco au foque, diguè Rabatel mai persuada que jamai que lou gale-jave.

Quàuqui jour après, un bèu deminche de Juliet, prenian lou trin dóu Traias emé tout noste prouvesimen. La journado s'entrinè mau. Rabatel, qu'es d'un tuclige Sarceyen, coumencè pèr louja sa cano dins l'iue d'un ome d'équipe, pièi acrouquè son carnié à la biasso d'uno chato, marchè sus la raubo de la marqueso de B... e 'scampè, dins lou vagoun, un pot de quitran sus la faquino d'un substitut. Recoulè

touto meno de maladicioun, s'escusè e ié pensè pas mai. L'abitudo es uno segoundo naturo.

Au Traias, tuieran lou verme — uno tèsto d'aiet em' un pan, — e prenguerian nòsti pou-sicioun. Moustrère à moun coumpan lou roucas ounte restavon li foque e m'aliuenchèrè pèr assaja de prene quicon de mens proublemati. Mai coume fasié caud meteguère mi ligno à l'aigo, calère mi cano emé de code e, bourrant moun cachimbau, anère faire la radasso sus un mouloun d'augo ounte pantaière touto meno de bèlli causo.

Au bout d'uno passado Rabatel arribè :

— Digo ? Te crèses que mi ligno sufiran pèr aganta un foque ?

— Coume tròni vos que t' hòu digue ? N'ai jamai aganta. Pamens es permes de n'en douta.

— Es verai. Auriéu degu croumpa un arpoun. Sarié 'sta pus segur.

E s'entournè à soun posto. Dès minuto après èro mai aqui.

— Digo ? Fau-ti leissa flouta la ligno o se fau *fouita* ?

— Mai n'en sabe rèn. Garco-me la pas.

Pèr lou segound cop, s'aliuenchè. La mar èro bluio, lou cèu èro blu, mi pensado èron rousenco, l'augo sentié bon; ère bèn. Ai-las ! Durè pas long tems. Au moumen que teniéu li

dous proumié vers d'un sounet ausiguère un duò is acènt fourmidable bèn que lountanié. Rabatel cridavo : « Tène lou foque ! » Uno voues de femo bramavo : « Ajudo ! A l'assassin. »


En dos cambado fuguère auprès de moun malurous ami que, d'un èr nafra, regardavo uno femo arpateja au bout de sa ligno. Recouneiguère la maire Artel, la mouié d'un douganié dóu posto vesin. Aguère pas besoun d'esplicacioun. Rabatel, vesènt vaigamen dins l'aigo un èsse vivènt que sa visto courto l'empachavo de destrià, avié *fouita* e arrapa emé soun musclau, la maire Artel que prenié un ban.

- Ounte es que l'avié arrapado ?
- Leitour, sias curios. Sachés pamens que lis emisfèri de Magdebourg...
- Coumpréne.
- Que voulès ? D'ùni prenon li femo pèr lou cor. Rabatel li pren pèr ounte pòu.

Mai es quouro fauguè leva lou musclau que siguè pas drole. Jujas un pau se siguèsse esta un arpoun !!!

Tambèn, venés me parla de pesco, e subretout de pesco au foque.





PLUS DE FRÈI I PÈD

Talo èro la deviso d'Atenidor Palaisand, mecanician de la rafinarié *Limanet gèndre e Bellicot sogre*. Es que touto sa vido, lou malurous Atenidor avi' agu frèi i pèd. Avié bèle agu à 'scampa dins si debas de moustardo, de pirètro e de sau marino, s'envertouia li pèd dins li fueio li mai encendiàri, la *Lanterne e l'Intransigeant*, preisèmple, tòuti sis esfors avien fa chi. A la fin di fin, desespera, s'èro marida. Sa mouié i' avié proun souvènt escaufa lis auriho ; li pèd, jamai.

Enfin, poudènt plus ié teni, Palaisand s'em-

barrè dis soun chambroun, abenè un tiro-rego, esclapè un escaire e, au bout d'un mes, s'es-cridì coume Archimèdo : *Eurèka*, que prou-nunciavo *Eurèké* perqu' èro de Tarascoun.

Avié efetivamen *eureka* uno nouvello meno de caussuro, un cap-d'obro vertadié. Ero de patin dins lou biais d'aquéli qu' emplegon li panard pèr alounga sa cambo la pus courto, emé de simello de 4 centimèstro d'aut, cavado en dedins e dins li qualo se metié de toumeto de carboun coume dins li banqueto de viage.

Noste mecanician faguè sis assai e, après avé pres un brevet, redeguè un rapport au menistre de la guerro pèr ié faire adóuta soun *godihot* nouveau moudèle. Lou menistre de la guerro, — qu' èro un ome mau educa, — ié respoun-deguè meme pas.

Un jour venguè ounte Atenidor deguè ana faire quàuqui jour de service coume reservisto. Ero au gros de l'ivèr e noste ome avié lou tremoulun rèn que de pensa que belèu ié leissarien pas si soulié fantasié. Lou fèt èi qu'aguè bèl à-n-esplica à l'ouficié d'abihamen tòuti lis avantage de soun envencioun, n'en reçaupè qu'aquesto responso :

— Sabès, se venès eici pèr faire lou levènti, me cargue de voste afaire. *Roumpès.* »

Atenidor *roumpeguè* e s'enanè remisa sis

escaufo-pèd encò de la cantinièro que se n'en serviguè pèr estira li camiso di rengaja.

* *

— Deman, dissato, à 3 ouro, revisto dòu courounèu dins la court dòu quartié. Lis ome saran en tengudo de campagno...

En ausènt lou sarjant majour legi aquelo partiò dòu raport, Palaisand sourriguè. Avié encaro *eureka* quaucarèn : lou biais d'impausa si *godihot* à l'amiracioun dòu courounèu em' au menistre de la guerro. L'endeman, sènso boufa mot en quau que siguèsse, de soun idèio, anè quèrre si soulié, ié boutè de carboun, l'atubè e s'alignè dins lou rèng sènso s'avisa que derroumpié la gamo decreissènto dòu rèng de taio. Lou courounèu, s'estènt plaça au mitan dòu carra, fàci au drapèu, cridè à-de-rèng li coumandamen : « Pourtas vòstis armo ! — Presentas vòstis armo ! — Au drapèu ! »


Desempièi quauque tèms uno óudour de rima empouïounavo lou regimen. Soulet Atenidor l'arremarcavo pas, aguènt cassa un rau-mas dòu cervèu que ié paralisavo l'oulfaitiéu. Subran uno coulouno de tubèio mountè tras li rèng de la 4° dòu 2 e, au grand escandale de tòuti, se veguè un simple fusilié quita sa plaço

e s'enfugi au pas de courso, dins uno nivo,
coume un diéu classi.

Aquéu soudard èro Atenidor que si soulié,
susmena pèr la cantinièro, avien pres fiò. N'en
siguè quite pèr un mes d'infiermarié em' un
mes de presoun.

E desempièi a tournamai frèi i pèd estènt
que se mesfiso de soun envencioun.





LOU NEGADIS

SCÈNO POUPULARI

Dins lou jardin di planto un poulicié caligno uno « nounou ». Arribo un estrangié à la mino arèbro, que s'apreiso dóu bassin e pauso soun capèu au sòu em' uno biheto sus.

LA NOUNOU. — Vé ! Vé ! Aquéu ! Sèmblo que se vòu nega.

LOU POUPLICÉ. — De que vos que me fague ? Que se nègue.

LA NOUNOU. — Diéu garde ! Es que me farié vira lou la, sai.

LOU POUPLICÉ. — Alor l'en vau empacha pèr l'amour de tu. Tout pèr li femo.

LA NOUNOU *assajant de veni roujo*. — Oh ! d'aqueu Tistet ! (*à despart*) : coume es galant.

Au moumen que lou poulicié s'avanso d'éu, l'estrangié cabusso dins l'aigo, La nounou fai un crid e toumbo sus un banc en fasent d'iue

*de cabro morto. Vèn de mounde de tout caire.
Un mège courre pèr tira lou negadis de l'aigo.*

LOU POULICIÉ *l'arrestant.* — Leissas, au noum
de la lèi. Fau que lou coumessàri fague li cou-
tatacioun.

LOU MÈGE. — Aquelo empego ! Sias fòu,
l'ami ? Es bessai panca mort, vau assaja de lou
reviéuda e levas-vous de davans.

*Arribo uno sort de femo e de pichot qu'en-
touron lou bassin, lou mège, lou poulicié e lou
paure mesquin, en charrant à grand brud.*

MISÈ GARCETO. — Es pas trop lèu que ve-
guen un pau quaucarèn. Despièi qu'an refourma
la poulico es uno abouminacioun. Se vèi plus
de nega, nimai d'assassina, pas même un
soulet pichot ibrougno. Sabès ? d'aquéli bèus
ibrougno d'antan, que falié douz o tres ome
pèr li mena. Que rire, digo, Nanoun, quouro
i' avié de testard que voulien pas i' ana e que,
un cop bèn estaca coume de saucisson d'Arle,
li tirassavon au vióuloun sus un caretoun. Aro
i' a plus rèn pèr vous amusa un pau.

MISÈ ESTRIPÈTI. — Es coume lou fiò. Aro
qu'avèn de poumpié, agués pas pòu qu'ausen
la raido. Crese qu'aquéli feiniant an chapla li
cordo di campano pèr pas èstre derrenja. Pa-
mens, que plesi quouro lou toco-sin vous fasié
leva à miojo-niue em' uno fre dóu tròni e que

vesias cadun naseja à l'estro e espincha emé
d'ieu boudenfle, uno grando lusour rouginasso
s'aubourant dins lou cèu negre, de l'autre las
de la vilo !

MISÈ JUVERT. — Es verai. Aro vous mou-
fissès detras lou coumtadou, dòu jour de l'an
à Sant-Sivèstre. Té, ieu, talo que me vesès,
i' a belèu dous an qu'aviéu plus ausi crida au
secours.

MISÈ PETASSO. — Tout acò s'apren mai à la
Republico.

COR DI FEMELAN. — Eto ! Acò 's segur.

MISÈ JUVERT à soun drole que se charpino
em' aquéu de Misè Laurige. — Que ! Te vos
teisa, gusassas ?

TOUNIN plourant. — Es pas ieu.

MISÈ LAURIGE. — Oh ! segur sara mai Pau-
loun qu'aura fa lou cop. Aquéu bandoulas a
coume soun paire : fau toujour que pique
quaucun. (*Ié garçant un bendèu*). Tè, aganto.
Tu, au mens, te li pode rèndre.

*Pauloun, enrabia, bachasso au sòu à grand
cop de pèd e fai voula 'n neblas de pousso au
nas de la coumpanié.*

COR DI FEMO lagremejant e se tapant lou nas.

— O brutelous ! — Canaio ! — As feni o
t'ajude ? — Vé, lou quiéu !

MISÈ LAURIGE. — As pas crento de te coum-

pourta 'nsin davans la mort, que? (*I femo*):
Quand vous disieu qu'ero coume soun paire
qu'a pas mai pòu dòu bon Diéu que de Cifèr.
Espèro.

*Aganto soun eiretié, lou desbraio e maco à
tour de bras. Pauloun, revengu libre, s'enfugis
en bramant.*

MISÈ GARCETO. — Tambèn, perqué l'avés
adu, aquéu maufatan? Acò's gaire un espetacle
pèr lis enfant.

MISÈ LAURIGE. — Es pèr l'abitua : vòu èstre
mège.

*Dous ome an mes lou cadabre sus uno escalo
e lou porton à l'espitau.*

LOU POULICIÉ *i femo*. — Anen, fagués plaço.
Degun boulego.


MISÈ GARCETO *renarello*. — Segur, aro s'en
fau enana qu'avèn quàsi rèn vist gràcis à-n-
aquéli galapian. Avans que aguen mai uno
pariero óucasioun...

LOU POULICIÉ. — Zóu! Filas, vous tourne à
dire, filas.

MISÈ JUVERT. — E que vòu, aquéu, emé sa
filasso? Que se la mete ounte sabès, ié poudra
siervi se jamai aganto lou colera.

E li femo s'en van en repepiant.





LA DINDO

I'a en estetico uno teourié que vòu que la vertadiero bèuta sigue bèsti. Efetivamen, l'esprit estènt une qualita de l'amo, se d'asard rejisclo sus lou cors, la bèuta d'eiceste n'es plus puro amor que se coumpauso pas esclusivamente d'elemen plasti.

Vaqui perqué pas une estatuio oubrado pèr li Grè — aquéli de tóuti lis artisto qu'an lou mies persounifica la bèuta puro talo que la coumprenen, — vaqui perqué pas uno estatuio grègo a l'èr esperitau.

Acò vous esplicara coume vai que Chechin, moudèle de moun ami Barbo-de-sedo, pintre decadènt, es uno fiho esplendido au pount de

visto fisi mai, au mourau, d'uno bestiso à faire pantaia lis auco.

Barbo-de-sedo, pèr avé de coumando, avié cresu pousqué abandouna 'n moumen sis idèio pèr lou classicisme. Avié dounc pinta 'no Naiado qu'èro rèn autre que Chechin, en abihage lóugié, vougant sus uno mar bluro, dins uno couquiho nacrado tirassado pèr d'ipoucamp. Ai las ! Lou prefum d'incurable bestige que respiravo la caro de la *Naïdo* i'avié vaugu d'estre rebutado au saloun em'uno unanimeta pretoucanto e li *rapin* galejarèu avien autant lèu bateja lou tablèu de Barbo-de-sedo : *la rèino di muscle vesitant sis estat.*

Après aquelo mau-parado, lou paure pintre aurié bèn larga Chechin se Chechin èro estado que soun moudèle !

Mai vaqui : Chechin èro pas que soun moudèle.

E quouro derrabavo de pajo à-n-un incunable precious pèr se faire de papihoto ; quouro ciravo li soulié emé de *negre d'evòri* que voulié plus seca, etc...

La vèio de Nouvè capitère Barbo-de-Sedo que barrulavo tout malancòni.

— E bèn, bèu, coume vai ?

— Ah ! moun paure vièi, vau mau. Creiriés-ti qu'aqueleo pèco de Chechin aguènt plus ges

d'òli, ma fach uno meleto emé d'òli d'uieto, disènt que d'òli de flour acò poudiè èstre qu'eicelènt.

— Coume, d'òli de flour ?

— O. Se cresíe que l'òli d'uieto siguesse tira d'uiet femèu.

— Ah ! poulit ! Forço poulit !

— Mai tu, que fas aqui ?

— Eh, espère que me toumbe uno dindo touto roustdido pèr festejà Calèndo que te couche un d'aquéli merlus !...

• • • • • • • • • • • • • • •
De vèspre tubave uno pipò au caire dóu fiò quouro quaucun piquè à la porto. Anère durbi e siguère pas pau estouna de vèire intra Chechin...

— Escusas-me de vous destourba, moussu, mai voste ami Barbo-de-sedo m'a pregado de vous adurre aquesto letro. Parèis que presso.

Dessagelère la letro que Chechin legiguè pèr dessus moun espalo. Uno femo que legirié pas uno letro pèr dessus l'espalo de soun destinatàri sarié renegado de si semblablo. E sabès de que i 'avié dins aquesto letro ? Tout just eiçò :

« Moun brave ami,


« Esperaves uno dindo ; permete-me de

t'óufri eicesto. Es pas enrabassado mai es digno de l'estre. »

Vous cresès belèu que la mesquino se boutè en iro en vesènt ço que Barbo-de-sedo disié d'elo ? Ah ! pamai ! Me demandè grevamen :

— E bèn ? Ounte diàussi es aquelo dindo ?





LA CASSO A L'AGACHOUN

Li marrit tèms di quau M^u Stüblein nous menaço van faire passa lèu-lèu au nostre forço aucèu en quisto de climat mai abelan. Sarié dounc que tèms de croumpa si chilo e de remounta si cimèu se sabian cassa à l'agachoun; mai li Canen sabon pas cassa à l'agachoun e 's ço que fai que li Marsihés li regardaran sèmpre de l' aut de sa grandour.

Es que rèn n'es tant facile — e tant deficile, tout ensèn, — qu'aquelo meno de *sport*. A

meme si dangié, sènso que se n'en douton, e vous n'en charre saventamen. Ai un ami que n'en es mort.

Ié disien Marius, coume en tout bon Mar-sihés. Marius de que? Marius quau? Devié avé un noum de famiho aquel ome — i' a tant de gènt qu'an de noum de famiho. — Es de crèire mai n'en sabe rèn l'aguènt jamai ausi apela que *Moussu Marius*.

Moussu Marius èro esta trènto an de tems *fabricant* de safran. La descuberto d'uno ocro inedicho avié fa sa fourtuno e, à 45 an, s'èro trouba emé dès milo liéuro de rèndo e un trop de graisso que lou menaçavo d'apouplèssi foudrejanto au proumié boui-abaisso un pau arousa de vin de la Nerto.

Li mège i' ourdounèron de faire d'eisercice, forço eisercice, e ié recoumandèron la casso. M^u Marius i' óubeïguè de soun mies e, en bon enfant de la Canebiero qu'ero, se faguè basti un posto.

Adounc, cade matin, sus li 5 ouro, tre que li proumié passage èron signala, M^u Marius, bèn persuada que s'anavo douna de mouvement, se levavo, cargavo un àbi de casso, en velout, que si pòchi vierge dóu sang dóu gibile, èron legioun; couifavo uno barreto en pèu de reinard, agantavo soun *choke-bored* e s'en

anavo à soun agachoun, à l'autre bout dóu jardinet de soun cabanoun.


Aquel agachoun — coume tóuti si parié, — èro uno meno de tourre de patòu trauquihado de lucarno de tout caire, coume uno bresco. Au dedins, un pichot armari caupié un flasco de Martel ***, un saucisso, de cartoucho e lou libre en leituro. Cade matin dounc, M^u Marius i' atubavo de fiò dins un pichot *poële*, tuavo lou verme, anavo pendoula si chilo i bigo di cimèu pièi revenié s'embarra li pèd au fiò, lou cachimbau i dènt, li *Trois Mousquetaires* à la man, esperant un gibié de bono voulounta ; mai, coume sorre Ano, vesié rèn veni.

E i' avié quinge an que — coume sorre Ano — vesié rèn veni. E pamens, cade jour èro à soun posto — es lou cas d' hòu dire, — lou fusiéu carga, li cartoucho estalouirado sus uno tauleto. Sis aucèu avien bèl à chica, rèn, toujour rèn.

Enfin un jour — erian dóu mes de Desèmbre, un divèndre e un trege — M^u Marius, que n'èro au *Vicomte de Bragelonne*, ausiguè un pichot brud. Levè lis iue e veguè quaucarèn de negre dins li branco de soun cimèu. Ero-ti bèn un aucèu ? Mai veraï ? Un aucèu ? Ero-ti pas quauco pampo acroucado aquito pèr lou mistrau trufandié ? Mai li pampo an pas l'abi-

tudo de faire *cuic*. A-n-aquéu piéuta M^u Marius toumbè rede mort. La visto inesperado d'un gibié, pèr tant pichot que siguèsse, avié desermina en éu l'ataco que lou menaçavo despièi tant de tems.





LA LETRO NOUN AFRANQUIDO

Jan-di-Mato es lou pus gros abarous de Prouvènço emai de Franço. De soun mestié es marchand de magnan e res s'entènd coume éu à vous faire passa un eitò de *feble* dins un kilò que vous vènd; fau d'aiours vous dire qu'es un Eiraguen, or — coume sabès — en Eirago se vèn à quaucun l'idèio de crida au laire tóuti lis abitant s'estrèmon à quau pus lèu.

Adounc, dimar passa, mèste Jan èro en trin de trissa de grano, quand lou pedoun ié ven-gùe adurre uno letro noun afranquido e ié reclama li 6 sòu.

— La vole pas aquelo letro, iéu, bramo l'espagnèti; es belèu un marrit tour que me volon jouga. D'ounte vèn ?

— De Nimes.

— De Nimes ! Pamens s'èro uno coumando impourtanto. Sabe pas dequé faire, vé.

— Basto ! prenés-la. Pèr un cop n'en mourirés pas.

— N'en mourirai pas ! lou sabe proun, mai sièis sòu es sièis sòu e, dins lou coumèrci subretout, i' a ges de pichoto ecounoumio. Siguèsse segur que n'en vau la peno la prendriéu bèn. Veguen, déurriés me la legi, que iéu sabe pas, e veiriéu après ço que sarié de faire.

Lou pedoun — falié que siguèsse dóu Martegue o de Sièis-Four — estrassè l'embalun e, de sa pus bello voues, legiguè uno flamo coumando de 2,000 kilò de magnan à 3 fr. 70.

— E bèn ! fai pièi, sias countènt ? Crèse que poudès bèn paga acò trento centime.

— Es çò que t'embulo, moun ome, la vole pas aquelo letro; siguèsse esta 4,000 kilò, o; mai pèr 2,000 es pas proun.

— E qu li pagara li sièis sòu ?

— Sai ! Tu, se vos, pèr iéu m'es egau. Adiéu, siéu pressa, ve, vau alesti çò que me demando lou papafar.


Lou pedoun aguè bèl à crida, menaça, su-

plica, aurié pulèu desavia Sarah Bernhardt que de tira un pata-de-clau de Jan; siguè fourça de baia li dardèno de soun boussoun e se counsoulè coume lou corb de la fablo en se jurant — mai un pau tard — que l'agantarien pas plus.

E Jan-di-Mato, dóu cop, gagnè quàuqui milo franc que ié faguèron pas peno.



and the most recent records of the same, will
be furnished to all of the members of the
association, and every member shall have the
privilege of writing his name upon the same.
The association will be composed of
members from all parts of the world, and
will be open to all persons who are willing
to become members.



LOU CASSAIRE

I' a Pauloun-lou-Nèsci que, despièi tout aro quaranto an, vai à la casso tóuti li jour que M. lou prefèt ié permete; mai a bèle à chanja de fusiéu à cade nouvèu sistèmo, courre de lègo e de lègo, e, pèr la Sant Ubert, s'empega religiousamen en l'ounour d'ou patron di cassaire, sa biasso que tiblo à la partènço, flasquejo à l'arribado tant que pòu.

Acò 's d'autant mai espantaiant que, d'ou tems qu'èro sóudard, Pauloun a gagna li cadeneto emé lou cor d'argènt, e que, i fiero, es toujour éu que gagno lou mai de cigaro en pèu de castagno.

— Mai, Pauloun, ié fai un jour un de si cambarado, coume vai que jamai tuies rèn ?

— Sai ! fai Pauloun.

— Enfin, tu que manques pa 'n cop lou trau, coumprène pas que agues tant pau de chabènço. Pamens tires à la voulado ?


— Pancaro : tire qu'au pausa.

— Au mens, aviso-te se desquihes ges d'aucù, de ges fusiha de gënt.

— Oh ! pèr acò sigues tranquile : quouro vese un auceloun sus uno broco, avans de ié tira, cride tant fort que pode :

— I' a degun eila darrié ?





L'OURIGINO DI FLOUR

LEGÈNDO CANENCO

En vesènt, adematin, noste marcat di flour tant bèn prouvesi de roso de tòuti coulour, de crisantèmo jaune, de ginóuflado roujo e blanco; en aspirant à plen pòumoun aquéli prefum embausemant, tout ensèn tant dous e tant voluptous, uno idèio m'es vengudo, car ligèire, de vous racounta la creacioun di flour.

Vaqui dounc ço qu'ai destousca aqui-sus, dins un eisemplàri — lou soulet couneigu jusco vuei — d'uno edicioun de la Biblo facho à Sàrri-Patàrri-foro-Prouvènço.

Dins lou Paradis-Terrèstre, lis aubre proudusien li frucho direitamen, sènso s'atarda à douna de flour car, d'aquéu moumen, sa souleto utileta èro de nourri Adam e Evo qu'avien pas lesi de faire la cousins de tant que s'óupilavon à remedia à la depoupulacioun de la terro, depoupulacioun qu'èro bèn autre qu'aquelo de la Franço d'encuei. Adam, enfada pèr la bèuta de sa mouié, pèr si long péu blound que retrasien à-n-uno flamo tirassado de trelus quouro floutejavon au vènt; enebria pèr aquéu prefum especiau que lis Italian an tant bèn bateja : *odor di femina*, Adam, vous tourne à dire, pensavo qu'à-n-ama em' à-n-èstre ama, ço que, pièi, poudié bèn pas èstre lou biais de viéure lou mai enfetant.

Mai vaqui : nosto bono maire Evo èro lengudo, forço lengudo meme. Tant qu'elo e soun ome resteron au Paradis-Terrèstre, Adam trouvè 'quéu bavardage agradiéu (que i' a de mai dous que de charra em' aquelo que l'on amo, souto uno teso, quand siguèsse uno teso paradisenco ?) Mai quouro Adam se veguè fourça — pèr s'èstre leissa mena pèr aquelo lengo daurado, à manja uno poumo — de tra-baia la terro, de se leva la pèu de-longo, l'envejo de barjaca ié passè e n'arribè à plus poussé ausi sa coumpagno que, elo, avié pas perdu

soun caquet e avié capita un bèu sujet de counversacioun dins la perfidio de la sèrp.

Adam faguè tripet-pelòri pèr courregi sa femo qu'amavo toujour, aguènt d'aiours d'ei-celènti resoun pèr ié resta fidèu.

La lifreto èro sempre-que-mai pourido e 'nebrianto, e pièi ! avié 'n biais tant galant de pourta sa pampo de vigno !... Mai passen sus aquéu sujet cremant e diguen que caranchouno e cop de barro serviguèron de rèn e qu'Evo leguè l'amour de la parloto à si feleno, coume cadun lou saup.

Mai lou bon Diéu, vesènt qu'Adam èro à mand de veni enrabia e que Pasteur arribarié fatalamen trop tard, lou bon Diéu se diguè de ié baia quaucarèn qu'aguèsse la gràci de la femo, li toun rousen e neven de sa car, la finesso de sa pèu, un prefum encaro mai enclusclant que *l'odor di femina* qu'avèn parla pus aut, e que noun aguèsse lou doun de la paraulo.


E lou bon Diéu creè la flour e lis ome pousseront èstre urous.

Mai Evo siguè pas countènto e, desempièi, li femo soun jalouso di flour. Vaqui perqué aquéli gusas de pouèto que calon davans ges de mejan pèr engana si countempourano, ié

canton sus tóuti li toun qu'an un ten d'ile e de
roso.

Vaqui tambèn perqué li chato an trouva de
bon goust de faire li muto davans si pretendu,
quito à prene soun revenge se 'n cop saran ma-
ridado.





LOU RETRA

Ero un drole de meinage lou meinage Bou-sin : éu, Evaristo, èro persuada de coumpli tóuti si devé de marit en espóussant lis arno à sa mouié dous cop pèr jour; elo, Petarisso, se cresié tambèn à la sousto de tout reproche bord que, coume lis àutri femo, fourçavo soun espous à pourta *gibus*.

Mau-grat tutto ma galantarié, siéu bèn ôublia de douna resoun à-n-Evaristo qu'avié pèr éu un article dóu Code.

Enfin après trento an d'aquelo galèro, lou pauras agantè 'no puresio e partiguè pèr l'autre mounde emé tout lou sant-plan d'uno couns-

ciènci puro. Petarisso pourtè lou dòu e... cerquè un autre espous; mai, lico, lico ! Dégun dins lou vilage se cresegùè l'os frountau proun soulide pèr pourta la courouno nouvialo que i'alestissié la véuso e'cesto, rebutado de tout caire, faguè coume fasèn tóuti : elo qu'avié tant crida contro soun ome dòu tèms que l'avié, lou regretè quooro l'aguè plus, acò's dins la naturo umano; que voulès ? I'a que li foun ciounàri que — noun sabe perqué — soun toujour mai-que-mai partisan dòu régime qu'an. Quauque jour farai un estudi filousoufique aquí-sus.

Basto, nosto Petarisso n'en venguè à-n'avé un culte pèr lou paure mesquin e, lou pouquent plus avé en naturo, lou vouguè en image. Anè dounc vers un foutougrafo de l'avesinanço :

— Voudriéu lou retrá de moun ome en foutougrafio.

Lou brutejaire, que de tèms en tèms fasié de pinturo d'ès-voto, vesènt en quau avié afaire ié diguè :

- En foutougrafo ? Sias dounc bèn pauro.
- Ai bèu cènt escut de rèndo...
- E'm'acò voulès uno foutougrafo ?? Mai, santo femo, se vous respetas, fau vous fa faire un bèu retrá à l'òli. Dequ'es la foutougrafo ?

Rèn, subre-tout aro emé lis estrumen istantana.
Ve, toucas lou boutoun, lou trau se durbis....

— Sabe ! Sabe !

— Acò's pas d'art ! Es un travai mecanique.

— Mecanique ! Lou pichot dóu vesin a un chivau mecanique que camino soulet. Vole pas moun ome ansin que, se poudié tant sié pau boulega un det, acoumençarié mai de me tabassa.

L'artiste i'espliquè ço qu'avié vougu dire ;
mai pamens Petarisso se decidè pèr un retra à l'oli.


— Eh bèn ! ounte es voste ome ?

— Es mort.

— Alor avès quicon pèr m'ajuda à faire moun esquisso ? Pode rèn faire sènso saupre coume èro voste marit belèu.

— Mai enfin, rebequè la véuso em'ourguei,
me prenès pèr uno bèsti ? Tenès, vaqui soun permés de casso ; i'a soun signalamen.





L'ESCLUSSI

Zerbinio, la servicialo d'ou reitour d'Auribèu,
es la pu bravo femo que se posque vèire. Talamen,
que se Cocò a plus qu'uno bato, vendra
à l'idèio de degun qu'es Zerbinio que i'a coupa
l'autro. È pièi, causo espetaclouso, emai sigue
doumestico de curat, es pas renarello, mai aqui
pas renarello de tout.

Pamens, au moumen d'ou darrier esclüssi de
luno, se boutè en iro pèr de bon, e fau dire
que n'avié pas tort. Ero en trin de faire vira à
l'asti un bèu dindaras enrabassa, e de fregi
dins uno sartan larjo coume un ban-de-sèti,
un *crespèu* que tout-bèu-just acoumençavo de

bloundeja, quand moussu lou curat, tout susarènt, se precepitè dins la cousinso :

— Zerbinò ! Lèu ! lèu ! Fai-me soupa, qu'entre acaba vole ana vèire l'esclüssi.


La pauro vièio, tout en se despachant, demandè ço qu'èro un esclüssi. Pecaire ! lis astre em'elo se trevavon pas gaire. Mai tre saupre de que significavo aquéu mot nouvèu, se pausè li man sus lis anco :

— Es pèr acò que voulès manja 'n dindard enca rouge em'un crespèu pas proun kiue ! E bèn, moussu lou curat, s'avès uno endigestioun aquesto niue, poudès couumta que vous plagnerai pas.

E Zerbinò, furiouso, tournè à sa cousinso en repepiant : « D'esclüssi ! D'esclüssi ! Sabon plus dequ'inventa aro. N'iavié d'esclüssi de noste tems ! »

E t'aubouravo lis espalo !





LOU PARO-PLUEIO

Tron d'un goi! Qu'èi dounc brave de se counta d'istòri entre ami... qu'an ges d'ilusioun sus soun autenticita. E, bord qu'es vuei neste cas, vous n'en vole narra uno que m'apren-gueron aquest ivèr, au caire d'un bon fiò de gavèu, bèn clar, que petejavo galoiamen en nous remembrant Calèndo que s'avançavo.

Veici dounc çò que nous disié lou capitàni Moustardac, un Toulousan s. v. p.

« Estènt en garnisoun à Mountpelié, faguère cuneissènço d'un brave ome nouma Filòri qu'abitavo en ribo de Lez un cabanoun — un *maset* coume dison eilavau — de tres mèmbre,

cencha d'uno pichoto plato-bando ounte poussavo un sause. Despièi la mort de si gènt, Filòri vivié 'qui de si pichòti rènto, legissènt au pèd de soun sause tòuti li raconte de viage que poudié rescountra, estènt qu'avié la manio dis aventuro de terro e de mar e ié desfautavo que l'argènt pèr veni tant celebre que Cook o Magalhaës. Lou malurous avié qu'uno desiranço, qu'uno passioun e noun la poudié satisfaire !

« Mai Diéu lou vouguè pas faire mourir de desesperanço à la flour de l'age e Filòri faguè un eiritage de 300.000 franc. Lou memo jour soun itinerari èro arresta. En esperant de touca li founs faguè si paquet e, pèr se remembla dins sis escourregudo lou maset dòu Lez, coupè à soun sause dos supèrbi branco di quau l'uno siguè trasfourmado en cano e l'autro mountado en paro-plueio.

« Bon nas aguè d'avé sounja à-n-un paro-plueio ! Emai siguèsson en mai, plòuguè sènso decessa li quinge jour que precediguèron sa sa partènço. Enfin, un cop sus lou vapour, Filòri s'agouloupè d'uno vièjo roupo, se couifè d'un capèu de clue e faguè descendre cano e paro-plueio à founs de calo emé lou restant de si viéure.

« Is Açoro lou bèu tèms repareiguè; passè-

ron la Ligno — oun te noste ome siguè tourna bateja — e arribèron à Rio-Janeiro em'uno calour espaventouso.


« Lou viajaire s'alestiguè à quita lou bord pèr se gandi dins l'interiour e faguè mounta si bagage sus lou pont.

« Nàni ! vous farés jamai une idèio de l'atupimen qu'aclapè tout lou moude quouro se faguè aquelo óuperacioun. Lou paro-plueio de Filòri, coupiousamen aiga quinge jour de tèms, avié trabaia souto l'acioun de la calour troupi-caló e se 'n cop lou sourtiguèron de la calo, à Rio, èro cubert de fueio.

« Filòri n'en faguè óumage à la capitalo brasiliáno e se pòu vèire encuei, au mitan de la Plaço de la Constitucioun, un sause magnifique qu'es rèn autre que lou paro-plueio de moun ami. »

.... Vous tourne à dire que lou capitâni Moustardac es de Toulouso.





UN GÈNDRE

QU'AMO SA BELLO-MAIRE

Sias libre de pas me crèire, mai ai couneigu uno dono qu'es morto pèr èstre stato trop amado de soun fihat. Oh! Rasseguras-vous! Lou gèndre avié vinto cinq an e la bello-maire èro à l'aubo de soun cinquante cinquen autouno e 's bèn en qualita de sogro que lou proumié adouravo la segoundo.

Vous anas belèu imagina que M^{mo} V^{so} Renòsi èro un fenoumene, uno bello-maire agradivo, riserello, tèndro, remoulissènto meme, e pas renarello pèr dous sòu. Acò 's pas 'cò. Retrasié pan pèr pan en tòuti si paro e se lou diable sorte plus de l'infèr coume dóu tèms que Berto

fielavo, siéu persuada qu'es perqué Dono Renòsi ié douno estraourdinàrimen d'obro dins soun negre reiaume.

E bèn, mau-grat 'cò, e en vertu dóu principe que dos eleitrica d'essènci countràri s'atrivon, Benezet — lou fihat — qu'ero d'un temperamen móoutounen, escarrissié M^{mo} Renòsi e noun poudié se passa d'elo.

Benezet, en bon founciounàri qu'ero, reçaupe un jour d'avançamen e de Vilo-franco-sus-mar ounte secutavo li countribuable coume receataire dóu Doumaine, lou manderon à Betuno ounte li faguè secuta pèr si sous-ordre. M^{mo} Renòsi refusè sant-alimen de segui lou jouve meinage. Abituado au climat, i coustumo em' i mour dóu litourau prouvençau vouguè pas se trasplanta dins un païs tant diferènt, mau-grat tóuti li voulupta que pousquèsse i' aproumetre lou vesinage d'un gèndre à-n-escarpina.

Un cop istala dins sa novo residènci Benezet s'avisiè que ié desfautavo quaucarèn ; e aquéu quaucarèn èro sa bello-maire. Perfetamen. S'entrinè dounc à la suplica de faire un pichot viage pèr veni vèire sa famiheto : dono Renòsi de-longo proumetié e jamai venié.

Un jour lou malurous se creseguè d'avé trouba un biais. Escriéuguè à soun bourrèu que M^{mo} Benezet èro à mand de lou rèndre

paire pèr la nouenco fes e que lou batisme se farié la semano d'après. La grand mandè sa douno au cago-nis e parlè pas de veni.

Mai lou testardas se tenguè pas pèr batu. S'ero aprumes de reüssi e reüssiguè, lou sacamand! En sa qualita de recetaire dis A. J. couneissié tóutili membre de la Court. Espousè soun idèio à-n-un jouve sustitut e 'iceste decerniguè un mandat d'amena contro « la véuso Renòsi, demouranto e doumiciliado à Vilo-Franco-sur-mar (Aup-Marin) prevengudo de recelamen de viéure rauba à Betuno... »

Vesès la tèsto de bello-mama se 'n cop dous gendarmo ié venguèron metre li manoto pèr la mena à la garo? A cade arrèst dóu trin, avié 'n nouvèl acès de furour e coume lou trin èro onibus fin qu'à Marsiho, poudès juja l'estat ounte devié èstre en intrant dins la capitalo dóu boui-abaisso.

Enfin arribèron. Li gendarmo faguèron escala la pauro mesquino dins lou *panié d'ensalado* e dia ! hi ! Fai tira Marius !

La proumièro persouno que M^{me} Renòsi veguè en intrant dins lou gabinet dóu juge d'estrucioun siguè soun fihat escourta de soun coumplice lou sustitut. Tout flòri d'avé tant bèn réussi à la fin di fin, Benezet ié diguè :

— E bèn? Lou mejan es esta un pau vióu-


lènt mai a encapa. Anan bateja ensèn moun darrieren.

E bèn ! nàni. Aquelo counsoulacioun ié siguè refusado. De blavo qu'ero Bello-mama venguè rousenco, pièi roujo, cremenino, bluro e toumbè redo-morto.

Dins sèt o vue cènts an, quouro l'Acadèmi n'en sara à la letro B de la novo edicioun de soun Diciounàri, ié legiran :

BELLÒ-FILIAU (AMOUR). — *Sentimen contro naturo dóu quau l'istòri pourgis qu'un eisèmple e que siguè fatau à-n-aquelo que l'ispirè.*





L'INNOUCÈNTO

Tant que, au *Borda*, Tòni Gamèu faguè que legi si liçoun d'à rebous pèr que la dificulta lis ié faguèsse mies reteni, si cambarado s'acountentèron de lou galeja; mai lou jour que, nouma aspirant de proumiero e parlant de se marida, diguè qu'espousarié jamai qu'uno chato en qu li jouvènt aurien jamai rauba un soul poutou net, même i *jo-innoucènt*, aquéu jour perdeguèron l'espèr de lou jamai vèire sena e ié prediguèron que mouririé celibatàri.

E pamens se maridè. Tant impoossible qu'eiçò parèigue, Gamèu destousquè à Tou loun la dono de si pantai, que manquè pièi de veni la dono de si pian.

L'ami que me countè aquelo istòri venié d'estre estaca au port di m.... elicóusis óudour pau de jour après li noço de Tòni e aqueste siguè la proumiero persouno que veguè en davant dóu trin; après li primis efusioun, s'avisiè de la mino enfetado dóu nòvi, uno mino longo coume un jour sènso pan.

— Siés bèn triste. De qu'as ?

— Rèn.

— Anen; fau pas faire aquelo à-n-un vièi ami coume iéu. Siéu segur qu'as quicon. Digo-me lou e, se pode, t'ajudarai à coucha 'quelo aragno de toun su.

Gamèu se faguè enca tira l'auriho uno passado, pièi, enfin, se decidè.

— Siéu enfeta, es verai, rapport à ma femo.

— T'aurien troumpa sus la qualita de la marchandiso ?

— Au countràri.

— ???

— Eh ! o, imagino-te que ma mouié es gaio, poulido, roso e blanco pèr endré e que siéu tout ensèn marida... e véuse. Es tant puro, la pauro, que se, la niue, la toque tant sié pau dóu det o de l'artèu, boundo à l'autre bout dóu lié en quilant que fau un pecat... e toujour, à-n-aquélis óucasioun, si pouseto curiouso que vènon faire pinchoun pèr d'aut de sa camiso !

Coumprènes qu'acò me vèngue pièi en òdi.
Enfin ai trouba un biais pèr faire feni aquelo
situacioun ridiculo; ma femo es paurouso,
adounc, se me vos rèndre service, t'escoundrai
aqueste vèspre dins noste gabinet de teleto ; au
mitan de la niue faras de brud, elo se jitara
dins mi bras... e me cargue dóu restant.

Lou mesquin avié trouba qu'aquéu mejan
de coumèdi ! Mai l'ami, qu'acò amusavo e
qu'avié belèu l'espèr d'amira dóu trau de la
sarraio aquelo femeto pourido, redounello,
blanco e rosò pèr endré, l'ami se dounè gardo
de faire remarca à Gamèu que i' avié forço
biais mens róumanesque d'acaba soun pres-fa;
aceitè lèu-lèu e gràcis à l'orre chereverin que
faguè sus li younge ouro, pròchi la chambro de
soun coumpañ, eiceste pousquè enfin tasta lou
bonur, un bonur que se countuniè à peno uno
quingenado.

Ai las ! Au bout d'aquéu tèms ié fauguè
parti pèr dous an à *la mar* e s'enanè au Toun-
kin. Aqui, pèr passa lou tèms, s'óucupè de
gagna de galoun e, quand tournè en Franço, i'
a quàuqui mes, lou capitàni de veissèu Gamèu
toumbè à l'emprouvisto, à miejo-niue, encò de
sa femo que capitè au lié e que, touto tremou-
leto d'emoucioun, ié faguè plaço à soun caire,
uno bono plaço bèn caudo...

Patatras ?


Un chaple de terraio dins lou gabinet de teleto; M^{mo} Gamèu se jito dins li bras de soun ome, assajant de lou reteni; mai Tòni — qu'aqueste cop èro pèr rèn dins lou chamatan — aganto soun revolver, durbis la porto e..... trobo l'ami coumplasènt d'antan que, tout sourrisènt, ié dis en ié sautant au còu :

— Ai saupu à la *Majourita* qu'ères arriba encuei e veniéu mai te porge mi service en cas de besoun.

Gamèu, esmòugu, après l'avé gramacia, lou présentè à sa femo.

Quau èi que risié lou mai? Siéu pas segur que siguèsse Tòni emai riguèsse en deforo e li dous àutri soulamen en dedins.





UN DUÈL

Duèl à l'Uba, duèl à l'Adré, duèl au Trelus,
duèl au Tremount.

Lou vènt es i duèl e sus touto l'espandido
dóu terraire francès, belèu meme un tant sié
pau sus lou terraire de Leopold, tout aquéli
que se respèton escambion de balo o d'estou-
cado. Acò vèn en òdi à la perfin, d'autant mai
qus de-longo es la memo causo : espaso o pis-
toulet.

Ah ! se li Martegau se batien encaro ! mai
despièi l'afaire dóu capitàni Merlandoun, li
Martegau se baton plus. Assistère en persouno
à l'afaire dóu capitàni Merlandoun e vous jure
que siguè quicon de terrible.

Merlandoun coumandavo li poumpié dóu

Martegue, Laflagnolo coumandavo aquéli de Fos, e — pas necite d'hóu dire — li dous capitáni e li dos troupo s'ahissien couralamen. Efèt pretoucant em' inevitable de l'emulacioun ! A cinq lègo à la roundo lis abitant prenien à-de-rèng li part dis un o dis àutri, segound que lou Martegue o Fos troubavo quaucarèn de nou pèr relega l'aversàri au segound plan.

I' avié déjà forço tèms que li Martegau tenien lou rampau gràcis à-n-un casco fenoumenau adourna d'un crestau gigant, quouro lou *Courrié de Fos* anouncié que lou capitáni Laflagnolo venié, après de labourióusi recerco, de trouba uno estofo incremablo, indispensabلو pèr faire li vestimento di poumpié.

« Dempièi aièr, apoundié la fueio en question, nosto coumpanié es de planto abihado d'aquéu biais e nous es en de-bon d'espera, etc... Ounour au capitáni Laflagnolo ! Ounto à si destrataire ! »

I' agué 'n brave chereverin au Martegue aquéu jour. Lou maire siguè à mand de prouclama l'estat de sèti. Se faguè de reünioun publico e, dins uno, Merlandoun declarè qu'un poumpié dèu pas cregne lou fiò, que dèu poudé i' ana tout nus; basto ague soun casco n'i' a proun car, se l'àbi fai pas lou mounge, lou casco fai lou poumpié e li Fossen avien bèl à

faire, si couifaduro avien dous bon det d'aut de mens qu'aquéli di Martegau.

L'*Ouficiau dóu Martegue* reprodugué l'endeman l'óupinioun dóu capitàni Merlandoun e faguè un chaple de Laflagnolo, un endividu qu'aujarié pas ana au fiò emé soun casco pèr touto vestimento. A quel article faguè à Laflagnolo, encaro dins la primo joio dóu triounfle, l'efèt que proudurrié à-n-un deputa un cop de pèd en quauque endré reçaupu en plen courtege óuficiau. Quauquis ouro après tout lou païs sabié que li dous capitàni s'anavon batre en duèl, à la poumpo, d'aqui-que mort d'un di coumbatènt s'enseguiguèsse.

A l'ouro dicho tóuti lis abitant de Fos e dóu Martegue èron acampa au rode counvengu. Li dous aversàri, couifa de si casco, s'avansèron segui de si temouin. Eicèsti li placèron à 50 mèstro l'un de l'autre, dins un pichot ciéucle que n'en devien pas sourti, pièi remeteguèron en cadun la lanço d'uno di poumpo e lou direitor dóu coumbat prounounciè lou sacramentau :

— Anés, Messiés !

E li dous capitàni s'arrousèron.


Long-tèms acò durè, mai enfin Merlandoun s'escagassè (ai óublida de vous dire qu'èro au mes de Desèmbre, à 6 ouro de matin).

Pèr quant à Laflagnolo, tremoulavo même pas de fre coume Bailly e, aguènt ansin *lava* soun insulto dins la persoûno de soun insultaire, s'entournè à Fos pourta en candello pèr si coumpatrioto.

Dous jour après, un plevèsi empourtavo Merlandoun. Laflagnolo aguè pas même un coryza car soun estofo incremablo èro peréu impermeable. Dève à la verita de dire qu'en se rendènt sus lou prat-bataié ignouravo assouludamen aquelo prouprieta de sa descuberto.

Mai despièi l'afaire dóu capitâni Merlandoun fau plus parla de duèl is abitant dóu Martegue. Soun persuada que tout lou mounde, en Franço, es un pau de Fos.





JAN TAPENO

Jan Tapeno a fa uno demando au menistre pèr èstre decoura aquest quatorge juliet. Me demandarès ço que Jan Tapeno a fa pèr auja guincha lou riban cremesin. Eh! d'abord, coume Mürger, a fa li fourmalita necito, piëi comto dins li divèrsis amenistracioun de Mougin, un noumbre d'an de service que tóuti podon pas i' arriba.

Fau vous dire que, coume lou Roufiaquen Bernadou, dóu paure Rouma, Jan Tapeno es lou tout-obro de sa patriò : gardo-vigno, se-cretari de la coumuno (estat-civil), mèstre d'escolo ounouràri, capoulié de l'ourfeon, di-reitor dóu museon d'istòri naturalo, sacrestan, lutrinejaire, presidènt de la Soucieta de secours

mutuau, redatour en pèd is *Ecò de Mougin*, e belèu n'en passe.

Pas proun d'acò, Jan vòu, aro, veni counseié d'arroundimen, counseié generau, deputa, senatour e, quau saup, presidènt de la Republico.

Mai digas-me 'n pau ço qu'es un counseié d'arroundimen o 'n counseié generau qu'a pa 'no ganceto à sa boutouniero? Rèn de rèn, pas uno peto de cabro.

Adounc, Jan Tapeno vóu èstre decoura e veici sa letro au menistre :

Mousseux le Ménistre,

En legisssant l'Ouficiel zé mé suis-t-avisé que force de décoration on était-z-accorder aux fonctionnaires qu'on-z-ont vint an, le plus vinto cinq an dé servisse. Et alor zé mé suis dit dé la démander tambien que moi, capounas de sort! z'en ai bougrement pluqueuss, que n'en voici le détail en gros :

Garde-champaître	40 ans
Secretère de la Comune (Etat civil)	35 »
Mètre d'escolo onorère	28 »
Chef de l'orfeon	10 »
Direuteur du museon d'istoare naturelle	8 »
Sacristin (bédo pour les grand fêtes)	50 »
Chanteur au lutrain	50 »
Président dé la Société dé Sécuris mutuel . . .	6 »
Rédateur en pied aux <i>Ekos de Mougins</i>	7 »
<hr/>	
TOTAL	234 ans

Contant, Mousseux le Ménistre, qué vous mé rendrais zustice (pourquoi un ome de ma mène qu'il a 234 ans

dé servisso i devrait pas-t-avoir à démander la crois qu'on dévrait la lui empéguer d'eaufisse sur le pitre), zai l'oneur d'hêtre votre treize humble et trè fidelle serviteur.

BALTEZIDORE-LIPOMINAS-JAN TA-PEINE.

P.-S. — Vous avez qué dé mander lé paqueton à l'adresse de M. Jan Ta-Peine, à Mougin. Tout lé monde on mé conné.


Eh bèn ! mau-despié aquéu noumbre fabulous d'an de service, lou 14 de Juliet es passa e lou paquetoun n'es pas arriba à Jan Tapeno. Pamens tóuti lou coundeisson.


Mai tambèn, queto idèio, en tèms de Républico, de demanda la crous d'ounour pèr avé, cènt an de tèms, canta au lutrin e sacristaneja !

Dempièi acò noste ome-es à noun plus. Bèn tant qu'aièr, à la grand messo, vuejè touto la bureto dòu vin, d'aqueu bon vin blanc que me dounarié envejo de veni capelan, dins la mancho de Mounsen lou Segoundàri.

Se dis que lou curat, qu'amo pas de vèire degaia soun vin, vai demanda pèr éu l'ordre de Sant Gregòri lou Grand, perfin d'evita d'autris auvàri.







LOU TAMBOURINAIRE DE CASSIS

Avès tóuti, coume iéu, ausi parla dóu tambourinaire de Cassis, aquéu famous tambourinaire que falié un sòu pèr lou metre en trin e cinq pèr lou faire cala; e vous sias demanda d'ounte venié aquéu prouvèrbi. Eh bèn, iéu que passe ma vido dins li vièi papié, vous dirai aqui-subre çò qu'ai atrouba dins lis archiéu de Pamparigousto, en un pergamin à mita rousiga di gärrí.

Adounc, au tems que Francés I^e e Carle-Quint jougavon à tiro-péu la courouno emperialo, i' avié à Cassis un brave ome que ié disien Vidau, tambourinaire-jura de la vilo,

qu'avié pèr l'estrumen naciounau de Prouvènço
uno passioun vertadiero e que, de-longo, pèr
tout e pèr rèn, fasié clanti soun ri-chi-chi-pan-
pan vincèire e bouleguet.

Mai un jour, vaqui que lou counestable de
Bourboun, coumandant pèr S. M. espagnolo
uno chourmo de Castihan, d'Italian e d'Ale-
mand, travessè neste païs coume uno aurasso
pèr ana metre lou sèti davans Marsiho... Crese
pas necite de vous remembra eici la recepciona
que ié faguèron li Marsihés, emai li Marsiheso.

Pensas bèn qu'à parti d'aquéu jour se dansè
pas plus dins l'encoutrado, à Cassis pas mai
qu'en liò. E pamens se ié tambourinè. Car
quau vous a pas di que Mèste Vidau poudènt
plus jouga dins soun oustau — qu'acò aurié
sembla pau counvenènt rapport au dòu de la
patrio, — prenié cade matin sis estrumen,
s'enfounساو، pensatiéu, dins li pinedo e pièi,
quouro à la muto, quouro à grand brud, se
jougavo pèr éu soulet et pèr li cigalo que
l'acoumpagnavon en cantant, tóuti aquéli bèus
èr que fan nosto joio e neste ourguei despièi
de siècle emé de siècle.

Vidau, fau vous dire, avié pas de bonur :
quand si rasin èron madur, de galapian lis ié
venien rauba ; sa femo ié fagué douz cop la
bessounado ço qu'èro pas un biais d'endrudi

l'oustau ; enfin sa bello-maire visquè jusco à bèu nounanto-cinq.

Mai acò èro rèn. Un jour que, — coume vène de vous dire, — musiquejavo soulet en pleno séovo, siguè fa presounié pèr de chivalugié alemand que lou menèron à Marsiho, vers Bourboun.

Lou counestable se counsoulavo di loungour dòu sèti em'uno bello dono, la coumesso de Furstemberg, que soun ome, d'aquéu moumen, fasié tripet-pelòri dòu caire de Fourcauquié, em'uno troupo de lansaquet.


M^{mo} de Furstemberg se faguè douna lou paire Vidau e, quouro lis Emperiau avien d'asard pas li Marsihés sur lou quiéu, lou paure Cassiden, noun sènsò avé lucha de soun mies, èro fourça de faire dansa lis enemi d'aqui-que perdèsse l'alen. E alor la coumesso ié baiavo un sòu. Coumprenès se li lende i anavon !

Enfin Bourboun, vesènt que li Marsihés se cargavon de lou faire dansa jusco à-perpèt sènsò autre musico qu'aquelo di flahutet de vue pan e de si tambourin de brounze, se decidè à retourna en Itàli.

Mai vaqui qu'au moumen que soun armado acoumençavo de defila sus lou grand camin, lis assieja faguèron uno sourtido e s'entrinèron à

piha li bagage. Alor Mèste Vidau, en quau res fasié atencioun, s'avansè vers la lichiero de M^{mo} de Furstemberg mita morto de la pòu, e i' emprouvisè souto lou nas aquel èr que cadun counèis e qu'a garda lou noum de la dono.⁽¹⁵⁾ E zóu ! entre l'acaba, lou recoumençavo, bèn tant que la coumtesso, furioso, ié jitè pèr l'arresta tout ço qu'avié d'argènt sus elo, cinq bèu sòu d'or rousset et flame-nòu. Mai neste musicaire li leissè toumba au sòu, ié jitè tambèn aquéli qu'avié gagna jusco alor en fasènt musico is enemi e s'esbignè pèr tourna à Cassis faire, coume antan, dansa lis amourous.





oraison, et l'autre à la gloire de sainte Barbe.
Ainsi que l'assure un autre poème :
« Les deux sœurs sont toutes deux si
belles, une est blonde et l'autre brune,
mais leur couleur n'est pas dans le tableau,
elles sont toutes deux si belles qu'il n'y a pas
d'autre couleur que celles qu'elles ont. »

LI DARBOUN

Dimenche passa, — à moun acoustumado,
— ère en trin de tuba moun cachimbau en
espinchant de l'èstro li pouli di chato qu'anavon
à vèspro prega pèr si calignaire, quand reçau-
père la vesito dòu brave Pèire, lou baile dòu
Mas-Negre.

— Bèn ! Pèire, courne sian ?
— Pas mau, moussu, gramaci. Vous vène
demandu un pichot counsèu.
— Dous se n'as de besoun.
— Veici la causo. Sabès qu'ai eila, de-vers
Prat-Cros, ùni dos o tres eiminado de terro
ounte fasiéu de blad. Eh bèn ! quau vous a pas
di, moun brave moussu, que despièi tout-aro
un an, li darboun fan l'escolo de sapo dins
moun champ ? L'an tant trafega que sèmblo

uno bresco : mouto d'eici, mouto d'eila, mouto de pertout. Pode plus rèn samena. Uno abou-minacioun ! Ai agu bèl à souna li gènt que sabon la cabalo : autant i 'a fa coume un emplastre sus uno cambo de bos. Enfin m'an counseia de prega Sant Baudèli que mestrejo la rasqueto e que coumando is arno, i niero, i pesou, basto, en touto la manjanço.

— Coundessiéu pas aquelo especialita de Sant Baudèli.

— Iéu, me l'an di.....

— Grand Sant Baudèli, nous desbarrassessias di manjaire que vole pas dire !.... Vai toujour, Pèire.

— *Amen!* Alor me siéu di : te fau ana consulta M^u Bello-Esquino, que saup tout.

— Sabe tout ! sabe tout ! sabe forço causo, (e meme de proun drolo) mai pas tout... Enfin, vos que te baie uno idèio pèr coucha li darboun de ta terro ?

— Acò 's acò.

— Eh ! bèn, moun ami, me siéu jamai trouba dins toun cas ; mai pamens me sèmble qu'à ta plaço, sènso óublida Sant Baudèli, agantariéu moun luchet, anariéu faire tuba de siéupre au trau di darbouniero, e, moun óutis à la man, me tendriéu lèst à chapla tóuti li bestiàri que n'en salirien. Vaqui moun avejaire. Aro, s'as

mies qu'acò, sabes, me facharai pas se fas pas
coume te dise.

— Gramaci tant e mai, Moussu. Farai an-
sindo.

Coume bèn pensas, li darboun de Pèire si-
gueron lèu liuen de ma memòri. Or en m'es-
pacejant, me capitère dijòu, dins lou champ
dóu mesquin, e de segur, s'avié 'gu un tort en
coumparant soun bèn à-n-uno bresco, èro de
pas agué trouba un image pus fort. Manquère
cènt cop de me roumpre li cambo en caminant
sus aquelo terro que s'aprefoundissié à cade
pas.

Enfin destousquère Pèire, éu même; forço
afeciouna, trabaiavo dóu biais que i' avié en-
signa.


— Bèn, Pèire, reüssisses ?

— Ato, Moussu, vai tant bèn que se pòu :
fau de casso espetacluso.

— Vese que siés countènt. Quant n'as en-
suca, vuei ?

— Eh quouro n'aurai pres encaro younge,
em' aquéu bèu que tène d'à-ment, n'aurai tuia
'no pourido dougeno.





DESCAUSSANA SÈNSO LOU SAUPRE

Pau Manin èro estudiant, valènt à dire que li marridi natrarié... à faire au vesin, ié fasien pas pòu. En seguido d'un tour mai pebra que lis àutri siguè fourça de cambia de loujamen e me venguè trouba.

— Digo ? Couneiriés pas un grand apartamen, bèn situa, richamen moubla, dins li près de douge à quinge franc pèr mes ?

Couneissiéu ges de loujamen d'aquelo meno e n'auriéu couneigu quaucun que — sènsò èstre gousto-soulet — l'auriéu pres pèr iéu. Pamens arribère à faire intra Manin encò d'un margulié celibatàri au councierge de quau lou presentère coume un jouvènt forço sage.

— Acò vai bèn, vé, estènt que Moussu es éu meme forço vertuous e l'oustau, sabès

Ges de femo, etc.

Manin sourriguè. I' avié long tèms que la counciessié, aquelo, e falié pas la ié faire. Es que, à soun grand espantamen, la ié faguèron e seriousamen, vous prègue d'hóu crèire. Soun proupretàri, M^u Mitouflard, lou tenié d'àment e gramaci 'cò l'on poudié 'ncaro canta en passant davans l'oustau :

Salut demoro casto e puro

ço que li cambarado mancavon pas de faire, au mens un cop la semano, au grand desfèci de moun paure ami.

Or lou matin dóu 14 d'Avoust, eiceste veguè mounta vers soun proupretàri de moulounas de mangiho, de veneràbli boutiho, e aprenguè dóu councierge que M^u Mitouflard se noumant Marius, acampavo la veio de sa fèsto uno chourmo de coumpatrioto, mascle e femèu, de sis ami, en quau disien peréu Mario o Marius.

Siguè uno revelacioun pèr Manin. Courreguè à l'Escolo de Dre e i' óublidè de-planto de segui li cours pèr faire en quàuqui couman de recoumandacioun forço drolo à-n'en juja

pèr li cacalas qu'eicitavon. Sus acò rintré au siéu e passè tres ouro à clavela de vano e de tapis davans sis èstro.

Enfin, aguènt reüssi à faire intra dins l'oustaü, coume se siguèsse esta pèr M^u Mitouflard, une tiero de flasco couifa de vèrd escourta de car-salado e de bescuchello, esperè.

A 8 ouro, la passado di counvida dóu prou-prietàri acoumènço. Mario e Marius se sucedon; mai, au grand atupimen dóu councierge, liogo de gènt venerable coume lis an d'avans, es, en majorita, de Marius de 20 à 25 an, mouret, pelous, brassejaire, que demandon M^u Mitouflard coume demandarien « la bours o la vido. »

Pèr quant i Mario, soun atrencaduro es tant sié pau eicentrico, si capelas an de plumacho de coulour inversemblablo, si patin soun quiha sus de taloun tourre-Eiffèu.

E lou Pipelet de se dire :

— M'arregardo pas, mai de tout segur i'a quicon mai.

Efetivamen i' avié quicon mai..... dins la chambro de Manin. Mario e Marius chourlavon coume de trau, brafavon coume li lioun de Bidèl e bramavon de fanfoni d'ataié que si refrin ensourdi arribavon au councierge escandalisa.

Aqueste malurous founçounàri èro à noun plus. Gramaci, li tenturo pendoulado davans lis èstro, la chambro de Manin sèmblavo d'estre dins la mai founso escuresimo. Pèr contro l'apartamen dóu proupretàri èro escleira *à giorno*. Adounc, èro aqui que se fasié bousin.

E quouro l'endeman de-matin, Mitouflard passè davans sa lojo, à peno se lou councierge soulevè sa barreto rausouso sus soun cran esplumassa en se disènt :

— Hi ! vièi satire ! Te counéisson aro.

Lou fèt èi que se poudié plus canta :

Salut demoro casto e puro.

Quàuqui mes après, en seguido de barjado,
M^u Mitouflard perdeguè sa plaço de margulié.
A jamai coumpres perqué.



LOU

COUNDICIOUNAU E LOU PASSEROUN

FABLO

Un coundiciounau se capitavo de gardo, un dissate, dins li jardin d'ou 3^{en} de ligno. Enterin que countemplavo em' uno malancounié sèmpre creissènto, lis ourtoulaio que lou soulèu fasié espeta, un passerounet escarrabiha venguè en voulastrejant, cerca pitanço dins aquelo verduro.

— Hòu, passeroun, degaies pas li ensalado d'ou courounèu que pièi me fariés garça' la salo de pouliço.

L'aucèu virè la tèsto d'aise-d'aise, e :

— Marrit cacho-frejau, vai ! Amor que siés

segur de trouba ta gamello sèmpre lèsto à l'ouro fissado, voudriés empacha li gènt de bousca sa vido ?

— Fas bèn toun farot, que ? Se pamens te foutiéu un cop de fusiéu pèr t'aprendre à respecta l'autourita ?

— Sariés bèn proun nèsci bord que siés ome.

— Sèmblo que nous as pas en bèn auto estimo.

— E coume vos que sigue autramen. Vautre, quouro avès un bedigas l'apelas *bèsti*; nautre, emé forço mai de resoun, disèn ome à nòsti boufo-la-balo. En efèt, neissèn e mourèn à la voulounta de Diéu, calignan quand nous agrado e cadun de nautre viéu segound si mejan. E vautre, pamens, cercas que de vous faire cala de téule sus la tèsto; sias countènt que quand vous sias atira quauque auvàri e passas vosto vido en de couioulige en plaço de béure lou bon soulèu de Diéu en leissènt courre. Ansin, tu, que te crèses un di rèi de la creacioun e que, belèu, siés pas lou pus darnagas de ta raço, te vaquito en trin de faire l'escamandre tutto la semanado pèr pousqué, à l'oucasioun, defila 'mé un biais counvenènt davans li pichòti dono de Marsiho. Pièi, lou dissate e lou deminche, pèr te faire pausa, te

quihon à garda de caulet que n'an segur pas
envejo de s'enfugi.

« E dire que pèr faire aquéu mestié requist,
vous embarron tout lou tèms de vosto jouvènço
dins lis escolo ! Se troves aquoto inteligènt tu,
siés pas dificile. Per iéu, aucèu siéu e crese pas
que regrete jamai de pas èstre nascu ome.

MOURALO

Vau mai èstre aucèu que faciounàri.



17. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*


18. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*

19. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*

20. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*

21. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*

22. - *Die gesamte Fläche der Inseln ist ebenso wie die
Inseln selbst sehr verschieden. Einige sind sehr
groß und haben eine sehr starke Bevölkerung, andere
aber sind sehr klein und haben eine sehr kleine Bevölkerung.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.
Die größten Inseln sind diejenigen, die sich im Süden befinden,
die kleinsten sind diejenigen, die sich im Norden befinden.*



CRA-CRA-CRA.

Dilun, passant sus la Crouseto, rescontre moun ami Belin, un mascle que, boutas, lou femelan ié fai pas pòu. Es verai que n'en pode pas dire autant dóu sèisse ome.

— Oh ! Belin, ounte vas coume acò !

— Vé, me n'en parles pas. Siéu en trin de faire Sant Miquèu. Ma prouprietàri m'a mes deforo adematin perqu' anie ai óublida de rintra soulet.

— Ah ! gusas, vai.

Dijòu, preniéu lou cafè is Alèio quand te revese moun Belin, la cigaró penjadisso au cantoun di brego, li man crousado sus lou quiéu, parlant sènso respèt.

— Belin !

— Tè, siés aqui.

— E o ; ounte vas tout courrènt e susarènt ?
Asseto-te uno passado que dèves agué set.

— Pas de refus, vé. Siéu en trin à faire
Sant Miquèu...

— Mai as panca fini despièi dilun ?

— Ah ! parles de moun demeinajamen de
dilun. Mai paure, es pas lou meme.

— Ié passes ta vido alor ? Cadun soun goust,
preisèmple.

— Pecaire, se te creses que me chale ! M'es
arriba 'n afaire dóu fiò de Diéu dins moun
nouvêu lóujamen. Imagino te que aquéu dilun
(n'en gardarai memòri) alor que, escranca dóu
lassige, veniéu tout-bèu-just de me jaire, ausi-
guère à l'estànci d'au dessus un cra-cra-cra de
boutino que me faguè pantaia...

— Saras toujour lou meme alor.

— ... L'endeman de matin ère encaro à faire
la radasso que la campaneto de l'oustau dindè
tres cop ; pièi la voues de ferre-blanc d'un pe-
doun cridè : « *M^{lo} Juana. Letro* ». Lèu-lèu la
porto de la chambro au dessus de la miéuno se
durbis e n'en davalò quaucun que pamens fa-
sié pas cra-cra-cra. Basto ! pensère, M^{lo} Juana
es panca caussado ; es enca l'ouro de tirassa
sabato. Em' acò m'en vau de galapachoun
bouta l'iue au trau de la sarraio. Double-Diéu !
La bello fiho ! Uno como de jaiet pas penchi-

nado, un sen mouflet que brandavo pas, un còu de mabre, uno taio, de bras!!


— Ato passo, vai, passo.

— Passe. Aièr, nòu ouro venien de pica à la Castro⁽¹⁶⁾, escalère cauto-cauto un plan de mai. Pique à la porto de M^{lo} Juana e, plèn d'espèr, prène ma pousicioun pèr sauta au còu de la bello tre la porto duberto, coumtant faire cala ansin li cerimòni preliminàri. Enfin entènde lou famous cra-cra-cra; li pas se raprochon, la clau viro dins la sarraio, lou ferrou se tiro, la porto se desbadarno e tout d'un tems embrasse uno oumbro qu'entrevese e ié disènt *mezza voce*: « Juana, t'ame ». Ai las ! Mi brego poutounon ùni moustacho; un óuficié d'òusard se desfais de mi bras, m'aganto is espalo, me fai vira coume bóudufo e à soun tour si boto esperounado vènon poutouna moun os-Bertrand en quilant un cra-cra-cra galejarèu.

— E quites l'oustau pèr acò. Mai pos pas faire autramen que de demanda reparacioun à l'óuficié.

— Moun ome, aquéu sóudard es un brutau. Tabasavo coume un sourd. E pièi i 'a ges agu d'escorno, a pas pica à la caro.





L'EUME

Mèstre Lagourdo, de Cagno, passavo sa vido
à metre lis autre dedins coume avoucat em' à se
faire metre dedins pèr lis autre coume anticàri.

Es ansin qu'espousè, — au moumen qu'èro
à mand de se marida emé lou liò-tenènt di
gendarmo — la chato de M^u Bournèu qu'avié
milo escut de doto, e que croumpè 1,500 franc
un vièi èume censa de l'age-mejan, tout enrou-
veli, tout trauquiha, que ié faguèron passa pèr
lou dòu rèi En Pèire.

Coume lou casco d'aquel aparaire de nostro
raço poudié se capita dins un champ de Cagno,
M^e Lagourdo se n'enchautavo gaire. Paguè
tin-tin, persuada qu'èro d'avé couiouuna lou
vendèire, e boutè lou relicle dins soun saloun,
à la plaço d'ounour, entre un bust de Pau de
Kock em'uno foutougrafio dòu papo.

Naturalamen lou mourioun veguè defila touto la vilo, e soun urous proupretari espliquè en tòuti que Pèire d'Aragoun, un di coumpañan de Rouland, escriéuguè — au moumen d'estre sagata à Rouncivau pèr li Nourmand — à sa femo, la Reino Jano, aquesto biheto : « Madamo, tout èi perdu, foro l'ounour. »

Tout acò vauguè à Lagourdo tau renoum de saberu que l'Acadèmi de Vau-bono lou causiguè pèr soun secretari perpetuau, e que lou maire de Cagno soulicitè pèr éu la Crous d'Ounour o dóu mens, li paumo d'Ouficié de l'Estrucioun publico.

Coume vesès lou casco d'En Pèire avié déjà rendu pas mau de service à neste pleidejaire, e pamens n'èro rèn au caire dóu bèn que ié devié faire d'un autre biais.

Fau dire que la bello M^{mo} Lagourdo — nascudo Bournèu — avié 'n d'aquéli caratère à faire dana li sant; que que faguèsse, soun ome èro segur d'estre charpa e même, m'an afourti forço gënt, que mai que d'un cop moussu plenguè l'esquino souto lis espóussado que ié dounavo sa douço mouié.

Toujour èi qu'un vèspre i'aguè dins lou meinage un aurige espetaclous. Lagourdo, parèis, avié reguigna e la dono, pau abituado à lou vèire ié faire resistanço, avié fa coume

touti si pariero en tau cas : s'ero escagassado sus lou tapis em' uno ataco de nèr que te dise qu'acò, moun bèu.

La mesquino se viéutavo au sóu, estrassant sis abihage, garçant en l'èr de cop de pèd que fasien vèire si prim boutelet — e belèu quicon mai, — quilant, se troussant li bras, li bouco regoulanto d'escupigno.

Lou paure Lagourdo avié d'abord auboura lis espalo ; mai quand veguè sa femo bava coume un enfantoun, la pòu l'agantè que si-guèsse estado moussigado pèr un chin fòu e, tout en restant foro pourtado, cerqué mejan de s'esbigna, crento d'auvàri.

Subran greiè dins soun su uno d'aque lis idèio grandarasso que n'i a proun pèr ilustra un ome. Agantè d'escoundoun l'èume dóu rèi En Pèire, venguè de-rebaloun pròchi madamo dóu tems que fasié pauseto, e prouf ! la couifè d'uno man touten beissant lou ventau de l'autro.

Aquito avié bèn capita. Tre senti sa tèsto embarrassado coume de toun à l'òli, la damo venguè bravo, bravo qu'es pas de dire; s'au-bourè d'esperelo e, demandant escuso à soun ome, lou supliquè de ié leva quel engen pau agradiéu.

Es eici que l'escagno s'embouio : Lagourdo faguè soun poussible pèr auboura lou ventau,

mai vai te fa fiche! Aquéu bougre de casco avié 'n secrèt e noste avoucatoun restè candi en vesènt que i' avié plus mejan de lou durbi. Lou sarraié de l'endré, manda à la lèsto, traiè dos ouro de tèms, mai de-bado.


Basto ! Lagourdo deguè, l'endeman de matin, ana quorre à Niço un engeniaire mecanician que réussiguè à deliéura la mesquino.

Sabès de que faguè eicesto autant lèu ? S'enanè à la cousin brafa 'no mita de dindard, que, tout lou tèms qu'avié jouga Angelico de Simiano, i' avien pouscu faire prène que de bouioun pèr lou mejan d'uno caneto passant tras di grasiho.

Aquel escaufèstre aguè pamens uno eicelènto seguido, car M^{mo} Lagourdo — nascudo Bournèu — es vengudo à parti d'aquéu jour, mai douço que de melico ; fai babeto tout de long dóu jour e de la niue à soun gros loulou, ié fai un enfant tóuti li nòu mes e de bessoun quand se pôu.

I' a bèn de gènt que dison que, à soun tour, es en trin de couifa soun marit, mai acò soun pas nóstis ataire.





LOU DIMARS GRAS

D'UN CLERC DE NOUTARI

— M'es forço grèu de vous priva de nosto liberta aqueste vèspre — disié à soun clerc, un bèu dimars gras, mèstre Atanùfi Manouchet, — m'es forço grèu, mai ié siéu fourça. Fau que m'alestigués, esto niue meme, aqueste partage, que me fau parti subran pèr la Rouqueto ounte ai à faire un testamen in-estrèmis.

Pau Mouret, lou clerc, faguè uno bèbo de sièis pan, pamens, pèr noun desóubliga soun patroun, la faguè en dedins. Es que, vous l'afourtisse, èro mai-que-mai enfeta 'quéu paure Pauloun, oh! mai, enfeta qu'es pas de dire. Justamen aquest vèspre que vous parle devié assista au *Grand bal di Granouio fin-de-*

siècle emé Melanò, uno galanto pichoto mou-disto qu'avié de cloutet partout oun'e se n'en pòu avé.

Pamens n'en prenguè soun partit. Un cop soulet dins l'estudi, cap à cap emé sa làmpi, prenguè uno fueio de papié marca, agantè soun porto-plumo e s'entrinè à-n-escriéure :

« *L'an dès e vue cènt nounanto tres e lou quatorge de febrié ; pèr davans nàutri M^e Atanùfi Manouchet... »*

Arriba 'qui Pau deguè cessa soun trabai. Sis iue ié fasien de farfantello bijarro. Ié semblavo que lis aficho pintourlejado de vèndo e d'ajudacioun se courduravon ensèn pèr fourma un arlequin gigant que ié risié au nas d'un biais descounvenènt. Li voulume d'ou *Repertòri di Noutàri* dansavon li taratello, lou Code Civil se liéuravo à-n-un *cancan* descabestra. Pièi, sus tout acò, lou mesquin entre-vesié d'espalo blanco e redounello, de cabeladuro sedouso, d'iue esbrihaudant, de bouqueto cre-mesino qu'espétavo un sourris perpetuau, e, eilavau, à la porto d'ou *Grand bal di Granouio fin-de-siècle*, devinavo Melanò que l'esperavo em' uno patiènci digno d'un sort meiour.

Dès ouro picavon. Pau s'aubourè, prenguè soun capèu, boufè soun lume e, en rèn de

tèms, aguè gagna soun chambroun, au sièisen plan sus un mié-soulié. Aguè lèu fa d'enverga un abihage de zefir e, au pas ginasti, gagnè lou bal. A la porto res l'esperavo.

— Basto ! se pensè noste clerc, aura agu fre e sara intrado.

Lou vaqui dounc dins la salo, espinchant soutu lou nas li balaire e li balarello emai tambèn li cliènt dóu bufet. Rèn ié retrasié Melanio.

Mai alor s'èro pas au bal, ounte tròni èro ?

L'on à bèl à pas teni fòro mesuro à-n-uno femo es toujour enquequinant quouro vous placo. Vau mai la placa proumié qu'acò 's bèn mai farot.

Tout d'un tèms Pau toumbè à l'arrèst. Venié d'apercuvre uno ravissènto Couloumbino que soun descouletage desacatavo de roundo-gibo nacrado forço ragoustouso. Souto li barbo dóu masco pousquè vèire, noun sènsò peno, un mentoun redounèu adourna d'un crousset. Plus de doute ! Es elo ; elo au bras d'un long dia-blàs desguisa en ninoi !...

Sènsò mai reflechi i desavèni que poudié i' atira soun acioun noste basouchian derrabè vioulevantamen la Couloumbino au ninoi qui, à modo de proutestacioun, ié larguè un mèstre cop de poung. Pau avié pas déjà tant de sujet

d'estre countènt. Aquéu cop de poung boutè
fiò i poudro e vaquito, au bèu mitan dòu bal,
uno batèsto meravihouso.

Li *sergot* — que soun paga pèr se mescla
dis afaire dis àutri — arribon e menon la Cou-
loumbino plourant, lou Zefir renant e lou
Ninoi souinant, au posto vesin.

Aqui, un moussu en faquino negro s'alesti-
guè à lis interroujeja e ié diguè d'en-proumié
de leva si masco, ço que faguèron, noun sènso
esitacioun.


Ourrour!

Lou Ninoi èro res autre que M° Atanùfi
Manouchet. Pèr quant à la Couloumbino, èro
la mouié dòu recetaire d'enregistramen lou
quau èro aquest vèspre au cap-liò ounte avié
un versamen à faire.

• • • • • • • • • • •

Despièi aquéu tèms quand un noutari me
dis qu'a un testamen à faire, me mesfise.





VENJANÇO D'ESCARRABIN

Avié pas uno poulido voues; si gèste picavon souvent à faus, basto, lou talènt l'estoufavo pas, mai, coume *Bettina la rougeaude*, èro uno superbo chato.

Acò esplico perqué Louvis Bretoun, un cambarado qu'entre escarrabin avian subrenouma la Vestalo, n'èro vengu mato à la forço de faire sus elo d'esperiènci d'innoutisme. Mai de-bado, ai las ! que Medea (vous avié pas di que se noumavo Medea ?) l'avié rebroua em' uno verdour !!

Louvis se tenguè pas pèr batu. Ero pas Breton que de noum, l'èro de fèt e i' a ges de miolo andalouso que l'aguèsse pouscu leva de cassolo dins un courreli de testardige. Louvis

mandè de vers; Medea lis ié tournè. Louvis faguè miraia un *garat*; Medea ié garcè un bendèu. Louis parlè de se tuia; Medea ié riguè au nas e ié soumeteguè un plan de crounico loucalo racountant soun suicide. Fin finalo, Louvis menacè de se venja; Medea aubourè lis espalo.

E pamens se venjè d'un biais terrible.

La mesquino devié jouga *M^u Müller* dins la *Timbalo d'argènt*. Aquéu role èro un de si succès gràcis au coulant que ié permetié de faire valé tòuti sis avantage. Fin qu'aquéu jour avié ansin recouulta de *bravò* fourmidable. Lou proufessour de retourico dòu coulège, un abouna, avié même fa en soun ounour un capelot de vers latin — pèr que sis escoulan noun pousquesson li coumprendre — ounte la coumparavo à Vènus Calipijo.

Adounc, aquéu vèspre d'aqui, Louvis pourtè sa mostro au mount-de-pieta e 'mé l'argènt que n'en tirè se paguè la grando lojo d'en-faci au grand espantamen di coumpan que lou 20 dòu mes avié fourça d'escala au galinié.

M^u Müller pareiguè au mitan d'une troundisso d'aplaudimen e soun estabousimen siguè pas pichot de vèire Louviset s'espoumpi ansin em' uno mino d'Hamlet fasènt un brout de charradisso em' aquéu paure moussu Yorick.

Souto soun regard esbléugissènt la pauro Medea se sentiguè mau à l'aise. Sènso lou voulé, avié d'iue que pèr éu; mau-despié lou souflaire perdié lou fiéu à cade moumen e *bafouia*vo d'un biais lagremable. Lou regissière derrabavo li péu de sa perruco; li fauteui d'ourquèstro proutestavon, lis estalo risien, li lojo s'amagavon dins sa dignita, lou paradis imitavo li cridadisso dis animau à faire crèire qu'erias dins l'arco.

Pièi, subran, la pauro Medea entameno uno danso inedicho davans la qualo *Grille d'Egout* aurié recula en rougissènt, e se bouto à canta 'questo roumanço proun couneigudo au quartié latin :


*Un jour, à la barriero
Margot, Margot...*

Siguèron fourça de l'empourta e de rèndre l'argènt, ço que permeteguè à Louvis d'ana l'endeman retira sa mostro.

Lou fenat s'èro venja à gràtis en se siervènt dóu poudé que l'innoutisme ié baiavo sus Medea.

Preisèmple, noun sabe la seguido de l'istòri.





LOU SUICIDE D'UN USSIÉ

— « Quaucarèn de bèu la vido ! Tout bèu just sias nascu que plouras pèr faire li dènt.
Ah !

« Quàuquis an pus tard, sacas vòsti det dins lou nas, li parènt vous fuiton e re-plouras.
Ah !

« Pièi vous garçon au coulège e re-re-plou-
ras. E acò duro dès an. Vai bèn !

« Un cop foro dóu bahut es bèn autre causo !
Lis ome ! I'a pas vue jour qu'avès fa sa cou-
neissènço que vous emprunton cènt sòu. Li
femo ! Vous troumoncoume mestresso, vous
troumoncoume mouié, vous troumonde-
longo. E, pèr acaba, vènon vòsti belli-maire !!

« Quaucarèn de bèu la vido ! De que ié fau, iéu ? Secute de pàuri bougre qu'an pa 'n pié. Se 'ncaro èro sa fauto... »

Ansin mounoulougavo M^e Uddoufe Perminjat, ussié, un vèspre que sourtié de la taulejado de sa courpouracioun. Forço gai, foulinèu même à sis ouro, Perminjat s'autourisant dóu prouvèrbi *quau se sèmblo s'assèmblo* raprouchavo souventifes sa togo negro de raubo mens severo, au grand escandale de la casto pouplacioun d'Antibo.

Malurousamen, quoouro avié begu 'n cop de mai, Perminjat (Uddoufe pèr si cliènto) venié d'un tristun vis à vis quau lou pessimisme de Schopenhauer aurié sembla uno gaieta carnavalenco. Fau dire que i' arribavo qu'un cop dins l'an, lou jour de la taulejado dis ussié e 'içò gràcis à-n-un vinet de païs, blound coume uno como de fado, dóu quau lou decan avié lou mounoupòli.

— ... Uddoufe, noun pos mai de tèms coussaia ti semblable. S'eicésti sabon pas ounte èi soun devé, tu, sabes ounte èi lou tiéu. Coume Catoun refaudisse-te dins la mort e laisso li nèsci charra sus toun comte.

A-n-aquéu moumen la lus verdalo d'un boucau d'abouticàri saguè parpeleja lis iue fatiga dóu virtuous óuficié menisteriau que, se picant

lou front, s'avansè de soun mies vers la boutigo, cerquè lou boutoun de la porto cinq bòni minuito, à tout lou mens, e reüssiguè à intra graci de miracle d'équilibre que noun cou-néisson nòsti bujet.

— Pau, moun ami, clamè en se jitant dins li bras dóu farmacian estabousi, sauvo-me l'ounour en me levant la vido. La vido, vé, es un flèu ! Se siés vertadieramen moun ami desbarrasso m'en, te rendrai la pariero un autre cop.

A-n-aquelo martegalado lou poutringaire pousquè pas s'empacha d'esclafi lou rire.

— O, vai, te rendrai la pariero un autre cop, repetavo Perminjat, lis iue tout lagremous ; mai baio-me uno bono pouioun bèn seguro.

— Espèro, vai, te n'en vau siervi uno que n'en saras countènt, murmurè l'abouticàri que prenguè sus si post un gros flasque dóu goulèu courtet que l'ussiè s'en emparè em' un gèste tragique.

Un quart d'ouro après, M^e Perminjat èro dins soun estudi ounte escrivié, em' un èr de circounstànci, si darriéri voulounata. Uno fes soun obro acabado, signè, parafè, escoulè la boutiho em' un courage digne di tèms antique e esperè la mort.


Esperè, esperè, esperè. Enfin li proumié sin-

tomo se faguèron senti : d'òrri cenglado que lou faguèron pati qu'es pas de dire. Mai passen.

L'endeman de matin, M^e Uddufe Perminjat èro encaro en vido ; sus sa taulo s'espoumpissié lou flasco de pouioun emé l'etiqueto : *Hunyadi Janos*, e l'ussié, aguènt fa pèu novo, pourtè dins la journado trento sèt coustrencho en de grincho, de faribustiè, coume ié disié, que poudien pas paga sa rèndo.

Rescountra dins l'istòri qu'un ussiè voulènt se suicida e vèire que i' arribo pas ! Se pòu-ti trouba uno meiouro provo que la coulèro di-vino èi sus nàutri ?





LA BROSSO DOU VISCOMTE

Lou jouve viscomte Antenor dis Estournello avié lou péu d'aquelo tencho avuglarello que li que n'en soun afgli noumon, pèr un dalicat eufemisme, lou *blound venician*.

Mai lou blound venician d'Antenor èro d'uno talo rougeta que, quouro lou malurous se descapelavo, aurias di qu'èro couifa d'un peiròu de couire escura de frèrs. E noun ié fasié gau au pichot viscomte, que sa sacro como mounopoulisavo touto l'atencioun di dono e lis empachavo d'arremarca lou gàubi de sa taio, la finesso de si man aristoucratico, la pichoutesso de si pèd, basto ! tóuti si avantage natruau.

Pamens, coume èro un ome d'esperit, l'idèio ié venguè pas de se tegne o de pourta perruco e s'accountentè de baia à soun péu uno aluro vitouriouso jusco au jour que, apela à faire soun service militàri, lou veguè toumba souto lou ferre dòu couifaire de sa coumpagnié.

Naturalamen la tèsto dòu nouvèu vengu faguè sensacioun à la caserno; e, à l'ouro de la soupo, quand lou viscomte anavo à la cantino, tout lou regimen badavo is èstro pèr vèire passa lou *bouissoun ardènt*, coume l'avié bateja un semenaristo de la 4^{nc} dòu 2.

Antenor s'enchauteavo de ges de modo d'aquelo curiousita grafignouso, pas mai que di gandoueso di galejaire. Countuniavo de sougna ço que ié leissavon de péu e poussedissié meme pèr acò uno fort poulido penche de closco em' uno brosso adournado d'un manche d'evòri qu'avié espanta tutto la chambrado lou jour qu'apareiguè pèr lou proumié cop.

— Fau-ti que si gènt sigon riche pèr que se pague de brosso ansin, mourmiéutejè soun cambarado de lié prevesènt adeja lou noumbr fabulous de pichot vèire que pourrié chourla i frèr dòu *blu* en ié fasènt soun *fourbi*.

Tout anè bèn durant quauque tèms. Lou viscomte que couneissié proun de sis óuficié, jouissié d'uno tiero de pichòti favour e se la-

gnavo pas de soun sort. Ei juste de dire que fasié assouludamen que ço que poudié pas fa faire à soun ourdounanço.

Or, un dissate, quàuqui moumen avans la revisto dóu courounèu, Antenor e soun brous-saire èron ana prendre uno pruno à l'aigo-ar-dènt à la cantino dóu tèms qu'aquéli que des-cendien de gardo dounavon un cop à soun fournimen.

— Pito-mousco, as pas pres ma brosso pèr astica ?

— Nàni.

— Quau, tròni ! m'a pres ma brosso ? Coume s'avié lou tèms de faire uno patrouio ram-panto dins tóuti li sa-de-brosso, aro ! Quau me prèsto la siéuno ?

Mai tout lou mounde avié besoun d'astica e res quinquè. Alor noste troupié vesènt à la testiero dóu viscomte un sa sènso mèstre, ié fourrè la man, n'en tirè la brosso dóu manche d'evòri e s'entrinè à brustia en counsciènci soun centuroun coupiousamen empen, d'en proumié, de cirage Demeyer, aquelo prouvi-dènci di troupié.

La brosso d'Antenor venié tout escas de re-prendre sa plaço que soun proupretàri intravo coume uno chavano : lou cleiroun de gardo s'avansavo dins la court pèr souna l'acampado.

Leva soun kèpi, douna un cop de sa famouso brosso à sa noun mens famouso cabeladuro, carga lou sa e davala dins la court siguè pèr éu l'afaire d'un vira d'iue.

Entre li rèng fourma ausiguè si vesin mur-mura :

— Es espantaiant çò que pudis lou Demeyer ici !

D'aquéu tèms lou capitàni passavo soun ispecioun preliminàri. Arriba davans lou *bouis-soun ardènt* prenguè uno mino tant estabousido que touto la coumpagnié aurié paga car la faculta de vira lis iue de-vers Antenor. Eiceste — coume bèn pensas — èro pas à l'aise, coume la bello Dijounenco.

— Degas-me 'n pau, moun garçoun, es que sias vengu mato ?

— ???

— De qu'èi que vous a pres de vous tegne lou péu en negre ?

— !!!


— Garças-me lou camp lèu-lèu, avans que lou courounèu arribe e esperas-me dins vosto chambro ounte reglaren acò.

Mai quouro avès pas la veno ! Dóu tèms d'aquelo charradisso lou courounèu èro intra dins la court e i' aguè pas mejan de faire fila à l'angleso M^u dis Estournello.

Sus acò, la plueio que menaçavo despièi lou matin, se meteguè à toumba e se 'n cop lou courounèu passè à soun tour davans la sei-cioun d'Antenor, siguè pas medioucramen sousprés de ié vèire, pèr lou proumié cop, un mouro. Demandè d'esplicacioun e tout s'es-clargiguè; mai lis óuficié risien trop pèr puni.

Soulamen, l'endeman, lou viscomte dis Estournello garcè sa brosso de l'estro e se faguè toundre à l'ourdounanço.





UNO SOUCIETA DE CREA

Estudi souciau e filantroupi

Quàuqui pensaire, de jour en jour mai noumbrous, afourtisson que lou mounde marcho au soucialisme e 's segur que li tendènci generalo de tòuti li pople mouderne sèmblon devé ié douna resoun.

En esperant lou soucialisme, sian en plen dins l'èro dòu *soucietalisme*, gramaci la luchò pèr l'eisistènci que nous buto à jogne nòsti forço à-n-aquéli de nòsti vesin pèr vincre li dificulta de la vido.

Tambèn lou noumbre di soucieta, courpouracioun, assouciacioun, sendicat es vertadieramen esfraious e cade ciéutadan fai partido au mens d'uno quingeno d'entre éli. Li jurando e li mestriso — aquéli remem-

branço de la fèudalita — se soun aprefoundido dins la chavano revoulucionari; neste siècle de lumiero lis a remplaçado pèr de sendicat. Jurando, mestriso o sendicat tout acò 's parié e i' a gaire que li noum que difèron mai, que voulès, i' a agu proun de metre lou darrié en plaço di proumié pèr faire à mita lou bonur de trabaiaire.

Basto ! Dins aquelo inmènso quantita d'assouciacioun qu'an pèr toco l'ournamentacioun artistico dis agassin o l'ameiouramen di mousco, i' a uno faviero d'autant mai regretablo qu'a fa lou malur de noun sai quant d'ome, sènsou coumta li femo. E çò que i' a de mai bijarre es que degun a encaro pensa — meme dins aquéli que ié soun lou mai interessa — d'adouba aquel óublit grèu.

O, i' a uno soucieta prouteitriço dis animau e i' a pas uno soucieta prouteitriço di celibatàri !

Un jouvènt se trobo fort bèn dóu celibat que la Glèiso recoumando coume l'estat lou mai perfèt; pamens, estènt que la Glèiso dis tambèn *vœ soli* — malur à-n-aquéu qu'isto soulet — neste ami partejo li peno e li joio d'aquest mounde em' uno damisello dóu cors de balet.

Es urous, la balarello es urouso.

Uno jouvènto estùdio soun pianò, fai de pinturo, alestitis soun brevet e caligno emé soun

cousin que porto lou péu sus lis espalo e ié fai de sounet que valon mens un long pouèmo que li poutouno qu'escambion darrié li porto.

Es urouso, lou cousin frapu es urous.

Alor intro en scèno aquelo tarasco que d'un soulet cop vai tremuda tout aquéli joio en autant de doulour. Es uno femo o pulèu, acò sèmble uno femo : es la *maridarello*.

Vè-la ! Es vestido de negre — o, à tout lou mens, de coulour sourno coume si plan. Es de-longo couifado d'uno *capoto* que ié baio l'èr serious, valènt à dire l'autourita necito pèr coumpli li causo terriblo que remeno dins sa testo. Dis iue ruto l'ourizount de tout caire, *quærens quem devoret* dirié l'aposto. Soun regard poussedis un fluide, uno atrivanço magnetico especialo e, tout en caminant atusado, estúdio li passant pèr vèire se d'asard capitarié pas dintre éli dous sujet, car soun especialita coumporto sèmpre dous sujet.

Mai la vaquito à l'arrést. Sourris !

Plouras, balarino, ma migo ! Gouïsso e fai d'elegio, malurous pouèto !

La maridarello a decida d'encadena l'uno à l'autro aquéli dos liberta. Perpren tout ensèn li gènt dóu jouiname em' aquéli de la chato, parlo de counvenènço, peso li doto, sapo, furo, cavo e ajoun sa toco. Aquéli dous jouvènt que s'amón pas, soun marida.

Mai n'es d'éli coume de l'eletricita. Aquéli dous èsse que se soun leissa ana l'un vers l'autre tant qu'ero tèms de faire arrié, ressènton, entre estre uni, un abourrimen reciproque em' invincible.

« Dos eletricita de noum countràri s'atiron; dos eletricita de meme noum se rebuton. » Es un principe de fisico.

Lou nòvi, la nòvio, la dansarello, lou pouèto merouvian e li belli-gènt, tóuti maudison la maridarello. Mai eicester trefoulis.

Es nascudo pèr faire d'unioun e n'en fai; que sigon bono o marrido, urouso o malurouso, acò l'arregardo pas mai.


Un cop aquéli dous d'aqui sóuda l'un à l'autro, se bouto tournamai en casso e passo à d'eisercice nouvèu.

Vaqui l'esse maufasènt contro quau se fau apara. Demande adounc la creacioun d'uno *Soucieta prouteitriço di Celibatari* que baiarié de prèmi en tout aquéli que i' adurrien la lengo d'uno maridarello cunvincudo d'avé atenta à la liberta de dous jouvènt.

E se, pèr aquelo idèio filantroupico, mi countempouran m'aubouron pas uno estatuio, es que saran de bèu rascas.

E jogue cènt franc que n'en sara ansin.





SANT MIQUÈU

Noun sabe se i' a, dins noste bèu Miejour,
un sant mens en óudour de santeta que Sant
Miquèu.

La coustumo de nostro encountrado vòu que
lis arrendamen fenigon à Pasco e au 29 de
setèmbre, jour que se celèbro la fèsto d'ou
glouriOUS arcange que garcè, avans l'espelido
d'ou mounde, à messire Lucifèr, uno rousto
celestialo.

E doux o tres mes d'avanco, l'aproche de
Sant Miquèu proudus i tres bon quart de nostro
poupulacioun lou meme efèt que l'arribado de
l'ouro ounte voste dentisto vous espèro.

I' a de gènt que decoulèron pas, e soun
noumbrouus que sèmblo pas verai.

D'en proumié i' a li proupietari óubliga de leissa parti si loucatàri — belèu meme de li faire espulsa — sènso poudé n'en tira un pié. Pàuri gènt que soun parteja entre l'espèro de capita de loucatàri mai ounèste e la crento de cambia que de mourre.

I' a pièi li gènt renja fourça de demeinaja mau-grat éli e que, sachènt que tres demeina-jamen valon un encèndi, regardon si moble emé lou meme atendrimen que temougnarien à-n-un ami que dèurrien plus revèire.

Enfin i' a de gènt que demeinajon perqu'es l'usage. O, li gènt que se respeton dèvon cambia de lóujamen à Sant Miquèu. Coume pour-rien-ti faire pèr pas quita si niero e si punaiso pèr li niero e li punaiso d'un autre ?

— Aquéli, me dirés, dèvon pas rena contro lou Sant...

Errour grèvo ! Se la coustumo vóu que l'on demeinage, eisegis pas mens que l'on traigue fiò e flamo contro lis enfetamen d'aquel oúperacioun.


Escoutas Madamo. Pòu plus metre la man sus la sartan pèr couire lis iòu, óublidant que l'a facho resquiha entre dous mouloun de linge; li couteu an despareigu, li retroubarié dins la taulo de niue.

Moussu, éu, cerco sa pipò sènso se douta

qu'es dins uno di sabato de la servicialo. Au mitan dóu brande-abas i' a que lis enfant e li demeinajaire que trefouligon. Eicésti perqué lis asaire van e que ié fan pas paga la roumpeduro. Aquéli perqué i' an douna à-n-abena lis eisino de counfituro que jaisien entamenado dins lou trefouns dis armàri, que l'on a pas lou tems de li teni d'à-ment e que l'aproufichon pèr faire touto meno de marrit cop.

Es egau, se Sant Miquèu siguèsse pas arcange e que siguèsse menaça de vèire i' arriba tout ço que ié souveton, sarié pas tranquile.





LA FIERO

I' a dos epoco dins la vido ounte la fiero vous amuso : quouro, enfant, belan uno sibleto o un fusiéu, pièi quouro, devengu ome, i' anan estudia *in anima vili* certan coustat de nosto genòrio.

E d'abord fau bèn remarca qu'au pount de visto coumerciau nòsti fiero soun un mite.

Se, autre tèms, avien soun utileta à-n-aquéu pount de visto, la rapideta e l'aise di coumunicacioun mouderno lis en an despueiado deplanto. Se sussiston, es pèr tradicioun e 's pèr tradicioun peréu que li meinagiero ié van croumpa uno escumadouiro o un cabas que pagaran forço mai qu'au magasin ounte van

d'ourdinàri. Mai fau *faire sa fiero*, es un principe, e li meinagiero galejon pas sus li principe. Demandas pulèu i troupié.

Tout acò empacho pas li cridadisso di pistoun, li ran-plan-plan di bachas, li gensamen di flahutet, li din-din di campano. Lou bousin es toujour tant infernau qu'au tems que Sant Jóusè èro jouinome mai li barraco soun pas tant noumbroso ni tant trelusènto. Li femo à barbo vènon raro, lis ercule an perdu aquelo fermeta que fasié sa forço majo, e li femo-tourpiho, coumprenènt qu'acoumènçon d'estre d'anacrounisme vivènt, beisson lis iue coume de rousier. Ai-las ! Es la debanado.

Lou mai que vous frapo, quand traulas en uno fiero d'aro, es que quàsi tóuti li barraco soun italiano. Acò marcarié-ti qu'en Franço se pòu plus trouba de sauto-en-barco que dins la poulitico ? S'ansin n'es, poudren que regreta l'encian régime banquisto.

* *

Dire que se rescontro de gènt pèr afourtí que li diéu s'en van, que soun meme tóuti parti ! E bèn agachas aquel ome de la taio giganto, di bras e di cambo de graniéu. Acò 's Ercule e, se n'en doutas, intras dins lou round, demandas

l'escarsoun e mesuras-vous contro éu, ourgueious Antiéu !

Lou tiatre di mounino ! La joio di pichot e même di grand. L'ourguei di tenènt de Darwin que ié van estudia sis àvi à quatre man e que se n'en creson coume se pòu pas mai de vèire çò que s'óuten d'éli.

— Coume, dison, doutas que siguen quicon d'autre que de bestiàri ? Mai espinchas dounc e sigués counvincu.

— O, voste resounamen nous toumbo. O, moussu, sias uno bësti e noun di mendro.

En esperant, intras toujour, midamo e mes-siés. Veirés *l'eisecucioun dóu desertour, lou carroso roumpu, la taulejado di singe* e àutris espetacle qu'an fa voste chale dóu tèms que tetavias voste pouce e que metias voste guignaire dins voste nas.

Veici uno pancarto que me fai pantaia. Un artiste impressionisto i' a pinta un bust de chato sourtènt d'uno gorbo de flour e sus-mounta de... dos tèsto !

Caspi ! Dos tèsto ? Es-ti bèn Diéu pouossible ? Avèn tant de peno à trouba uno femo que ague uno soulo tèsto qu'acò sèmble uno fatorgo. Pamens n'en fau crèire l'evidènci. O, aquelo mancipo a dos tèsto, e vaqui perqué si pariero n'aguènt au mai uno, mostron la mesquino

coume un fenoumene aprouva pèr tòuti li faculta de medecino dòu mounde entié.

Mai veici lou pendènt. Un moussu jaune coume un pan de ciro, ourna de favourit grisoun e d'uno rouseto de la Legioun d'Ounour, presènto sus uno telo uno femo qu'a quatre cambo. De bon, avien pas besoun de moustra 'cò à nòsti Canenco. S'entendon déjà que trop, quouro lou printèms arribo, à jouga de soun parèu de cambo vers uno autre patrio. Avisasvous de la tierro de raubatòri venènto. Sara quicon d'afrous.

* *

Pèr iéu ço que vau vèire à la fiero es pas Ercule, es pas li mounino, es pas li femo di dos tèsto o di quatre cambo, nàni, ço que vau espincha es l'eterno coumèdi dis amourous que me fournira quauque sujet de conte o de novo. E tenés pèr segur qu'aurai pas à cerca long tèms pèr acò. Intren dins la barraco de la femo-tourpiho.

- De-que vesés aquito, à man drecho !
- Uno chatouno emé sa maire o sa tanto.
- E vis à vis d'elo ?
- Ah ! diàussi ?
- Anen, aro, vers la giganto. Li vesés eila, à man seneco ?

— Efetivamen; mai li distanci se soun bravamen acourchido e, se noun m'engane, lou manchoun de madamisello rescound coume se pòu pas mies à la mama, tout un pichot manege telegrafi.

— Ah ! Ah ! Coumenças de vous fourma, bèl ami. Anen vèire la meinajarié.

Mai à la meinajarié li representacioun tiron de long; dòu tèms qu'*Elo* e mama prenon si plaço, *Eu*, d'asard, se capito darrié *Elo* e 'nterin que la maire ris coume uno asclado di grimaço di mounino, lou gracious manege countùnio au mié de la foulo que se n' aviso pas.


Enfin, Asor vèn d'estre fusiha, van beissa l'agazo pèr soun enterramen, es lou moumen de durbi l'iue e lou bon.

Pst ! Es fa.

Au moumen que la rampo s'amosso uno gallanto manoto gantado de Suedo sorte d'aquéu manchoun un bihet dous que disparèis en un vira d'iue...

Mama es estado bravo. A rèn vist.





PÈR RAMPAU

Es toujour emé gau que veson reparèisse aquéli rampau adourna de frucho coundido em' aquéli paumo sauro coume de péu de bèlli chato. Es que lis un e lis autre anouncion la fin d'aquelo Caremo ounte la marlusso èi rèino e ounte la tartifle es aubourado à l'autour de plusiour estitucioun.

Tambèn mancariéu pas un an d'ana vèire dins uno de nòsti glèiso l'espetaclle curious e meme amusatiéu que nous i' es óufert emai de ié faire quàuquis estudi de caratère.

Couneissès-ti lou lengage de la paumo, car ligèire ?

Nàni ! Acò m'estouno pas bord qu'avès tant soulamen un jour dins l'an pèr n'en trepana lis arcano. Vaqui perqué se trovo pau de gènt proun perseverant pèr ana fin qu'i trento leiçoun gramaci li qualo de magistre endustrious se cargon de vous ensigna li lengo estranjo, l'equitacioun, la musico, l'escrimo, etc.

Li proumié qu'intron à la glèiso aquéu jour, es lis enfant emé li parènt que tirasson, de grat vo noun, à la remorco.

Aquéli cherùbi an fa la scèno tout aro perqué voulien pas ié leissa suça li fruchu sucrado d'un rampau gagna i tres carto e que, tout uno semano, a acampa lou mai poussible de la pousso dòu Cous. Que voulès ? Es lou reglamen : pas lou pus pichot cop de lengo tant que lou rampau es pas esta benesi. E li nistoun, despacienta, an fa tripet-pelòri pèr ana lèu-lèu à la glèiso. Coume se moussu lou curat èro tant pressa qu'éli ! Li parènt an moula pèr avé la pas.

Dòu tèms que souto lou pourtau, li pichot paure li regardon passa emé d'iue envejous, lis urous poussedèire d'aquéli counfimen bijarre van prendre plaço i proumié banc pèr èstre li

proumié d'avé la benedicioun dóu prèire. E à
cade mouvemen que fai eiceste :

— *Man, ze le suce le rampeau ?*

* *

Soun peréu pressado d'arriba, li vièii fiho
charpinouso que reporton sus Diéu li tresor
d'amanço de cor que lis ome an pas vougu.
Es la chourmo di *devoto dóu gros grun*, dis
esquichado coume ié disié lou paure Rouma-
niho que li couneissié bèn.

Plaço à Madamisello Perpètio. Es un di ce-
poun de la glèiso. Vaqui cinquanto an qu'a sa
cadiero au pèd dóu tresen pieloun à man se-
nèco, e mau-despié sis iue clin, intro aquito
coume au siéu. Soun gros libre d'Ouro souto
lou bras, esquicho di dos man contro çò qu'a-
rié pouscu èstre soun sen, uno broco d'óulivié
destinado au benechié de soun lié, em'uno
paumo gigantasso, simbèu de sa vierginita
rànci, qu'anara ourna soun saloun, acroucado
au cadre dóu mirau.

* *

Au moumen que lou prèire sort de la sacres-
tio arribo un vòu de coulegian.

Messiés li *poutache* soun plus proun pious pèr arriba un quart d'ouro avans l'óufice, mai lou soun encaro proun pèr arriba à tèms.

Lis un an flouca sa boutouniero de crous d'ounour trenado en fueio de paumié; lis àutri, — li en quau de cousin an ispira de milié de vers sougnousamen caligrafia dins d'album — an bravamen arboura de bleto de lausié (*laurus poetarum*), degudo belèu i dicho cousin entousiasmado — e pèr causo — de si vers panard.

Vous demande un pau ço que ié pòu faire, après 'cò, de pas davera lou lausié universitari que noumon bacheleirat ?

* *

Coume ? Disès, car ligère, qu'ai óublida li dono ?

Diéu me garde de delembra aquéli pus bèlli mita de tant de jouve meinage ; mai vous farai remarca que n'en sian encaro qu'au moumen ounte lou capelan sorte de la sacrestio e devès saupre que li dono que se respèton meton lou pèd dins la glèiso que quouro l'evangèli es di.


Tè, vaqui lou moumen. Bloundo, bruno, rousso, pourtant de mistoulinet rampau d'óulivié, li vaquito qu'arribon, troutejant sus la


pouncho de si petoun, courregissènt d'un cop
de det li mècho folo de si péu. Bagnon lou
bout de si gant dins lou benechié, se signon
souto cambo, butasson de cadiero emai de
gènt, pièi, capitant uno plaço à soun goust,
s'afalon dins uno pauso tant gracieuso que
poussible.

* *

Cresès-me, car ligère, countuniès lis estudi
de quau vous vène de moustra lou rudimen. Ié
farés de descuberto d'un interèst pouderous e
que sòuçounas pas.







N O T O

1. I' aura bessai de gènt que se demandaran perqué Astruc e ieu escrivèn *Ciagno* liogo de *Siagno*, ourtougràfi coumuno e qu'aviéu ieu meme adoutado dins moun *Istòri mai que vertadiero d'ou Souto-Prefèt de Capito*. Es que desempièi me siéu avisa que li manuscri de l'Age-Mejan, entre quau lou *Cartulàri de Lerin*, pourtavon de longo *Ciagna*, *Civania* e un soulet cop *Scianeia*. De meme que nautre, Felibre, escrivèn *Lar*, *Artùbi* etc., en plaço de l'*Arc*, *Nartubie*, devèn peréu escriéure *Ciagno* e noun *Siagno*.

2. Courdounié, noum poupoplari de l'idroumètro, bes-tiouleto aiguestro que, en nedant, sèmbla tira lou lignòu coume fan li pegot.

3. *Suquetan* es lou noum que baion à Cano is abitant d'ou *Suquet*, valènt-à-dire de la vièio vilò, ounte rèsto

la poupulacioun marino. Lou Suquetan es dounc pèr noste païs çò que lou Sant-Janen es pèr Marsihø. Li Franchimand, emé soun testardige à counsidera lou prouvençau coume nul e noun avengu, afourtisson que Suquet vèn dòu grè SUKÈ, figuiero, raport en quauco espetaclous aubras d'aquelo meno que i'aurié agu aquito, quau saup quouro ? De figuiero, i' a jamai agu au Suquet qu'aquelo sus quau escalerian, moun ami Amouretti e iéu, lou jour qu'un de nòsti magistre dòu Coulège Estanislau nous serviguè aquelo etimoulougio ellenicò-fumisto.

4. « *Bensa, aquéu fin musicaire qu'a dins seis armarié uno couloussalo vióuleto qu'empacho tròup sei countempouran de l'ausi.* » Ansin dis lou n° 25 de Zòu ! en parlant d'aquel artisto majourau, d'aquéu cor d'eleì. Mai s'agrado à Tounin Bensa d'estre moudèste pèr éu meme, iéu siéu pas tengu de l'estre pèr éu e me fau un devé de signala l'autour de *Lengo d'Amour*, de *Regòli*, di *Pescadou Sant-Janen* e d'*En pensamen de ma Bruneto*, i devot de la musico vertadieramen artistico, vertadieramen sano.

5. Cagno es un vilage dis Aup-Marino que jogo vis-à-vis d'Antibo e de Cano lou role que jogon lou Martegue vis-à-vis de Marsihø e Siéis-Four vis-à-vis de Touloun. Li Cagnen au grand renoum de nescige e se fai forço raconte galejarèu sus éli. (V. lou conte : L'EUME).

6. Un vèspre que legissiéu lou manuscri d'AGUETO à la *Felibresso de la Crau*, eicester me faguè remarca qu'aqueste chapitre retrasié tant-sié-pau à-n-un di

*Counfessiou*n de Rousseau. Auelo sceno es tirado de mi souvenènço persounalo e i 'a de pèr lou monde tres supèrbis Aubagnenco que poudrien temounia que s'ai escri quicon dòu biais de J. J. es qu'aviéu auparavans fa quicon dòu même biais. Tambèn ai pas cresegù devé leva aquéu tros de moun rouman aguènt la fisanço que despièi que i 'a d'agroufioun e tant que n'i 'aura, Rousseau e iéu sarens pas li soulet que se sarens liéura à-n-aquéu jo agradiéu. E pèr acaba de leva en certan lou mejan de m'acusa de plagiat, veici lou passsage sus-di di *Counfessiou*n : « *Après le diné nous fimes une économie. Au lieu de prendre le café qui nous restait du déjeûné, nous le gardâmes pour le goûté avec de la crème et des gâteaux qu'elles avaient apportés; et pour tenir notre appétit en haleine nous allâmes dans le vergerachever notre dessert avec des cerises. Je montai sur l'arbre et je leur jetais des bouquets dont elles me rendaient les noyaux à travers les branches. Une fois Mademoiselle Galley, avançant son tablier et reculant la tête se présentait si bien et je visai si juste, que je lui fis tomber un bouquet dans le sein; et de rire. Je me disais en moi-même : Que mes lèvres ne sont elles des cerises! Comme je les leur jetterais ainsi de bon cœur.* »

7. Nostro-Damo-de-Vau-Cluso, capeleto situado à un pau mai de dous kiloumèstro d'Auribèu, ounte se fai de roumavage lou 25 de Mars et lou 8 de Setèmbre. Lou darrié es lou mai celebre e lou mai treva.

8. Vin mai generous que li pus generous vin d'Espango e que se recòutavo sus li colo de la Gaudio, dòu caire de Vènço. Pèr malur lou filoussera es vengu arrouina, coume tant d'autri, aquéli vignarès d'elèi.

9. Forço gënt, quand publiquère moun *Souto-Prefèt de Capito*, an cresegu qu'aquesto viloto fasié partiò de la geougrafio de fantasié ounte s'atrovon Pamparigousto, Gipoutou, Gafo-l'Ase e Sàrri-Patàrrí. Pamens Capito eisisto vertadieramen. Es uno coumuno dòu cantoun de de Cano que ié dison en francés : *Mandelieu*. Soun noum prouvençau es uno remembranço de la segnourié que i'avié — coume sus tutto l'encountrado — l'abadié o Capito de Lerin.

10. Sant-Cassian, mouloun de terro jita au bèu mitan de la plano de La Vau, à 4 kil. de Cano. Es un di rode li mai galant de l'encountrado. I' a au d'aut un pichot ermitòri cенcha d'auciprès, de rouve e de pin paro-soulèu gigant. I' a 'gu pròchi Sant-Cassian uno bataio entre li tenènt d'Outoun e li de Vitellius. Lou roumavage que se ié fai en Juliet èro, i' a soulamen quauquis an, lou mai renouma de l'environ. Milo Negrin a fa un pouèmo sus la batèsto que i' aguè en 1793 entre li Grassen e li Canen rapport à Sant-Cassian. Li Grassen, jalous, voulien aprouficha la vèndo di bèn de gleiso pèr lou croumpa e empacha lou roumavage. Li Canen empourteron l'en-chèro gràcis à la coumpliceta dòu grefié que boufè lou lume après la *miso* di Canen. La prouprieta n'es aro talamen divisado entre li descendènt di proumié pous-sedèire que jamai se poudra vèndre. Li proupietari atuau soun belèu tres cènt e formon uno meno de sendicat regi pèr un baile carga, lou jour de la fèsto, d'ourganisa la taulejado.

11. Aquéu fa es istouri. Me siéu accountanta de mou-difika tant sié pau lou noum de l'amirau en questioun que se lou tenguè pèr di.

12. *L'Assouociacioun di Dono Francesco*, relevant de la Crous Roujo, a pèr toco de veni Tajudo en tèms de pas i civil vitimo d'un malastre o d'un epidèmi e, en tèms de guerro, i soudard amalauti vo blessa. Li dono que n'en fan partido seguisson de cours que ié fan cada semano li mège e li farmacian de la vilo e podon passa d'eisamen pèr óuteni lou diplomo d'infiermiero gramaci quau podon eiserça en cas d'urgènci uno medecino elementàri proun utilo.

13. En terme de librarié e de journalisme, li *bouïoun* soun lis eisemplàri que se chabisson pas e que se vèndon coume vièi papié.

14. Lou *fassun* es lou manja naciounau de Grasso. Es uno mescladisso de ris e, chaplado bèn prim, de car de saucisso e di fueio blanco d'un caulet dòu quau li pampo verdo siervon à plega lou tout en un paquet. Crento qu'eiceste se desfague dins l'oulo ounte lou fan bouli, lou meton dins uno meno de fielat noumado *fassumié* que lèvon au moumen d'adurre sus taulo çò que caup.

15. La *Furstemberg* es un èr couneigu de tòuti li tambourinaire e 'n quau dison tambèn, à Marsiho : *Diéu vous doune lou bouen souèr*. (Conf. *La Marsiheso de Louvis Astruc, noto*).

16. La Castro, noum douna au planestèu qu'es au d'aut dòu Suquet e ounte se trobo l'enciano parròqui emé li soubro dòu castèu que i' avien basti lis abat de Lerin. Aquéu castèu, nouma d'en proumié *Castrum marsellinum* prenguè lou noum de *Castrum francum*

pèr la voulunta de Berenguié-Ramound, fiéu de Ramound-Berenguié I, que i' acourdè franqueso e liberta. Tambén, dins divers encartamen de l'age-mejan, Cano es apelado peréu *Villafranca*.

Se vèi que lou mot de *Castro* vèn direitamen de *Castrum*.



ENSIGNADOU

	Pages
PREFACI	i à XVI

AGUETO	i
------------------	---

PÈR RIRE :

<i>Li Coulico de Bidanflet</i>	111
<i>Lou Foque dóu Traias</i>	117
<i>Plus de frei i pèd.</i>	121
<i>Lou Negadis</i>	125
<i>La Dindo</i>	129
<i>La Casso à l'Agachoun</i>	133
<i>La Letro noun afranquido</i>	137
<i>Lou Cassaire</i>	141
<i>L'óurigino di Flour</i>	143

<i>Lou Retra.</i>	147
<i>L'Esclùssi.</i>	151
<i>Lou Paro-plueio.</i>	153
<i>Un Gèndre qu'amo sa Bello-maire.</i>	157
<i>L'Innoucènto.</i>	161
<i>Un Duèl.</i>	165
<i>Jan Tapeno.</i>	169
<i>Lou Tambourinaire de Cassis.</i>	174
<i>Li Darboun.</i>	177
<i>Descaussana sènsò lou saupre.</i>	181
<i>Lou Coundiciounau e lou Passeroun.</i>	185
<i>Cra-cra-cra.</i>	189
<i>L'Eume.</i>	193
<i>Lou Dimars gras d'un clerc de Noutàri.</i>	197
<i>Venjanço d'Escarrabin.</i>	201
<i>Lou Suicide d'un Ussié.</i>	205
<i>La Brosso dóu Viscomte.</i>	209
<i>Uno Soucieta de crea.</i>	215
<i>San Miquèu.</i>	219
<i>La Fiero.</i>	223
<i>Pèr rampau.</i>	229
<hr/>	
<i>Noto.</i>	235

ACABA D'ESTAMPA LOU VI DE MAI

MDCCXCIII

ESTAMPARIÉ F. ROBAUDY

Carriero de Prouvènço

CANO

DÓU MEME AUTOUR :

Istòri mai que vertadièro dóu Souto-Prefèt de Capito 0,50 c.
(Acaba)

Ourdounanço de Poulico de Sant-Martin de Crau... 1 fr. »
(d'après lou manuscrit ouriginau).

Un Ome qu'a de principi, /2^e edicioun/ 0,50 c.

Discours prounouncia is oussèqui dóu prince Guihèn
Bonaparte-Wyse 1 fr. »

— — — — —

BIBLIOUTÈCO DE L'ESCOLO DE LERIN

in 8° escut.

MAURICI RAIMBAULT : Agueto, rouman..... 3 fr. 50

HENRI GIRAUD : Peçu de Vers, pouesio 2 fr. »

Lou Moulin, rouman (EN PREPARACIOUN)


M. BERTRAND : Pèr li Cassaire, aneidoto 1 fr 50

F. GARBIER : Lou mariage i Coumissàri, coumèdi en prosa
(EN PREPARACIOUN)

Francò de port contro mandadis dóu près au Secretari
de l'Escolo felibrenco de Lerin, à CANO.

CARTE POSTALE

Ce côté est exclusivement réservé à l'adresse



M

.....

.....

.....

.....

.....